

W. C. L. + M. W. + d.

6/6

M 262



MARBHRAINN,

A RINNEADH AIR

DIADHAIRIBH URRAMACH,

NACH MAIREANN.

MARBHRAINN,

A RINNEADH AIR

DIADHAIRIBH URRAMACH,

NACH MAIREANN;

AGUS

DÀNA SPIORADAIL EILE:

LE

DR. IAIN DÒMHNULLACH,

MINISTEIR NA H-EAGLAIS SAOIRE 'S AN TÒSIDHEACHD.

A' N DARA MILLE.


DUN-ÉIDIN:

CLODH-BHUAILTE LE UILLEAM P. CEANADAIDH,

AGUS AIR AN REICEADH LE

D. MAC-BHEATHAIN, AN GLASCHO; D. FRISEIL, AN INBHIRNIS;
I. ROS, AM BAILE-DHUTHAICH; I. KEITH, AN INBHIR-
FEOTHARAIN; A. SINCLAIR, AN INBHIR-FEÒR-
SAIDH; I. MILLER, 'S AN OBAN LATHOIRNEACH; G. BLACK,
AN TOBAR-MHUIRE; S. MAC-CHOINNICH, AN STEÒRNABHAIIDH;
AGUS I. M'KELVIE, AN GRIANVIG.

MDCCXLVIII.



LAURISTON CASTLE
LIBRARY ACCESSION

AN ROIMH-RADH.

BHA na dàna 's na Marbhainn a tha a nis air an cruinneachadh 's an Leabhar so, air an dèanamh leis an Ughdair, a' chuid mhòr dhiubh, o chionn iomadh bliadhna. Mar bha, ann am freasdal Dhié na daoin diadhaidh, urramach, d' an rinneadh na Marbhanna, air an gairm dhachaidh; 's a bhual a dhealachadh féin riutha, agus 'ionndrain féin orra—'n uair bhual sin a stigh air inntinn agus spiorad an Ughdair, bheothaich-cadh e gu 'fhaireachduinn féin a chur an céill ann am briathraigheibh; agus mar bha làn-fhios aige, gu 'n robh an fhaireachduinn agus an t-ionndrain ceudna aig iomadhl cile, a thuilleadh air féin, fhuair se o féin toileach agus dùrachdach, bhi air a dheanamh mar 'n a bheul do fhaireachduinn agus do smuaintibh chàich. Tha an Ti sin a 's o féin an CEANN glòrmhor, ag ràdh gur h-iad na fìrcana "Salan na talmhainn." Agus 'n uair tha saoibhlreas gràis air a shrithealadh do dhaoinibh fa leth, 's an Eaglais, a tha 'g am fàgail soillcir, deadh-mhaiseach,

dealrach, ann am beatha na diadhachd, air mhodh àraid, agus mar innealaibh sònruichte ann an làimh an Spioraid gu bhi a' cur obair nan gràs air a h-aghaidh ann an anamaibh eile, feudar a ràdh, gur h-iad sin, salann na h-Eaglais faicsinneich, ann am iomadh seadh. Bu lòchranan iad 'n an làithibh féin. Agus, "air dhoibh bhi marbh, tha iad fathast a' labhairt." 'N an inbhíbh, 'n an dreuchdaibh, 's 'nan seirbhisibh fa leth, a thugadh dhoibh, ann an àrd-uachdar anachd frithealaidhan t-saoir-ghràis, tha an eisimplir prìseil. Tha an Spiorad Naomh a' cur an céill,—"Bithidh cuimhne an fhìrèin bean-naichte,"—agus,—"Air chuimhne gu bràth, bithidh am firean." Agus is e a dh' iarr an t-Ughdair, gu cinnteach, gu 'm biodh cuideachadh air a thabhairt leis na marbhrannaibh so, cha 'n e a mhàin do chàirdibh agus do luchd-gràidh nan daoine urramach mu 'm bheil iad; ach gu 'm biodh iad mar an ceudna 'nan cuideachadh, gu tuairisgeul agus iomradh an cliùthà, an giùlan, 's an eisimplir a chumail air chois, a measg nan ginealach a thigeadh 'n an déigh,—'s a tha a nis, eadhon cheana, air tighinn, ann an tomhas mòr. Agus cha 'n e an ginealach so a 's luglia feum, gu 'n cumtadh 'n an amharec, toraidhean agus tuairisgeul na fìor dhiadhachd; agus mar chunncas cumhachd na diadhachd roimhe, a' cumadh 's a' maiseachadh an luchd-teagaisg, 's an luchd-éisdeachd, a rinneadh 'n am maise 's 'n am beannachd 's an Eaglais, 'n an ionadaibh 's 'n an inbhíbh, leth air leth.

Bha a' chuid mhòr do na marbhrannaibh air an cur

a mach, goirid an déigh dhoibh bhi air an deànamh leis an Ughdair: ach chailleadh iad, mar sin, ann an tomhas mòr; agus is ann air chomhairle o iomadh do na bràithribh, agus o chàirdibh eile, a thàinig an t-Ughdair gu 'fhaicinn 'n a dhleasdanas dha féin, na dàna 's na marbhrannan araon a chur a mach, 's a chumadh 's am bheil iad a nis, 'n an aon Leabhar, an ceann a chéile. Dh' iarradh e a nis, an déigh na saothrach so, bhi 'g a fàgail, 's a bhi a' cur an Leabhair bhig so, air cùram an Tighearna; 's a bhi a' guidheadh gu 'n deanadh an Tighearn e, ma 's e sin a thoil bheannaichte féin, 'n a mheadhon ath-bheothachaidh agus treòrachaidh d' a shluagh féin, a dh' ionnsuidh am feud e tighinn; agus 'n a mheadhon do Luchd-éisdeachd an t-soisgeil, agus do Luchd-aideachaidh, gu an cuideachadh ann am faireachduinn a ghleidheil air teagasgaibh nan gràs,—air toradh an flìor ghràis, agus air a' ghnè giùlain agus caithe-beatha, a ghcibhear 's a mhothaichear, aca-san, a tha do rìreadh air an teagast agus air an treòrachadh leis an Spiorad Naomh.

Tha an t-Ughdair 'g a fhaotainn féin gu mòr fo chomainibh do na càirdibh lìonmhòr a chuir an ainmnean a stigh air son an Leabhair: agus tha e anabarrach duilich 'n a inntinn, gu 'n do chumadh an Leabhar air ais ùine co fhad, 's a' chlòdh-bhualadh.

GEARR IOMRADH

AIR AN

URRAMACH TEARLACH CALDAIR,

DO 'N RINNEADH AM MARBHRANN A LEANAS.

LE UGHDAIR A' MHARBHRAINN.

Bha sinnsir an duin' urramaich so ainmeil 'n an latha fein, mar luchd-saothrachaидh ann am fionn-lios an Tigh-earn. Bha Mr. Iain Caldair, a sheanair, rì bliadhna deug 'n a mhinisteir ann an Sgìreachd *Chaldair*, ann an Siòrramachd Innirnearain. Chaidh a shuidheachadh 'san Sgìreachd in, 's a' bhliadhna 1704 ; agus chaochail e 's a' bhliadhna 1717. Dh fhàg a thiodhlacan mòra, a dhiadhachd, agus an t-eud a nochd e ann an aobhar Chriosd fhad 's bu mhaireann da,—dh'fhàg iad co ainmeil e air feadh na dùthcha sin gu léir agus gur h-e *Mr. Caldair Mòr* a theireadh gach ueach, ann an labhairt uime. Rugadh a mhac-sau a ris, *Mr. Seumas Caldair*, athair Mhr. Thèarlaich, 's a' bhliadhna 1711, agus shuidhicheadh e 'n a mhinisteir ann an Sgìreachd Ard-nan-saor, ann an Siòrramachd *Inbhirnis*, 's a' bhliadhna 1740, agus an déagh dha bhi mu sheachd bliadhna 's an sgìreachd sin, dh'atharraich e ionad a shaothrach s a chìòmhnuidh, agus shuidhicheadh e 'n a mhinisteir ann an Sgìreachd *Chroidh*, ' an t-Siòrramachd cheudna, mu mheadhon an earraich

's a' bhliadhna 1747, far au do chaochail c mu mheadhon an fhogharaidh, 's a' bhliadhna 1775. B' fhearsearmonachaidh cumhachdach Mr. Seumas ; agus e 'n a dhuine a ràinig air àirde mhòir aun am beatha na diadhachd. Agus shoirbhich an Tighearn leis 'n a shaothairibh gu farsuing, soilleir. B' inneal e ann an làimh an Ard-inhaighstir, leis an d'iompaicheadh iomadh peacach, agus o an d' fhuair treud Dhé ionaltradh agus beathachadh d' an anamaibh. Dh'fhìag Mr. Seumas triùir mhac 'n a dhéigh, Iain, Uistein, agus Téarlach. Bha Iain 'n a mhinisteir aun an Sgìreachd *Roscuinidh*, an Siorramachd Rois, far an do shaothraich e gu dileas, agus far am facas toradh a shaothrach, o 'n Tighearn. Thàinig Uistein a stigh mar shear-cuideachaidh d' a athair, ann an Sgìreachd *Chroidh* : bu duine diadhaidh e ; agus bha sin soilleir 'n a chaithe-beatha gu léir ; ach le e bhi euslainteach, anfhanu 'n a phearsa, cha d'ràinig e air an àirde cheudna ann au ainm, no ann an gráthachadh thòdhlaican na ministreileachd 's a fhuair 'athair, a sheanair, agus a bhràithirean. Bha e mar bu trice co anfhan agus co bochd 'n a shlàinte 's gu 'm b' éigin da fear-cuideachaidh bhi aige 's an Sgìreachd, fhad 's a mhair e. Mu dhéighin *Théarlach Chaldair* a rìs, d' an rinneadh am Marbhrann so a leanas, feudar a ràdh, gun teagamh, nach b' ann an déigh làimh a thàinig esan, air tíodhlacaibh 's am bith, no air gràs, a chunncas roimhe 'u a shinnisir. Bhuilicheadh comasan nàdurra air, mar dhuine, a bha os ceann mliòrain. Bu duinc e a fhuair agus a choisinn àrd-flioghlum : agus cha bu lugha a bha e urramach, àrd, ann an iùbhe bheatha na diadhachd ; dhealraich cumhachd agus maise nan gràs gu h-iongan-tach 's an duine phrìseil so. B' fhíor, do rìreadh, uime-sau, gu'n do thuit falluinn Eliah air Elisa. Is fiù an

cliù so air, a leanas, a leughadh, a chaidh a sgrìobhadh goirid an déigh àm a bhàis, agus mu 'm feud ùghdair a Mharbhrainn a ràdh, gu 'm bheil na tha air a chur sìos ann a' còrdadh gu h-iomlan r' a bheachd agus r' a bhreith-neachadh féin. " Bu duine Mr. *Teàrlach Caldair* (arsa feur-sgrìobhaidh an iomraidh sin,) bha gu sònruichte air a choisrigeadh a chum seirbhis a Thighearna, agus a bha gu sònruichte dileas do 'n t-seirbhis sin. Chaidh a chliù am farsuingeachd, agus cha b' iongantach sin, mar dhuine agus mar flear-teagaisg a dh' aidich an Tìghearn 'n a shaothairibh, agus aig an robh a chonhluadar uile, gu h-anabarrach r' a fhaicinn fo riaghladh gràis. Ach is ann 'n a Sgìreachd fharsuing féin, agus air feedh a choimhlithionail lòn-mhoir d' an do shritheil e, eadhon 'n an eridhibhl-san, 's an leth stigh, a gheibh teadhl ìochslaint thlà a ghuth agus a theagaisg air a mothachadh do rìreadh mar bholtrach cùbhraidh. Cha b' an ngu fuasgailte, neo-stéidhichte, neo-chuimseach, no cearbach, a gheibh-teadh a theagast ; oir cha robh pone no teagast air an socruicheadh e a bleachd, no a dh'iarradh e gu 'n tuigeadh agus gu 'm breithnicheadh a luchd-éisdeachd iad, (mar dh' iarr e a ghlnàth,) air nach cuireadh e blas an eireachdais agus na maisealachd agus air nach faiceadh gach neach a leithid do shnas 's a nochd ar aon, gloinead agus soilleireachd na li-inntinn o 'n d' thàinig iad a mach; cho domhain 's a chaidh e a stígh annta, agus an tlachd anama a ghabh e ann an nithibh an Tìghearn e féin, agus an t-urram a dh' iarr e thabhairt do na nithibh sin uile. Bla riaghait, suidheachadh, agus deadh rian 'n a uile theagast ; air an tarruing leis mar bha a theagasan gu léir o thobar fhior-ghlan na Fírinne, agus e a' moladh na firinn sin 'n a maisealachd do gaeh aon neach a dh' éisdeadh. Air son a thiodhlacan agus a chomasan féin

mar dhuine, ged mol gach neach iad ach e féin a mhàin; 'n a theagascg, is ann a smuainicheadh neach gu 'm bu roghnaiche leis an ceiltinn na 'm feudadh e, na bhi 'g an sgaoileadh a mach mar ghrinneas, leis am feud duine tuilleadh molaidh a chosnadhl dha féin na a cheadaicheas e do 'n fhìrinne a chosnadhl d' a h-Ughdair. Ach ged bha mar so, ann féin agus 'n a dhòigh teagaisg gràs na fìor irioslachd agus a' ghràidh, mar a' tarruíng sgàile eadar luchd-éisdeachd agus àrd-chomasan iuntinn an duine féin, cha d' rinn so ach e féin agus a theagasc ni bu mhaiseicheaun am beachd dhaoine tuigseach. 'N uair gu h-àraid, a labhradh e mar fhear-teagaisg ann an tigh Dhé, bha gach ni daingean, brioghmhor, saoibhir ann am milseachd na firinn, sùil aig gach focal ri bunait an Sgriobtuir, agus air a cho-chur, air ùghdarrings an Fhocail cheudna:—dùrachd an fhìor chaoimhneis 'n a ghuth agus 'n a shealladh,—tharruing e luchd-éisdeachd d a ionnsuidh, dliùisg e an aire, agus chum e an aire 'n a dùisg, thug e soilleireachd dhoibh 'n an tuigse, agus dhrùidh a bhriathran a stigh, gu cuinlhachdach air cridh-ibh a' chruiinneachaidh mhòir a dhòmhlaich mu a thim-chioll; agus sthog toraidhean beannaichte a shaothrach fianuis, nach b' ann an diomhanas a bha i, oir chunnecas na toraidhean sin anns an t-sìth, an irioslachd, anns a' ghràidh bhràthaireil agus anns an diadhachd neo-chealgach sin a thaisbein iadsan, 'n an giùlan agus 'n an imeachd, a ghabh tlachd ann an teagasc *Thearlaich Chaldaic*. 'N a aoidheachd agus na thabhartasaibh, bu duine fialaidh do 'n bhochd agus do 'n euslainteach e. Bu liomhlor iad sin gu tric tim-chioll a dhorsan; agus is ann gu fòil agus gu ciùin a chomhpàirticheadh e riutha, mar bhuilich an Tighearn an comas air. Gheibhteadh a chòmhradh “ a ghnàth ann an gràs, air a dheanamh blasda le salann.” Cha b'

aobhair nàire leis riamh crann-ceusaidh Chriosd, no a sheirbhis, no 'aobhar, no a phobull, no a mhasladh: agus 'n uair ghairmeadh e gu a chrann-ccusaidh a ghiùlain is ann a rinn e uaill 's an uallach.

Chriòchnaich e a thurus, agus dhealaicheadh o' choimh-thional e a bha dlùth-fluaithte ris ann an gràdh, agus d'an tug e fior ghràdh, an déigh euslaint a thighinn air nach robh ach gèarr. Agus ghiùlain e sin anns au fhraighidinn chiùin agus mhìn sin, a nochd e 'n a chaithe-beatha gu léir, agus spiorad a' bhuidheachais aige, 'g a lònadh, 's an duine 's an leth stigh; agus buhanaich e, eadhon gus an d'thàinig an uair, "a deanamh gàirdeachais an dòchas: foighidneach an trioblaid; maireannach ann an ùrnuigh," agus, "a' toirt glòire do Dhia." Chriòchnaich e a thurus air a' cheud là do nihòs deireannach an fhogharaidh 's a' bliadhna 1812, 's a' cheathramh bliadhna thar trì fichead d' a aois; agus an déigh dha bhi oclid bliadhua deug thar fichead 'n a mhinisteir. Shuidhicheadh e ann an Sgìreachd na Tòiseachd 's a' bhliadhna 1774.

Bha Mr Caldair pòsda air boirionnach a bha comh-arraichte 'n a h-iubhe 's 'n a h-ionad mar bhoirionnach diadhaidh, agus dhasan bu "chòmhnad d' a réir féin" i; bu phiuthar i do Thriath *Bhrodié*, ann an Siorramachd *Mhorailh*. Cha mhaireann a nis ach dithis do 'n cloinn, dithis nighean a bha pòsda le chéile, aig ministeiribh a bha ainmeil 's an Eaglais, an dara nighean aig Dr *Stiùhard*, a bha ann an Sgìreachd *Mhaoilinn*, agus an déigh sin ann an Sgìreachd *Inbhir-pheotharain*, agus mu dheircadh an Dun-éidin; agus an nighean eile aig Dr Mac-an-tòisich, a bha am *Baile-Dhuthaich*.

Rinneadh am Marbhraunn so leis an Ughdair goirid an déigh dha tighinn ann an àite Mhr Caldair do Sgìreachd na Tòiseachd. Is cothromach do 'n Ughdair

le fìrinn a ràdh, nach do rùnaich e idir 'n uair rinn e na rainn, gu 'm biodh iad air an cur an clòdh. Ach ghéill e do chomhairle a chàirdean, a bha an geall, agus a thagair, gu 'm biodh am Marbhrann air a chur an clòdh. Is anu o 'n urram 's o 'n ghràdh a bha aig na càirdibh sin do Mhr. Caldair, a dh'iarr iad so, a chum agus gu 'm biodh cuimhne a chliù, agus e blasda do rireadh dhoibh féin, ann an làmhaibh chaich màr an ceudna. Agus is e an t-turram agus an gràdh so, a bha araon aig na càirdibh sin agus aig an Ughdair féin do Mhr. Caldair, agus cha 'n e fiach 's am bith a tha 's a' Marbhrann féin, a thug air an Ughdair géilleadh do 'n impidh a chuir na càirdean sin air. Cha 'n 'eil an t-Ughdair 's a' Mharbhrann ag oidhirpeachadh dol a stigh ann an uile bhuadhaibh cliù an duin' urramaich, chomharraichte, so ; is auna a mhothaich e gu 'm biodh sin gu h-iomlan thar a chomaist. Agus 's e dh'oidhirpich e a mliàin, gu 'm biodh buàdhan sònruichte a chliù bu shoilleire a dhealraich na chéile, thar chàich, mar fhear-teagaisg, mar aodhair do 'n treud, agus mar neach fa leth do na naomhaibh,—gu 'm biodh ni-éigin, eadhon dhiubh sin, air an cur an céill 's a' Marbhrann so.

Mar mlinisteir 's an Eaglais, is cothromach dhuinn a ràdh gur h-ann a bha Mr. Caldair mar *reul*, a chithear a' dealradh thar chàch a tha timchioll oirre 's na speuraibh. Shearmonaich e Iosa Criod, agus Esan air a cheusadh. Mar nach do sheachain e uile chomhairle Dhé fhoill-seachadh do a luchd-éisdeachd, mar sin mar an ceudna, b' e *Gràdh Chriosd*, os ceann gach teagaisg eile, anns an robh a thlachd. Fhuair an gràdh sin comas-riaghlaidh ann an uile bhuadhaibh 'anama féin, agus bha e mar air a cho-chumadh le cumhaclid a' ghràidh sin, air a leithid do dhòigh, agus gu 'm faiceadh tu a ghnàth an

duine caomh mar fo làn-uidheam, gu bhi 'g a chur an céill. Is ann a chuir an gràdh so a chliu gu h-iomlau ann an riochd agus ann an cumadh a bha sònruichte do rìreadh. Is ann 's a ghràdh sin a bhà brigh agus blas agus ùghdarris a shaothairean agus a theagaisg. Is ann mar so a chuir gràs air a shiubhal, mar shoitheach taghta, an ni leis an d' fluaireadh a leithid do fhar-suingeachd buaidhe 'n a theagasg do anamaibh, fo a mhiniestreileachd, agus an so, tha eisimpleir air a cumail a mach fa choinneamh an Ughdair agus a bhràithrean uile, ma 's àill leo bhi glic a chum anama dhaoine a chosnadh do Chriosd.

Mar dhuine a bhà gun teagamh do àireamh nan naomh, is leòir a ràdh, mar bha a thugse làn-shoilleir anu an uile theagasgaibh na diadhachd, agus mar shcarmonaich e iad uile gu dileas agus gu cothromach, mar sin mar an ceudna, gu 'n robh a ghiùlan féin agus 'uile chaithe-beatha a reir a theagaisg, agus 'imeachd 's a ghiùlan anns gach dàimh, 'n an dearbhl-eisimpleir leis an robh firinn a theagaisg air a daingncachadh, eadhon an làthair an t-saoghail.

Cha ruig an t-Ughdair a leas bhi ag ainmeachadh ciod e a thug air, an t-iomradh a tha 's a Mharbhrann so a chur ain fonn. Thug an Cruithfhear uile-ghlic cluais-cbiùil do 'n duine; agus ged 'eil an tiодhlac sin air a mli-naomhachadh 's air a mli-bhuiileachadh leis an t-saoghal, gidheadh tha taitneas do anamaibh a fhuair càilcachd spioradail, iomradh air nithibh spioradail bhi mu 'n coinneamh 's a' chumadb so; agus a measg co-luchd-dùthcha an Ughdair, a fhuair an tiодhlac, dh'iarradh e a chum an leas, gur h-ann mu nithibh fiughail, agus cubhaidh do 'n diadhachd, a ghnàtbaichteadh an tiодhlac leotha. Agus a thaobh na càinain, tha fios aig an Ughdair gur h-i a 's roghuaiche

leis a' chuid mhòir dhiubh-san gu h-àraidh do 'n do shearmonaich Mr. *Caldair*, agus aig an robh, iomadh là, dùrachd an anama mar an crochadh r' a bhilibh. Is ann air an sgàth-san gu sonruichte, agus a chum an leas, a thugadh an oidhrip so leis an ùghdair, agus e bli mar fhiachaibh air an leas sìorruidh a shireadh air gach dòigh, mar dhream air son am feum e freagradh a thabhairt, eadhon air son an anamaibh, ann an là an Tighearn Iosa. Ged tha fios aig an ùghdair nach 'eil a shaothair ach neo-iomlan do rìreadh, agus nach 'eil cliù Mhr. *Caldair* aca ach gu mi-choimhlionta 's a' Mharbhrann, gidheadh tha e an dòchas, gu 'm faighear leo ann ni-éigin bhios 'n a thaitneas agus 'n a bhuannachd dhoibh, 'n uair bheachd-sinuainicheas iad, tre 'n mheadhon so, air teagasc agus air cliù a tha gràdhach do rìreadh dhoibh; agus gu 'm feud "an ceud gràdh" bhi air 'ath-bheothachadh. Agus is e iarrtus dùrachdach an Ughdair as an leth-san, ann am bannaibh a' ghràidh, agus as leth nan uile a gheibh na rainn so bhi aca 'n an làmhaibh no 'n an cridhe, no 'n am bilibh, gu 'm biodh iad air am beannachadh dhoibh leis an Tighearn.

Cha 'n 'eil aig an ùghdair a nis ach a thoirt fainear 's a chur an céill do 'n luchd-leughaidh, gu 'm bheil 's a' chlòdh-bhualadh so mearachdan a' chlòdh-bhualaidh roimhe air an ath-leasachadh; gu 'n d' oidhripich e siubhal nan rann dheanamh ni 's mìne na bha iad; agus gu 'm bheil rainn ùra air an cur a stigh leis, nach 'eil r' am faotainn 's a chlòdh-bhualadh mn dheireadh.

'S an Toiseachd, Ceud mios a' Gheamhraidh,
's a' Bhliadhna, 1846.

MARBHRANN, &c.

EARRANN. I.

A bhàs 'n a aobhar bhròin do iomadh—A chliù feumail
r'a chuimhneachadh—A dhol a steach do'n fhìonain
—A bheath', a theagasc, 's a shaothair innte gu
crioch a làth'.

I.

FHUAIR sinn an sgeul bha dubhach brònach,
Fhuair sinn an sgeul a lot 's a leòn sinn,
A chuir o aighear sinn 's o cheòl,
'S gach neach d' am b-eòl na chaill sinn.
Is fada farsuing chaidh an sgeul ud,
Feadh Alba, Shasuinn, agus Eirin;
A' frasadhl teann a saighde geur',
'S a' tabhairt léir na h-oidhch' leath'.

II.

Is e rinn dubhach sinn, is àireamh,
 'S e rinn sinn muladach is cràiteach,
 G' an d' thugadh uainn ar 'n aodhair àill',
 'S e Maigh'stir TEARLACH CALDAIR!
 Is nach cluinn a chaoidh sinn o 'n bheul ud,
 Fior iomradh binn a Chroinn-cheusaidh;
 A theangaidh 'n diugh fo ghlais an Eig;
 'S e sud, a Dhé, ar 'n ionndrain!

III.

'S ann 'chuir an sgeul an dubhar ceò sinn;
 Oir theich an Reul, is dh' iath na neòil oirnn;
 Is thug i uainn ar neart 's ar treòir:
 'S e 'n TOISIDHEACHD tha cràiteach!
 Tha cuid co domhain chaith a leòn leath',
 A thaobh an ceangail ris gu sònruicht',
 'S nach creid gu faigh, an taobhs' do Ghlòir,
 Na ni an leòns' a chàradh!

IV.

Ach cumadh dlùth iad ri Fear-saoraidh;
 Oir a ghràdh-san chaoidh cha chaochail;
 'S tha 'n gràdh ud dhoibh-sa 'n diugh co saor
 'S an trà bha 'n aodhair àill' ac'.
 Is gabhaidh e, gu gràsmhor, cùram
 Do 'n chuid, 's an àm, tha sàruicht' ciùirte
 Seadh bithidh e dlòibh mar Fhear-an-rùin
 'S mar charaid 's dlùith' na Bràthair.

V.

A THEARLAICH ionmhuinn, mhic na h-àille !
 Cha 'n iognadh dhuinn an diugh bhi cràiteach
 Gu 'n tugadh thusa uainn le bàs,
 'S gu 'n chàraicheadh 's an ùir thu :
 Oir chaill sinn annad-sa am Buachaill,
 Leis an do stiùireadh sinn gu buadhach,
 A dh' ionnsuidh ionaltraidh ro bhuan,
 Is cluaine glas a' chùmhaint.

VI.

Is cha 'n e Buachaill gnàth'cht a chaill sinn,
 Ach neach air càch thug barrachd soillse,
 Mar an Reult an àird na h-oidhch' ;
 Bheir barrachd soills' thar àireamh.
 Oir 's gann gu faighteadh measg nan ceud leinn,
 Do fhìor luchd-iùil os ceann nan treud ac',
 An neach a thigeadh suas ris féin,
 An altruim treud', 's an' àrach.

VII.

Oir anns an là 'n do chaill sinn TEARLACH,
 'S e chaill sinn Athair agus Bràthair ;
 Seadh, caraid dlùth is fear-ar-gràidh ;
 B'e sud ar latha cianail !
 Is ged is cunnart dhuinn bhi g' àicheadh
 Gu 'n dean ar ceannard, suas a' bheàrns' dhuinn,
 Tha cuid nach faigh, gu uair am bàis,
 An neach ni t-àits' a lionadh.

VIII.

'S a' bhliadh'n' ochd ceud dha-dheug is mile,
 Is beagan là'i' an déigh Fheill-micheil,
 Rinneadh a' bhearn ud ann ar sgìr'!
 Cha di-ch' nich sinn gu bràth i!
 Och a BHAIS! 's beag t-iochd 's do thruas ruinn,
 A shàth do shaighead ann ar Buachaill,
 A rinn 'n an dilleachdaibh an sluagh s',
 'S mar Uain a chaill am Màthair!

IX.

Ged thugadh uainn thu, 'bha t-fhear-Iùil dhuinn,
 'S nach ruig ar luaidh ort, no ar cliù-ne,
 Is toigh leinn fathasd a bhi 'g ùrach'
 A chliù a fhuair sa thoill thu.
 Oir feudaidh sud bhi n' fhàile cùbhraidih
 Do iomadh anam 'n diugh tha brùite;
 'S thaobh muinntir eile dh' fheudt' g' an dùisg
 Gu cùram mu 'n staid chaillt' iad!

X.

Is fada farsuing chaidh do chliù-sa,
 Mar àile spiosraidh bhlasd' is chùbhraidih;
 Ach fad mar sgaoil e feadh nan dùth'ch,
 Do chliù-s' gu léir cha chual iad.
 Oir chuir thu folach na féin-àicheidh,
 Riamh air do chliù 's do bhuidhibh àluinn;
 Cha 'n fhac thu féin iad fad do là,
 'S cha 'n fheudadh càch an luaidh riut.

XI.

Ach dh' aindeoin folach dian na sgàil' ud,
 'S ann 'bhris a mach o là gu là iad
 Leis ni 's mò a mhais 's a dh' àill',
 Mar ghathan blàth na Gréine.
 Is tha iad lionmhor feadh na dùth'ch-sa,
 Tha 'g iarraidh chreidsinn le an dùrachd,
 Nach téid air dhi-chuimhn' dhoibh do chliù-s',
 No 'n t-àile cùbhr' 'na dhcigh-san !

XII.

Ach cha 'n e cliù, no onoir dhaoine,
 Cha 'n ainm no urram ta o 'n t-saoghal,
 Airson 'n do bhuilich thus' do shaoth'r;
 B' iad nithe faoin nach b' fhiach leat.
 Ach cliù is onoir an Fhir-shaoraidh,
 Is toradh buadhach, buan, a Ghaoil-san,
 Bhi soirbheachadh an an'maibh dhaoin',
 Mar shaothair anam Chriosd annt'.

XIII.

G' am faiceadh Es' 's g' am bitheadh sàsuicht',
 A chionn a shaoithreach anns a' GHARADH,
 Na peacaich thruagh' a thoill am bàs,
 Da ghràsa-san bhi strìochdadadh;
 'S gu 'n cuirteadh air-san crùn an slàint'-san
 Mar a b' fhiù e, is mar is dàn da;
 'S a chrùn mar sin gu buan bhi fàs:
 Sud àilghios 's mò a dh' iarr thu.

XIV.

Na 'm bitheadh Gràs a' dol ri dùchas
 Co na thusa bu mhò a b-fhiù e?
 A thainig nuas o fhìor luchd-Iùil,
 Bha cliùiteach riamh 's an fhònain;
 Ach ged nach 'eil e dol ri dùchas,
 Thigeadh do Aithrichibh bhi 'g ùrnuigh;
 Oir feudaidh 'n toradh sud mar dhrùchd
 Bhi drùthadh air an Iarmad.

XV.

Fhuair thusa dheth an spiorad cheudna,
 Leis an robh iadsan air an éideadh,
 Seadh, tomhas saoibhir fad do ré,
 Rinn feumail dhuinn do shaothair:
 Oir Es' a choinnich riut am Beteil,
 Mar ri Iacob an tir a cléine,
 Cha d' fhàg thu tuilleadh is cha d' thréig,
 Ri fad do ré 's an t-saoghal.

XVI.

'S mar fhuair thu gràs a bha neo-chumaint,
 Bha agad pàirtean bhàrr air iomadh,
 Is buaidhean nàduir thug an t-urram,
 Air iomadh bha ro-ainmeil;
 Seadh, tuigse luchdmhor, gheur, is shoilleir;
 Is toil ro-èasgaidh, 's inntiùn fhlathail;
 Aigneadh bhlàth, is cuiniline thogail,
 Is coguis bha ro-anmhunn!

XVII.

Is sin, 'n a àit', a tha ri mholadh,
 Mur deanar tàir leinn air no milleadh;
 Fhuair thu foghlum rinn thu innealt',
 Mar Inneal 'n làimh t-Fhear-saoraidh;
 'S maille ri buadhaibh gràis is nàduir,
 Fhuair thu cumadh Pears' ro àluinn,
 Is aghaidh mhaiseach, fhaoilteach, àill',
 Bha nochdadh blàth's do ghaoil-san.

XVIII.

Do theagascg riamh bha réidh, is còmhnaid,
 Is brioghail, soilleir, sèimh, is òrdail;
 'S gach earrann dheth an sult 's an seòl,
 'S a' còrdadh grinn ri chéile:
 Bha uile bhriathran binn do bheòil-sa,
 'Chaoith air an taghadh leat co seòlta,
 'S gu 'm feudt' an t-aithghearr 'n cur an' clò;
 Is b' e sud deòin luchd-éisdeachd.

XIX.

Is choisinn sud dhuit ainm is urram,
 Air feadh nan àite-s' o gach anam;
 Cha robh ann cuideachd riamh no comunn,
 Nach tugadh urram 's àit' dhuit.
 Bha thusa ainmeil aig na h-uaislibh;
 Oir bu tu féin am fìor dhuin' uasal,
 Chunnaic iad annad brod nam buadh,
 A bhuanach cliù is àgh dhuit.

XX.

Ach 's i 'n obair ghrinn rinn Criod air t-anam,
 A rinn do theagasg dhuinn 'n a bheannachd;
 Thug sud do phàirtean, 'bha ro-aithnicht',
 Fo tharruing buaidh a Ghaoil-san.
 Chuir sud thu mach an ainm do Cheannaird,
 Dh' iarraidh na Céile rinn e cheannach,
 Is mar an t-Elieser beannaicht',
 G'a tabhairt gu Fear-saoraidh!

XXI.

Cha deach' thu mach mar chuid 's an làth-sa,
 Tha meas gur leòr dhoibh gairm a' Phatroin,
 A rinn ar Sion lom is fàs!
 'S luchd-sàruchaiddh an treud iad.
 Oir mu 'n do ghabh thu dreuchd an aodhair',
 Fhuair thu gairm o Dhia 's o dhaoinibh;
 Is cheangail sud an còrdaibh gaoil,
 Do sgìr' is thus' r'a chéile.

XXII.

A' mheud 's a ruith gun òrdugh Chriosd ac',
 'S nach e 'Ghlòir-san tha iad a g' iarruidh,
 Dh' innis 'fhocal dhuinn, 's is fior,
 Nach tabhair Dia a ghnùis doibh.
 Chaidh thusa mach air gairm Fir-saoraidh,
 Le luchd do bheannachdaibh na saorsa;
 Is bheannaich Easan d' obair chaomh,
 Mar Aodhair rinn thu cliùiteach.

XXIII.

Is bha thu saoithreach fad do shaoghail,
 A measg chlann-daoin' á leth t-Fhir-saoraidh,
 A' nochdadadh mach dhoibh seòl na saors',
 'S an GAOL thug gin is fàs da.
 Ach bha thu teagasg mar an ceudna,
 Ar tuiteam bhrònach ann an Eden;
 A thug gach leòn is cràdh is péin,
 Gu léir, air gineil Adhaimh;

XXIV.

A dh' fhàg 'n an luidh' iad an staid nàduir,
 Fo chumhachd peacaidh 's innleachd Shatain;
 Fo mhallachd Lagh' is binn a' bhàis,
 Gu bràth, gun chomas éirigh.
 Is iad gun sùil a ghabhadh truas riu,
 Agus gun ghàirdean bheireadh fuasgladh;
 Mur tugadh Slànuighear nam buadh,
 A bheatha suas mar EIRIC!

XXV.

Is chuir thu 'n céill mar chaidh an seòl ud
 A chur air chois le Dia, 'n a thròcair;
 Is anns na nochd e mach a Ghlèir,
 Gu sònruicht' ann an Criod dhuinn.
 'S mar rinneadh Es' do mhic nan daoine,
 Le ar Dia, ann an' doimhn' a Ghaoil-san,
 'Na Ghliocas, Fhireantachd, 'n a Shaors',
 'S 'na Noamhachd iomlan shìorruidh.

XXVI.

O, bha thu teagasg dhoibh a' Ghaoil ud,
 A thug Ios' do anamaibh dhaoine;
 'S air an d' thug e 'n dearbhachd chaomh,
 'N trà shaothraich e 's a' Ghàradh.
 Bu ghaol e sud cho dian 's cho lasda,
 'S nach robh e 'n comas ni cur as da,
 Cha b' urrainn lasraichean a chasg',
 No tuiltean uisg' a bhàthadh?

XXVII.

Gu 'n d' thugadh Iosa gràdh co làidir,
 Do pheacaich thruagh' do ghineil Adhaimh,
 'S g'am fuilingeadh e 'n an riochd am bàs,
 Seadh, bàs a' Chroinn-cheusaidh;
 Chaidh sud thar comas tuigs' is luaidh leinn;
 Cha tuig na h-Aingil 's àirde shuas e;
 R' a thomhas-san bhiodh dhoibh mar chuan,
 A shluigeadh suas an *Reuson!*

XXVIII.

B' e sud an gaol a bha air t-aire,
 'S as an d'òl gu domhain t-anam,
 'S bu tric thu leis, co-mòr cur thairis,
 S Gu 'n theirig comas luaidh dhuit.
 Cha deach' an gaol ud á do shealladh,
 Ann an àithn' no 'n gairm no 'n gealladh,
 Ann an achmhasan, no 'n cuireadh,
 A chur thu 'n céill do 'n t-sluagh-sa.

XXIX.

Is fhuair thu tàlann air mhodh àraid,
 Bhi tarruing pheacach leat 's g'an tàladh,
 Le còrdaibh buadhach caomh a' Ghràidh,
'S E GRADH a' CHROINN-CHEUSAIDH
 B'e an crann-ceusaidh t-àite seasaimh ;
 Is chuir thu 'n céill as sin do pheacaich,
 Gur ann an sud bha ac' gach fasgadh ;
 Is teasairginn o 'n léir-sgrios !

XXX.

Oir 'n tèarnadh pheacach, air mhodh sònruicht',
 'N sud choinnich Ceartas agus Tròcair,
 Is uile Bhuidhean Dhé na Glòir',
 Is phògiad beul ri beul ann.
 Oir sheas ri Ceartas suas am Buachaill,
 Le 'chlaidheamh laist' a mach á 'thruaill aig' ;
 Is ghiùlain gaisgeach treun nam buadh,
 Trom-bhualadh chlaidheimh ghéir ud.

XXXI.

A leith'd do Choinneamh riamh cha chualas,
 A leith'd do Obair riamh cha d' fhuair iad ;
 Seadh, onoir Diadhachd chumail suas,
 Is peacaich thruagh' a shaoradh ;
 Am peacadh nochdadhl mach 'n a uamhas ;
'S an fhearg a thoill e shlugadh suas dhuinn ;
 Is Dia bhi nochdadhl iochd is truas,
 Gun truailleadh air a Naomhachd.

XXXII.

Is ann an sud fhuair Ceartas dìoladh ;
 Is ann an sud fhuair Lagh co-lionadh ;
 Is ann an sud fhuair buaidhean Dhia,
 An riarachadh bha òirdheirc :
 Is ann an sud chaith 'n Eiric ìocadh,
 A cheannaich beath' 's a phàigh na fiachan,
 Is ann an sud a choisinn Criod
 Ar saorsa shìorruidh ghlòrmhor !

XXXIII.

O, b'e sud crìoch na h-uile ìobairt ;
 Is b'e sud brìgh na h-uile fìrinn ;
 Is b'e sud seadh is suim gach ni,
 Air feadh a' Bhìobuill ghlòrmhoir ;
 Is b'e sud claoïdh is creach an t-Satain ;
 B'e sud léir-sgrios uaighe is bàis dhuinn :
 Seadh, b'e sud fosgladh tobair slàint',
 Is Phàrrais féin fa-dheòidh dhuinn !

XXXIV. -

B'e sud an fhuil 's an robh an éifeachd,
 A choisinn sìth dhuinn agus réite,
 'S an là ud anns an d' thug i éigh',
 An cluasaibh Dhé na tràcair :
 Air sgàth an tog e dhinn gach mallachd ;
 'S an toir e dhuinn gach uile bheannachd,
 'S an cuir e sinn an sealbh air 'sonas,
 'N a Ionad bheannaicht ghlòrmhor.

XXXV.

Ach 's ann an sud fhuair TRÒCAIR dorus
 Tigheachd a mach gu clann na h-ainnis ;
 'S o 'n ionad ud, do ghabh i 'turus,
 Le comas bhi 'gan tèarnadh :
 'S o 'n turus ud cha phill i tuilleadh,
 Gus am faigh na tha i sìreadh ;
 'S gus an dean i clann a' mhillidh,
 A philleadh steach gu Pàrras.

XXXVI.

'Se 'n Crann-ceusaидh anns na buaidhibh s' ;
 'Chuir thus' an céill gach là do'n t-sluagh-sa ;
 Is fhuair thu léirs' air, 's comas luaidh,
 Rinn buadhach dhuinn an t-iomradh.
 Oir nochd thu Criosd dhuinn air a cheusadh,
 Mar ar 'n ALPHA is Oméga,
 Ann an cùmhnant sìor na réit' ;
 'S mar chomhairl' Dhé gu h-iomlan :

XXXVII.

Mar am fasgaidh dhuinn o' n doinionn
 —Mar ar dìdean bhuan o chorruich
 —Mar an t-siochaint do ar coguis
 —S' mar oladh do ar leòntaibh
 —Mar an Fhìreantachd a dh' éideas
 —Mar an Naomhachd chuireas sgèimh oirnn
 —Mar an iocshlaint do gach creuchd
 —'S mar uisge sèimh ri òl dhuinn

XXXVIII.

- Mar an solus chum ar stiùiridh
- Mar ar comas chum gach ùmhachd
- Mar bheath', is mais', is àile cùbhr'
- Ar giùlain is ar gniomh'ra
- Mar an lòn a chumas beò sinn
- Mar ar ceòl an àit' ar bròin dhuinn
- Mar ar neart, ar taic, 's ar treòir
- 'S ar bunait dhòchais shìorruidh

XXXIX.

- Mar ar sgàil o theas na Gréine
- Mar ar blàth's o fhuachd ar céine
- Mar ar sgiath o shaighdibh geur
- Ard-namhaid Dhé 's ar sòlais
- Mar am bàs do dhuin' an eucoir
- Mar gach gràs an àm ar feum duinn
- 'S mar uile lànachd bhuan ar Dé,
- Chaidh thar gach léirs' is eòlas!

XL.

Thubhairt Criod an làithibh chuairt ruinn,
 “ Agus mis', ma thogar suas mi,
 “ Tàirngidh mi na h-uile sluagh,
 “ Le buaidh mo Chroinn-ceusaидh,”
 Lean thus' an riaghailt ud, a THEARLAICH ;
 Oir chuireadh Criod mar Fhear-do-ghràidh leat,
 Air crann soisgeil sìor nan gràs,
 A suas gu h-àrd, mar dh' fheumadh.

XL.I.

Rinn sud do theagastg dhuinn ro bhuadhach;
 O chuir e brìgh ann, 's chuir e snuadh air;
 Seadh, rinn e binn e do ar cluais,
 'S 'n a fhuaim bha dhuinn' ro-aoibhneach.
 Is fhuair sinn dearbhachd annainn féin air,
 Gur e seirm a' Chroinne-cheusaidh,
 A thairngeas peacaich dh'ionnsuidh Dhé;
 Oir 'éifeachd-san tha saoibhir.

XL.II.

'S mar earrann mhòr do sheòl na slàinte,
 Thugadh glòdir, is meas, is àit, leat,
 Do SPIORAD NAOMH nan uile ghràs,
 Chum càraidh ruinn na saorsa.
 'S e 'n Spiorad Naomh 'n a fheartaibh glòrmhor
 Air clann nan daoin' bhi air a dhortadh,
 A chuireas iad gu gul is bròn,
 'S a nochdas GLOIR Fir-saoraidh.

XL.III.

Oir dh'ungadh Criosd le uile lànachd
 Spioraid Dhé, is ghabh e tàmh air;
 A chum gu'n deantadh clann a' bhais
 'N an luchd comh-pàirt d'a shaors-san.
 B'e féin ar sagart is ar'n Aaron,
 Air an do dhòirteadh 'n oladh thlàth ud,
 A' ruith air feadh a chuirp' gu slàn,
 'S a ràinig iomall 'eudaich.

XLIV.

'S mar dh' ungadh Esan leis gu saoibhir,
 'S ann chum seirm na naidheachd aoibhnich.
 Do 'n mhuinntir mhacant, bhochd, is chailt',
 A thoill bhi mach gu sìorruidh;
 Chum fuasgladh thabhairt do na braighdibh,
 Is dol a mach gu'n daingneach làidir,
 Do na bha fo chuibhreach bàis,
 'S bha 'n sàs an tigh' a' Phriosain.

XLV.

Is fòs, a chum, mar shagart truacant',
 A bhi, gu faicilleach 's gu buadhach,
 'Ceangal nan cridhe briste suas,
 A fhuair an leòn 's a' ghàradh.
 Seadh, le a Spiorad dhòrtadh nuas orr',
 Gu 'n stiùireadh chum na fola luachmhoir,
 Far am bheil ioc-shlaint 's am bheil buaidh,
 'S bheir leighis buan 'is slàint leath'.

XLVI.

Oir cha chreid peacaich chailt' an truaighe,
 Cha ghabh ri Criossd 's cha'n iarr a shuaimhneas,
 Gu 'n tig an Spiorad ud a nuas:
 Is truagh iad a ni tàir air!
 Ach is e gealladh saor IENOBHAN,
 Do uile oighreachaibh na Glòire,
 Gu 'm bi a Spiorad dhoibh 'n a threòir,
 S 'n a chòmhnhadh tre an fhàsach:

XLVII.

Gu' m' bi e dhoibh 'n a spiorad gliocais,
 'N a spiorad saors', is beath, is tuigse,
 'N a spiorad ùrnuigh, gràis, is iochd,
 'S 'n a thobar uisge bedò annt'.
 Gu 'n dean e Teampuill do ar Dia dhiubh,
 'S am bi a thlachd 's a chòmhnuidh shìorruidh.—
 Bhi seirm mar sud dhuinn Ungadh Chriosd,
 B' e sud do mhiann 's do shòlas.

XLVIII.

Ach ann an seirm an t-soisgeil bhudadhaich,
 Bu tu bha dileas, treun, is truacant';
 A' cur an céill do pheacaich thruagh,
 Uil' uamhasan an Tighearn'.
 Cha 'n fhacas teachdair riamh bu ghéire,
 A sheirmeadh trompaid lagha Dhé dhoibh,
 'S a chuireadh 'n cunnart dhoibh, gu leir,
 An céill an tearc do bhriathraibh.

XLIX.

Och, tha iad ann a ghlaodlias léir-sgrios,
 Seadh mallachd lagh', is corruiich Dhé dhuinn,
 Ach 'thaisbeanas g' a bheil iad féin,
 Gun iochd, gun spéis, gun truas ruinn.
 Cha b' ionnan dhoibhs' is dhuitse, Thearlaich;
 An cur an céill ar call' s ar gábhaidh;
 Se t-anam féin a bhiodh 'n sás,
 Is chithteadh gràdh na d' ghruaim ruinn.

L.

Ach cha bu leòr leat dhoibh' bhi 'g innseadh
 Mhàin sgeula bhrònach staid an dítídh;
 Nochdadadh tu mach dhoibh slat na sìth,
 Is cuireadh saor nan gràs dhoibh.

'S ged robh am peacanna do-àireamh
 Is dearg mar chorcur no mar scàrlaid
 Gu 'n robh am feartaibh fuil na slàint',
 Na bha gu leòr gu'n tearnadh:

LI.

Ged dh' éireadh suas mar bheannta àrd iad ;
 'S ged robh cho lionmhor iad, an àireamh,
 Ris gach duilleach riamh a dh' fhàs,
 Is gaineamh tràigh na fairge,
 Gu 'n robh ann an cuan fola Chriosd dhoibh,
 Na dh' fhol'cheadh 'n t-iomlan dhiubh gu sior-
 ruidh ;
 'S ni's mò a Ghàidhleas le sin aig Dia,
 Na dioladh ghabhadh fhearg dhiubh !

LII.

Bu liomhlor tromraigheach agus gràineil,
 Peacanna mhìlte 'n diugh tha'm Pàrras,
 Mhanaseh, Mhagdalein is Phoil,
 Is àireamh as an déigh-san ;
 Ach fhuaireadh leo-san uile tròcair,
 Tre bhuaidh na cuan chaidh a dhòirteadh ;
 Is tha i 'n diugh cho blà 's cho beò,
 'S 'n tra dhòirteadh bharr an t-sléibh' i !

LIII.

Is cuimhne leinn na h-àman prìseil,
 'S an robh thu tairgse dhoibh Fear-saoraidh,
 'G a nochdadadh mach na uile shaors',
 Gu saor mar thiodhlac Dhé dhoibh :
 'S gach neach n'am measg nach tugadh gràdh dha,
 Gur ANATEMA MARANATA
 —Mallaicht' gus an dara bàs—
 A' bhinn a dh' fhàg e féin orr.'

LIV.

Ach ann an seirm an t-soisgeil éibhinn,
 Bu ghlan a bheathaicheadh an treud leat;
 A' tabhairt dhoibhs' an cuibhrinn féin,
 A chuireadh gleus is fonn orr';
 Oir drùchd na nèimhe bha air t-anam,
 Is blaths' a' ghaoil a bha o t-anail,
 Bha gu tric g'an deanamh geanail,
 Is togail cridhe trom dhiubh.

LV.

Is tric a chual iad uaits' an fhuaim ud,
 A bheireadh leaghadh air an cruas doibh,
 A chuireadh 'n teicheadh air an gruaim,
 'S an ruaig dhoibh air an naimhdibh.
 B' i sud an fhuaim bha dhoibhse milis,
 A bheireadh beath' 'n a cois, is solus,
 'Chuireadh annta lùth, is comas,
 Is thogadh aog a' bhàis dhiubh.

LVI.

Gheibheadh na doill an' sin am fradharc—
 Is gheibheadh leôntaich thruagh an leigheas,—
 Gheibheadh cridhe reòt' a leaghadh,
 Air an do luidh an geainhradh—
 Bhiodh na spioradan bha cianail,
 'S bhiodh na comasan bh' air crionadh,
 'Cur a mach am blà mar fhigeis,
 Is iad fo Ghrian an t-samhraidh.

LVII.

Is gann gu 'n cualas neach a riamh leo,
 Bu ghrinne luaidheadh 'n coran diomhair,
 Le leith'd do sholus is do rian,
 'S am briathraibh deas, d'an réir-san :
 Na nithe bha 'n an cridhe folaicht',
 'S bha dhoibh-san deacair is do-bhreithnicht';
 Bhiodh dhoibh sud soilleir, aithnicht',
 'N tra chluinneadh o do bheuls' iad.

LVIII.

Is fhuair thu inneal air mhodh sònruicht',
 Bhi labhairt saors', is beath', is sòlais,
 Ri iomadh bha fo ghruaim 's fo bhròn,
 'S fo leòn a measg an t-sluaigh-sa:
 Oir 'n tra bha 'n trompaid òir 'n a siubhal.
 'S na feartain glòrmhor orts' a' sruthadh,
 Philleadh bròn is deoir gu subhaich',
 'S ar dubhaich' ghabhadh 'n ruaig uainn.

LIX.

Ach 's e rinn fuaim na trompaid feumail,
 'S e a chuir toradh ann do sgeul dhuinn,
 Cumhachd Spioraid Naoimh ar Dé,
 Bhi 'n cois na sgeula 'luaidh thu.
 'S tra tha sinn 'g aideachadh na h-éifeachd,
 A bha 'n ad theagasc fad do ré dhuinn,
 O, thugamaid a' Ghloir, gu léir,
 Do Spiorad Dhé 'chuir buaidh ann?

LX.

Bu tu bha ealant' anns' an fhìrinn ;
 Bu mhòr do sholus mar fhear-mìnich
 A' deanamh mach dhuinn seadh is brìgh,
 Gach ni, na h-ionnais luachmhoir
 Bu shoilleir aithnicht' do gach seòrs' e
 Gur iad teisteis naomh ЈЕНОВИАН
 A bha dhuit féin 'n am beath, 's 'n an tredir,
 'S 'n an ceòl, an' tigh do chuairt' dhuit.

LXI.

Bha 'n leabhar naomh ud dhuit mar speuran,
 'S an robh thu 'g amharc glòir na GREINE,
 A dhealraich air a' chruinne-ché,
 Le léirs' is blaths' na sgiathaibh.
 Chuir sud dhuit solus air gach firinn
 Leis am fac thu — fad a' Bhìobuill,
 Gach samhl', is eachdraidh, agus ni,
 Am brìgh-san g' am b' e Criosc e.

LXII.

B'e sud an raon 's an robh thu làmhach,
 'A tional dhias o là gu là ann.
 Tre an robh t-anam faigheil sàth,
 'S i 'n t-sàbaid dheanadh sgeul air !
 O, fhuair thu 'n t-ionmhas anns an raon ud,
 A tha an cleith air iomadh aodhair,
 'S air nach ruig neach do chlann nan daoin' ;
 Mur saothraich Spiorad Dhé orr'.

LXIII.

Bu tric a gheibht' thu ann do sheòmar
 'S a' tagradh dlùth aig caithir Thròcair,
 Ag iarruidh beath' dhuit féin—is lòn,
 Chum cumail beò do threud-san
 Oir 's ann gu minic air do ghlùinibh,
 A bha thu sealbhachadh an drùchd ud,
 A rinn do theagasg beathail, ùr,
 Is cùbhraidh, fad do ré dhuinn.

LXIV.

Is ann an deasachadh an lòin leat,
 'Bheathaicheadh oighreachan na tròcair,
 Is tu bha saoithreach fad do bheò—
 Do sheòmar togadh fianuis !
 Seadh, b'ionann dhuitse is do Dhaibhidh,
 An tairgse suas na h-iobairt chràbhaidh ;
 Bhi tairgse ni gun luach gun stà,
 Do 'n Ti a 's àird', cha d' iarr thu.

LXV.

Bha thu ri dìchioll agus saothair,
 Mar g' an tèarnta' anama dhaoin' leo;
 Is bha thu air t-aicheadh dhoibh gu saor,
 Mar nithibh faoin gun luach annt',
 Mar dh'innis Solamh dhuinn 's an fhìrinn,
 G' an deanar beartach làmh an dichill';
 Bha sud dhuinn mar gu'm bitheadh sgriobht',
 Air d' obair phriseil bhuadhachs'.

LXVI.

Bu charaid dìleas anns' a Chléir thu,
 A sheasadh dian air taobh an Treuda;
 Is dhoibhsan riamh nach d'thugadh géill,
 A bheireadh beum is leòn dhoibh.
 Is ged a thugadh buaidhean Uain duit,
 Is gu 'm bu mhiannach leat bhi suairce;
 'S ann chitft' an sud thu seasamh suas,
 Le buaidhibh treun an Leomhain.

LXVII.

Bha riamh thu truasail ris na feumnaich,
 Is maoineach, toirbheartach, mar dh' fheumadh;
 Cha b'aithne riamh dhuinn ach do chéil',
 A measg nan ceud', thug bàrr ort';
 Bha thus' is ise beò 'nar measg-ne,
 Mar shruthaibh sèimh an tobair uisge;
 Comhpairteachadh 'ur maith's 'ur 'n iochd,
 Ri bochdaibh gràis is nàduir.

LXVIII.

Ach cha robh dleasdanas bh' air iarruidh,
 Anns gach dàimh is dreuchd a lion thu,
 Nach robh, gach là, thu 'cur an gniomh ;
 Sud fhianuis air do chàirdibh.

Cha 'n ann anteagascg'mhàin no'm briathraibh,
 Bha thusa nochdadadh beath'na diadhachd ;
 'S ann bha i sruthadh tre gach gniomh,
 Rè fad do bhliadhn' 's an fhàsach.

LXIX.

Tha iomadh ann a ghlaodhas gniomh'ra,
 Seadh, mar na h-uile anns an diadhachd,
 'Nan teagascg tioram, fuar, is blion,
 'S 'nan gniomh'raibh féin g' a h-àicheadh ;
 Ach 's e chuir mais' dhuinn air do bhriathraibhs'
 'S a rinn do theagascg dhuinn ro-sgiamhach,
 Gu 'n robh thu nochdadhbh leis a' ghniomh,
 Gu' m b' fhior na bha thu 'gradb ruinn.

LXX.

Oir toradh 'n Spioraid Naoimh is ghràsmhoir
 A ghabh gu saoibhir fois is tàmh ort,
 Bha cur a mach a shnuaidh sa blà,
 Gach là dhuinn an do ghniomh'ribh.
 Is choimhid sud do chliùs' co slàn dhuinn,
 'S nach d' fhuaireadh coire dhuit le d'naimhdibh,
 Ach, (mar do Dhaniel 'na làth-s,)
 A mhain airson do dhiadhachd.

LXXI.

O, be do cheum-sa ceum an fhìrein,
 Tha mar an solus dealrach fior-ghlan,
 A briseadh 'mach 's a' fàs, gu fior,
 Gu latha sìor na Glòire !
 'S bha thu mar chraobh an tigh an Tighearn,
 Bha dosrach ùr is tarbhach riamh dhuinn ;
 'S an àm an d'fhàs thu aosmhòr liath,
 Bha sult is sgiamh gu leòr ort'.

LXXII.

'S e da-fhichead bliadh'n' ach a dhà dhiubh
 A mhealadh leinn do d' shaothair ghraidh-sa ;
 Is fad nam bliadhna ud 's nan là,
 Cha d' fhàs sinn idir sgìth dhiot.
 Tha cuid a theireadh — mur bu dàn e —
 “ Truagh nach d' fhuair sinn linn no dhà dhiot ” !
 Ach thug'maid cliù do Dhia nan gràs,
 Gu bràth g' an d' fhuair sinn linn dhiot.

LXXIII.

'S co luath' a chithear uisg air sléibhtibh,
 An aghaidh uchdaich suas ag éirigh ;
 'S co luath' a sguireas eòin nan speur,
 'S a' *Cheutan* do bhi seinn dhuinn ;
 'S a leigeas cuid á 'n cuimhne TEARLACH,
 'S a theaghasg sèimh tre 'n d' fhuair iad àrach ;
 Oir dh' ungadh e le drùchd nan gràs,
 'S a ha chuir bàs á 'n cuimhn' e'.

EARRANN II.

A ghiùlan aig na h-uairibh deireannach.—A chùram air-son na Sgìre.—A chreidimh 's a dhòchas aig àm a bhàis.—A shuaimhneas a nis an làthair Dhé.—Am bròn a tha air iomadh seòrsa as a dhéigh-san.

LXXIV.

Mar thug thu uile lài do shaoghail,
 Thairis do obair an Fhir-shaoraidh,
 'S gach tàlann, comas agus maoin,
 Chum anaman dhaoin' a thèarnadh!
 Ann adobair is d'-uile shaothair,
 Thug thu dearbhachd shoilleir chaomh dhoibh,
 Nach e cealg a bh'ann do ghaol—
 'S cha d'thraogh aig uair do bhàis e.

LXXV.

Oir anns' an uair ud chualas Tèarlach,
 A' glaodh' a mach le iolach làidir,
 An cathaibh geur is cruaidh a' bhàis,
 Ri 'chàirdibh bha mu'n cuairt dha;
 "O, rachainn tre na piantaibh sàruichts',
 "Fad mo bhliadhna rìsd 's an fhàsach;
 "Nan d'thugadh anam thoill am bàs,
 "Gu Slànuighear nam buadh e."

LXXVI.

Ged bha thu nis air bruaich na tire,
 Is lài do chuairt air tigh'nn gu crìch dhuit,
 Cha d'rinn thu dearmad air do dhìlseachd,
 Do d'sgìre ghuileach, bhrònach.
 Ach anns na mionaidibh mu dheireadh,
 Is leis an anail nis bha goirid,
 Ghlaodh thu mach le dùrachd spioraid,
 "Dia gu 'n ulluich lòn dhi!"

LXXVII.

'S mar bha do bheath' bha crìoch do là-sa,
 'N a dearbhachd làn air cumhachd gràis dhuinn;
 S an Slànuighear d' an d' thug thu gràdh,
 San t-sàs ud chum e suas thu:
 Is bhris thu mach fo bhuaidh a ghràidh-san,
 (Oir thainig tuil na mara làin ort),
 A'moladh Chriosd o d' leabaidh bhàis,
 Do chàirdibh bha mu'n cuairt dhuit.

LXXVIII.

"O, fhuair mi riamh (ars' thus), e dìleas !
 "Ach 's ann a nis a tha e prìseil ;
 "O, nach b'aithne do mo sgìr'
 "'N diugh prìsealachd an Uain-sa !
 "O gabhaibhs' ris a tha 'n staid nàduir,
 "Is gabhadh sibhs' a shealbhaich gràs ris ;
 "Tha 'phrìsealachd dhomh nis a' fàs,
 "Mar 's dlùith do bhàs is uaigh mi !

LXXIX.

An dol a steach do Iordan bàis leat,
 Bhitheas do chuid 'n a uisge bàthaidh,
 Cha robh do thaic air gnìomh no gràs,
 A rinn gu bràth, no fhuair thu,
 ,S ann chuireadh taic air lànachd Chriosd leat;
 Is be do dhòchas 'obair chriochnaicht-s';
 Chum dol a steach gu làthair Dhia,
 Is sìorruidheachd a shuaimhneis.

LXXX.

Am bas bha dhuits' mar charaid dìleas,
 'G ad chuireadh dhachaидh gus an tìr ud,
 Anns am meal an t-anam sgìth,
 Lan-fhois is sìochaint shìorruidh.
 Oir fhuair thu beachd, tre chumhachd gràis air,
 Gu 'n d'thugadh 'n gath, le fear do ghràidh as :
 " Is beannuicht uime sin gu bràth
 " Na mairbh gheibh bàs 's an Tighearn !"

LXXXI.

Tha thusa nis os cionn gach éigin,
 Bha dhuit an dàn an tìr do chéine.
 Is mar na neoil roimh thigheachd Gréin'
 Ghrad thréig gach bròn is cràdh thu:
 Seadh fhuair thu thairis air gach cruaidh-chas,
 Is air gach àmhaid agus buaireadh,
 Air gach plàigh, is olc is truaigh',
 Is cathan cruaidh na fàsaich !

LXXXII.

O, fhuair thu null a nis thar chuanta!
 Is tha thu thall an tir an t-suaimhneis!
 Chuir thu seachad sgios do chuairt,
 Is fhuair thu “cudthrom gloirc!”
 Fhuair thu steach a dh’ ionnsuidh ’n arois,
 Far am bheil Iosa, Fear-do-ghraidh-sa;
 A’ mealtuinn sonais bhuan na làth’r,
 A shàsuicheas gu leòr thu!

LXXXIII.

A’ ghrian ’san là cha toir dhuit solus,
 Is air an oidhch’ cha ’n fheum thu ’ghcalach;
 Bidh do Dhia, ’sam bheil thu beannuicht,
 ’Na sholus glan ’s ’na ghlòir dhuit.
 Do ghrian-sa tuille cha teid sìos dhuit,
 ’S ni mò do Ré, an d’ theid á t-fhianuis,
 Oir Dia bidh dhuits’ na sholus sìor:
 ’S chaidh crìoch air lài do bhròin duit.

LXXXIV.

Nis bhris an là, is theich na sgàilean,
 Bha ’g iathadh umads’ ann’s an fhàsach;
 ’N tra bha thu faicinnn Fear-do-ghràidh,
 Air beanntaibh àrda Bhéteir.
 Seadh, bhris ort latha buan na soillse,
 Latha na saors’ ’s na buaidh ’s an aoibhneis,
 Latha’gun ghruaim, gun neul, gun oidhch’,
 A theachd a chaoidh na dhéighs-an!

LXXXV.

Nis tha thu shuas a measg an t-sluaigh ud,
 Tre fhuil an Uain a rinneadh buadhach;
 'S tha thusa leo-s' a' seinn 'an fhuaim;
 Is thog thu suas do chlàrsach.
 Cha bhi sì tuille air an t-seileach;
 Is cha bhi agad s' nis r'a ghearan,
 Gu 'm bheil thu aig na sruthaibh coimheach,
 A'm fcarann tioram Bhàeil.

LXXXVI.

O, 'si do chlàrsach nis chaidh ghleusadh!
 Is grinn a laimhsich's tu na teudan;
 A' seinn gu bràth 's a' cur an còill
 Ard ghlòir do Dhé 's t-Fhir-saoraidh.
 Is leo-san seinnear cliù an Uain leat,
 A rinn an saoradh le 'fhuil luachmhor,
 A measg gach cinneach, teang', is sluagh,
 Gu saoghal buan nan saoghal!

LXXXVII.

O gu 'm faighear sinn 'san ait ud,
 'S am bheil na h-aithrichean 'sna fàidhean;
 'S am bheil mìltean as gach àl,
 'S na bràithrean thugadh uainne!
 Far 'm faic sinn Iosa mar a tha e,
 S am faicear sinn 'n a thruscan àluinn;
 Far an lionar sinn le a ghràdh,
 'S an seinn gu bràth sinn buaidh dha!

LXXXVIII.

Thug iomadh dearbhachd feadhna dùth'ch-sa
 Air cho ainmeil 's bha do chliù-s' ac;
 Ann an àm cur ort na h-ùir,
 Is iomadh sùil bha dcurach.
 Cia b' e a chitheadh 'n tional sluaigh ud,
 As gach sgìre bha mu 'n cuairt dhuinn,
 'S a chluinneadh 'n gul 's an osnaich thruagh,
 Bu chridhe cruaidh nach reubadh!

LXXXIX.

Ach bha 'n an seasamh anns an àit ud,
 Mo chreachadh lèir, an culaidh bhràithrean!
 Cuid, ma chreidear leinn an ràdh,
 A bha gun chràdh, gun dòruinn!
 'S rè àm do chàraidhs' anns an uaigh leinn,
 A bha gun nàir a' deanamh uaill as,
 "Gu 'n coisgeadh so an tional sluaigh,
 "Bha ruith a suas do 'n Tòis'achd."

xc.

Ach moladh sìorruidh bhi do 'n ARD-RIGH,
 Nach d' fhuiling dhoibhs' gu 'n d' fhuair an
 Tha iad a' 'tigh'nn fathast mar bha, [àilghios;
 O iomadh àit mu 'n cuairt dhuinn.
 Oir bha ar sùilean ris, n' a fhàbhar,
 Gu 'n d'thugtadh dhuinne Aodhair sàbhailt;
 Ged nach fhaigheamaid fad ar là,
 Na dheanamh bheàrn ud suas dhuinn.

XCI.

'S ann bha am bròn bha 'n déigh do bhàis-se,
 Mar uisge trom thig air an fhàsach,
 Sgaoil e mach air feadh gach àit,
 Is rànuig air gach seòrs' c;
 Seadh, ruith a mach air feadh na tìr' e,
 A 'ruigsinn uaislean agus islean;
 Ach, och is ochan, cor do sgìr'—
 Is i a bha 'n a BÒCHIM!*

XCII.

—Bha do Sgìre nis 'n a Bòchim!
 B'i d' a rìreadh gleann nan deòir i;
 Bu shaoibhir tuireadh innt is bròn,
 A measg gach seòrs' 'san uair ud;
 Bha eadhon peacaich ann an nàdur,
 Nach do shil deur ri fad do làith-se,
 A' gul 's a' caoidh an déigh do bhàis,
 'S an coguis 'ràdh, is truagh sinn!

XCIII.

—Bha do Sgìre nis na Bòchim!
 Oir fhuair do phobull 'thugadh beò innt',
 Tomhas saoibhir 'n diugh r'a òl,
 Do dheuraibh bròin, 'n an cùpan.
 Oir's 'iads' fhuair aithne ghoirt is leirs' air,
 G'an d'fhalbh à 'n sealladh nis an Reult ud,
 A bha dol rompa fad an céin'
 Gu Betlèhem g'an stiuradh.

* Ait 'a bhròin. Breith. ii. 4, 5.

XCIV.

—Bha do Sgìre nis 'n a Bòchim!
 Bha ròidean Shioin deanamh bròin innt',
 'Chionn nach robh siubhal orr na slòigh—
 Na ròidean, 's iad bha cianail!
 Air fiadh, is ballachan a' Phàilliunn,
 Anns an do sheas thu iomadh sàbaid,
 Bha mar gu 'n luidheadh snuagh a' bhàis—
 Bu chràiteach dol 'n am fianuis!

XCV.

—Bha do Sgìre nis 'n a Bòchim!
 Oir latha fiosrachaидh a tròcair,
 Bha nis fo ghruaim 's fo dhubhar ceò,
 Oir dh'fhalbh a 'GHLÒIR o 'n teampull!
 'Sann leinn nach b'ioghnadh i bhi brònach;
 Oir Inneal-chiùil an t-soisgeil ghlòrmhoir,
 Bha sin 'n a thosd an diugh fo 'n fhòid,
 'San ceòl chaidh bharr nam beann uath!

XCVI.

Ach ged a bha do Sgìr' 'n a Bòchim,
 Cha robh do phobull innt' gun dòchas,
 Nach faigheadh fathast iad an lòn;
 A chionn gur bed 'm Fear-saoraith.
 'S ged bha 'm freasdal ud dhoibh gruaimeach,
 Bha 'm bogha frois gu dlùth mu 'n cuairt dha,*
 A' cur an cèill nach sluigear suas,
 —Le tuil—an sluagh a shaor e.

* Taisb. iv. 3. Gen. ix. 13—17.

XCVII.

B' e guth Fir-saoraidh dhoibh 's an là ud,
 —'S bha cuid, gun teagamh, bha'g a chlàistean-
 “ Is mis' an Ti tha beò 's fhuair bàs,
 “ Is dh' àrdaicheadh gu sìor mi :
 “ Is thugadh nis, air cur a' bhlàir leam,
 “ Iuchraichean ifrinn is a' bhàis dhomh
 “ Cha 'n eagal duibhse, oir gu bràth,
 “ 'S e Fear 'ur gràidh-s' tha riaghladh.”*

XCVIII.

Is ged a bha do Sgìr' 'n a Bòchim,
 Thug sud misneach dhoibh is sòlas ;
 Is chuireadh, chum gu'm faigheadh lòn,
 Gach ni air sheòl, gun dàil leo.
 Is dheònaich Dia an doimhn' a thruais doibh,
 N tra bha iad sealltuinn air son Buachaill,
 An neach a dh' iarradh leo—gu 'n d' fhuair,
 Air gairm an t-sluaigh 's a' *Phattroin*.

XCIX.

Cha d' thigeadh dhomhs' tha nis 'na t-àit-se
 A ràdh gu 'n d'rinn iad roghainn shàbhailt' ;
 Ach ma gheibh dhiom-s' iad feum no stà,
 Is ann air sgàth do shaothrach-s'.
 Thubhairt Slànuighear nam buadh c,
 Is tha e soilleir dhomh 's an uair-se,
 “ Tha fear a' cur, is fear a' buain,
 “ 'S bidh 'n tuarasdal mar aon ac.' †

* Taisb. i. 17, 18.

† Eoin iv. 36, 37.

C.

Cha 'n ioghnadh leinn do bhean bhi cràiteach,
 'S a cridhe trom an diugh bhi sàruicht';
 Oir 's i a chaill an Ceannard àillt',
 'S am fear thug gràdh ro chaomh dhi.
 Cha b'ghaoil e riamh a shruth o nàdur,
 Tha siùbhlach, caochlaidheach is bàsmhor
 A cheangail sibhs' o thùs ur là';
 Ach gaol is gràs Fir-saoraidh.

CI.

Rinn sud am briseadh dhi ni's sàruicht,'
 Na mheal i dheth do chomunn gràsmhor,
 Bha sìor-dhol am meud 's a' fas,
 'Rè fad 'ur là 's an t-saoghal.
 'S ged 'eil i meas bhi air a fàgail,
 'N diugh cianail aonarach 's an fhàsach
 Cha 'n fhad 'n tra chi si thu 's an àit',
 Far nach dean bàs 'ur sgaoileadh.

CII.

Cha'n ioghnadh do Nigheanan bhi deurach,
 B' e sud am buille thug am beum dhoibh;
 Oir 's gann g' am faighteadh measg nan ceud,
 Do leithid fein do pharant.
 Is ged a fhuair iad Feara-pòsda,
 A tha 'n am beannachd dhoibh's nan còmhnnadh,
 Cha dealaich uath' ré fad am beò
 An leon a rinn do bhàs orr'.

CIII.

Bhu mhòr do ghràdh d'am fearaibh-pòsd-san,
 Bu mhòr an ceangal-s' fad do bheò riut;
 S do rćir a cheangail, bha am bròn,
 'N tra chaidh thar Iordan bàis thu,
 Ach ma 's e rùn is toil an Tighearn'
 Rinn dileas, treun iad anns an fhionain,
 An coimhead innt', rè iomadh bliadhna'
 Sud urnugh 's iarrtus àireimh.

CIV.

'N tra fhuair do Mhac, am fleasgach àluinn,
 'S an àird an Ear do sgeula bàis-se,
 Mar shaighead gheur chaidh ann i 'n sàs,
 'S na fhàsach rinn dha 'n saoghal.
 Air leam gu 'm faic mi anns' an uair ud,
 Na sruthan deur a 'ruith o ghruaidhibh;
 'S a ghnuis a b' àillidh dreach is snuagh,
 Gu luath a nis air caochladh.

CV.

Air leam gu'n cluinn mi 'ghearan cràiteach,
 "M' athair, m' athair, 'n d'rinn thu'm' fhàgail!
 "Ach air do shon s' cha'n 'eil mo chràdh,
 "Am bàs bha dhuit-s' na bhuanachd.
 "S' e tha'n diugh 'n a aobhar chràidh dhomh,
 Cho beag 's a rinneadh dh' fheum 's a stà leam,
 Dheth do bheath' 's do theagasg tlà,
 'S gach comhairl' àluinn fhuair mi.

CVI.

Bu mholtach, ciallach, an fhéin-àicheadadh,
 Leis an do sgriobh e gu a chàirdibh ;
 Air faotainn leis do sgeula bàis ;
 Is fiù an radh ud iomradh.

“ Is mise nise, dh’ fheudt’ a ràdh leam,
 “ Do na ghineil na tha làthair
 “ Ach ged a bhuiteas mi do’n àl,
 “ Cha’n airidh air an ainm mi ! ”

CVII.

Tha fear d’on àl a tha air fhàgail,
 Mar am pelican ’s an fhàsach ;
 ’S cha n’ es’ bu lugha aobhar chràidh ,
 ’N tra thugadh ’bhràthair caomh uaith :
 Tha e mar chraobh bhiodh ann am fàsach ;
 O’n d’ fhalbh gach duill’ is geug a dh’ fhàs oirr’,
 Is e ri tuireadh goirt a ghnàth,
 Gu ’n d’fhàgadh e ’n a aonar !

CVIII.

Tha e fo shlait ’s fo làimh an Tighearn,
 Ri iomadh latha nis is bliadhna ;
 Is e is gearan dha ’s is pian,
 ’S an fhionain bhi neo-fheumail. . .
 Ach ged ’eil sud ’n a fhreasdal dìomhair,
 ’S e tha ann toil an Ti tha riaghlaadh ;
 Is thíg an là gu ’m foillsich Criod,
 Dha dìomhaireachd a cheuman.

CIX.

Ach 's iomadh anam rinneadh cràiteach,
 Mach o do dhìlsean is do chàirdean,
 Bha faigheil uait-s' na beath' 's na slàint',
 Bha togail bàis is oidhch' dhiubh.
 Oir bha iad lionmhòr feadh nan àite-s',
 Seadh, eadar mhachair agus bhràighe,
 Bha suidhe fo do theagasg tlà,
 'S fhuair iomadh sàbaid aoibhneach.

CX.

Tha cuid gu h-àraigheadh measg an t-seòrs' ud,
 Do 'n d'rinneadh thus' 'n a 'd; inneal sònruicht'
 Chum an anama thabhairt bed,
 'S an lòn thoirt dhoibh a dh' fheumadh;
 Tha 'n leòntan nis a' ruith, 's cha'n ioghnadh;
 Tha iad aonaranach is cianail;
 Tha iad gach làth' a' togairt triall,
 'S ag iarruidh as do dhéigh-se !

CXI.

Is iomadh sealladh trom is cianail,
 A bheir iad air an fhonn tha shìos ud,
 'S am bheil 'n a luidhe'n diugh fo dhòn,
 Na fhuair 's na dh'iarr am bàs dhiot :
 'S os cionn na lic' is àite taimhe,
 Do d' dhuslach àluinn nis aig sàimhe,
 Bidh cuid diubh tuireadh sud mar chloinn ;
 A chaill gu moch am Pàrant !

CXII.

Ach tha aobhar againn bhi saoilsinn,
 Gu bheil toradh'n déigh do shaothrachs',
 A thuilleadh air na chunnaic daoin',
 Mar shìol 's an raon nach d'éirich.
 'S a' chuid tha nis a' togail ceann deth,
 Tha iad gu bochd an diugh ag ionndrainn,
 Cho beag 's a rinn iad dhiot 's an àm,
 'S gur gann gu 'n d'thug iad spéis dhuit.

CXIII.

Is fiosrach es', tha ann do dhreuchd-sa,
 Gu bheil iad lionmhòr a fhuair feum dhiot,
 Nach do chuir aithne riamh ort féin
 Cha d'éirich rè do làth-s' iad.
 Tha iad an diugh gu goirt g'a d'ionndrainn,
 'S a' meas do bhàis a bhi 'n a chall doibh ;
 'S ann chithear tuireadh iad s' an àm,
 Mar chloinn nach fac am Pàrant !

CXIV.

Ach thaobh a' bhròin bha as do dhéigh-se,
 Co a dh'fheudas a chur an céill duinn ?
 Oir 's iomadh fhuair an t-saighead gheur,
 Gun fhios, gun léirs aig càch air.
 Is tha iad ann d'am mulad geur e,
 Nach 'eil iad muladach mar dh'fheumadh ;
 Ach 's i mo bheachd-s' gu bheil sud féin,
 A 'cur an' céill an cràidh-san.

CXV.

Bha tuireadh cuid mar uisg' air shléibhtibh,
 A thig gu h-obann o na speuraibh ;
 'S gann an diugh gu'm faic thu deur,
 Far 'n do ruith 'n dé gu teann e.
 Cha 'n ionann sud 's do chuid gu h-àraid,
 Cha d'fhuair iad cùl a chur co tràth ris ;
 'S ann a tha 'm bròn-s' mar thobar làn,
 'S mar uisge-tàmh 's na gleanntaibh !

CXVI.

Ach 's e an dòchas, is an dùrachd,
 Gu 'n tiormaich Dia gach deur o'n sùilibh;
 'S mur tugadh 'n dòchas ud dhoibh lùth,
 Bu mhairbh 's an ùir gun deò iad.
 Cha 'n 'eil am bròn gu tur gun aoibhneas,
 'S an uair is duirch', tha beagan soills' ac';
 Is thig an làth', an déigh na h-oidhch',
 'Bheir "aoibhneas làn do ghlòir" dhoibh !

EARRAN III.

An GUTH a tha 'n a bhàs do iomadh seòrsa.—Do'n Aosda.
—Do'n Oigridh.—Dhoibh-san a dhùisgeadh fo a theag-
asg, ach a choidil o 'n uair sin.—Dhoibh-san uile rinu
tàir air a theagasg.—Dhoibh-san a fhuair feum dheth.
—Do Aodhairibh.—An co-dhùnadadh.

CXVII.

Ach O, tha GUTH 's an fhreasdal ghruaimeach s',
Seadh, ris gach seòrs' a measg an t-sluaigh-se ;
Gu 'n deonaich Dia, an doimhn' a thruais,
Gu 'm faigh sinn cluasan éisdeachd.
Oir ged tha esan aig a shuaimhneas,
'S a theangaidh ghleusd' gun chomas luaidh aic',
Tha guth 'n a bheath, 'n a bhàs, 's 'n a uaigh,
Do 'n t-sluagh a tha 'n a dhéigh-san.

CXVIII.

Tha 'n guth s' a' labhairt ris an AOSDA,
A sheas a mach fo chruas na daorsa,
'S mheas mar sgeula fhalamh fhaoin,
An teagasg caomh a chual iad.
Bhur clraiginnean tha nis air liathadh,
An seirbheis bhrònach thruagh an diabhuil ;
Is mhilleadh leibh gach là is bliadhna',
A dheònaich Dia 'n a thruas dhuibh !

CXIX.

Tha sibhs' a nis mar chonnadh tioram,
 Iomchuidh 's ulluicht' a chum an teine ;
 'S ma 's e 's nach dean gun dàil sibh pilleadh,
 'S e 'n teine 's cuibhrionn shìor dhuibh !
 Is bithidh 'n sin gach earail ghràsmhor,
 A thugadh dhuibh o bhilibh Theàrlaich,
 Mar dhroighionn geur 'n ur cridhe sàitht',
 A bhios gu bràth 'n a phian duibh !

CXX.

Cha d'thigeadh dhuinne crìoch no gàradh,
 'Chur roimh Fear-saoraidh ann bhi teàrnadh ;
 Tha cuid 's an nochd e glòir a ghràis,
 'S an uair do 'n là a 's anmoich' :
 Ach mar a chuala sibh o Theàrlach,
 Mu 'm bitheadh neach a 'glacadh dànachd,
 'S air gnothuch an'ma fèin 'cur dàil ;—
 Tha 'n teàrnadh ud ro ainmic.

CXXI.

O teicheadh dh' ionnsuidh-san gun dàil sibh,
 Oir tha e cumhachdach gu teàrnadh,
 Chum 's gu nochd e miurbhuil ghràis,
 An tabhairt slàinte bhuan duibh.
 Tha sgàile 'n fheasgair umaibh 'g iadliadh ;
 Is tha bhur cupan teann a' lìonadh ;
 Tha sibh dlùth do 'n teine shìor,—
 Gu nochdadhbh Dia a thruas dhuibh !

CXXII.

Tha 'n guth s' a' labhairt ris an OIGRIDH,
 A rug air crìoch a thcasaisg òirdheirc',
 Ach nach d'rinn dannsadh ris a' cheòl,
 No bròn airson an tàir air.

O, chailleadh leibhs' an diugh am Buachaill,
 S e dh' fheudt' a radh, an t-athair truacant',
 D'an robh 'n a chùram fad a chuairt,
 Na h-uain bhi air an àrach.

CXXIII.

S fiosrach cuid 'n ur measg gu sònruicht',
 Gu 'm b' e a thlachds' bhi gairm nan òigridh,
 'S bhi moladh nis dhuibh gràidh, is glòir,
 Is òirdheireccis, Fir-saoraidh.

Is chuireadh leis air chois, 'n a là dhuibh,
 Seadh, *sgoilean* sheachduin agus shàbaid,
 Chum toirt dhuibhse eòlais slàint',
 An tùs 'ur lài 's ur saoghal.

CXXIV.

Oir b' fhiosrach es' mar dh' fhàsadh suas sibh,
 Gur h-ann bu dorra sin 'ur buannachd ;
 'S gu 'm fasadh aineolas is cruas,
 Le 'r làithibh suas 's an t-saoghal.
 'S gu 'n abradh ruibh an diugh an nàmhaid
 " Is ùin' gu leòr gu iarruidh slàint' e"
 Ach fathast air ur lcabaidh bhàis,
 " Chaidh seachad là na saorsa."

CXXV.

O thugadh, uime sin, do Chriosd leibh,
 Nis maduinn òig', is tùs 'ur bliadhna' ;
 'S bithidh e dhuibh 'n a chuibrionn shíor,
 'S 'n a Dhia dhuibh tre an t-saoghal.
 Oir thaobh nan làithean is nam bliadhna'
 An diugh tha umaibhs' teann ag iadhadh ;
 A' mheud' 's a gheibh iad—gheibh gu fior
 Iad pian, is cràdh, is saothair.

CXXVI.

O, cuiribh cùl ri baoith 'na h-òige !
 'S na bithibh riarachadh na feòla,
 Le ana-caithimh 'n 'ith' 's an òl,
 No pròis is ceòl is dannsadh.
 Cha 'n 'eil annt' sud ach cuibhrionn bhrònach ;
 An àite sonais, 's e th' ann sgleo dhiubh ;
 'S 'n tra shaoil thu 'n glacadh ann do dhòrn,
 Sud uait mar cheò nam beann iad.

CXXVII.

Is cuimhnich do Chruithfhear 'n a d-oige ;
 O, thoir a suas do làithean òir dha,
 'S d'aignidh' bhlàth is t-inntinn bheò,
 Mu 'n d' thig gaoth-reòt 'na h-aois orr' !
 'S e sud do ghliocas air mhodh sònruicht',
 Cia ac is bàs an diugh no 's beò dhuit ;
 Is 's e do shonas e fa dheòidh,
 'N tra shiubhlas glòir an t-saoghal !

CXXVIII.

Tha 'n guth so dhuibhse fhuair fo 'theagasg,
Cu minic gluas'd is DÙSGADH COGUIS ;
Ach air na luidh o 'n uair sin codal :
Bhur cor, gun teagamh, 's brònach !
O, dùisgibh, dùisgibh as an t-suain ud !
Is glacadh curam sibh is uamhunn,
Mu 'm fàgar sibh fo thiormachd bhuan,
Mar bheanntaibh cruaidh Ghilbòa !

CXXIX.

Tha sibhse nis an tuilleadh gàbhaidh ;
Oir mhùch sibh choguis, 's thug sibh bàs oirr',
Is shaltair sibh air fuil na slàint',
Is chràdhadh Spiorad Dhé leibh !
O, dùisgibh, dùisgibh as an t-suain ud !
Dùisg-s' a choguis, is éigh 'n an cluasaibh,
Gu bheil iad marbh an dara cuairt,
'S an cos air bruaich an léir-sgrios !

CXXX.

Dùisg-s' a choguis, is lean gu geur iad,
Cia b' e àit no taobh an d' théid iad,
A' seirm 'n an cluasaibh uamhas Dhé,
'S am feum a th' ac' air teàrnadh ;
O, innis dhoibh gu 'n tog thu fianuis,
Ma 's e 's nach géill an diugh do Chriosd iad,
'S gu 'm bi thu annt', chum tuillidh pian,
Mar chnuimh gu sìor nach bàsaich !

CXXXI.

Ach pillibh fathast ri Iehobhah,
 Tha gabhail ris na macaibh stròdhail;
 'S bheir e dhuibh-s', chum cliù a ghlòir',
 An tròcair nach do thoill sibh.
 Seadh, bheir e mach an trusgan ghlòrmhor,
 Is ni e cuilm do nithibh sòghmhor;
 Gheibh sibh aoidhealachd gu leòr;
 Is bithidh ceòl aig ainglibh.

CXXXII.

Ach cluinnibh 'n guth s', na th' ann an nàdur,
 A shuidh a riamh fo theagasc Theàrlaich,
 'S nach d' thug spéis dha fad a là—
 A bhàs an diugh gu 'n gluais iad !
 Cha lugha 'n ciont tha air 'ur làmh-sa
 Na cionta fola tha mar scàrlaid;
 Oir mhilleadh leibhse latha gràis,
 Is iomadh sàbaid luachmhor !

CXXXIII.

A measg a thrioblaidhean 's an fhàsach,
 Cha d' fhuair e ni bu mhò a chràidh e,
 Na peacaich thruagh' bhi deanamh tàir
 Air lath' an gràis 's an tròcair.
 Bu tric bha 'chridhe tlàth-'s a' tuireadh,
 'S a shùilean maiseach blàth a' sileadh,
 Chionn nach robh iad idir pilleadh—
 Se 'm milleadh-san bu bhròn da.

CXXXIV.

Ach thig an t-àm, mur dean iad pilleadh,
 Gu 'm bi iad dùint', an slochd a mhillidh;
 Far am bi ac ùin' gu tuíreadh,
 Gach cothrom fhuair, 's a chaill iad!
 Is 's cígin doibh-s', an sin gu 'n cuimhnich,
 An latha gràis d'an d'rinn iad dimeas;
 'S nach 'eil iad ann tre linn nan linn,
 Ach fulang binn na thoill iad.

CXXXV.

An uair thig Criod an glóir an Athar,
 Maille ri naoimh, an neulaibh 'n athair,
 A chur a suas an sud a chaithir,
 Chum breth thoirt air an t-saoghal;
 O, chithear ann san là sin Teàrlach,
 Ann an glòir is sgèimh a shlànuigh'r;
 Is do na h-uile rinn air tàir,
 Is sealladh cràitcach daor e !

CXXXVI.

Is chi iad sin nach b' ann air Teàrlach,
 Ach air Criod, a rinneadh tàir leo;
 'N tra bha iad diùltadh tairgs' nan gràs,
 Thug Teàrlach dhoibh 's an t-saoghal.
 Is dcarbhar ciontach iad, 's an là sin,
 A' mort an anamanna neo-bhàsmhor;
 Orra féin bithidh 'm fuil gu bràth;
 Is Teàrlach bithidh saor dhi !

CXXXVII.

Is c' ait' am bi ac' àite seasaimh,
 'N tra bhitheas an saoghal dol na lasair ;
 'N tra bhitheas na speuran falbh gu cas,
 'S 'n tra leaghlas às na dùilean !
 'N tra théid gach dòn is dòchas as doibh,
 'S gach dìdean bréig' 's an d' ghabh iad fasgaidh,
 'S nach bi romp' ach teine laist'
 Am feasd nach d'theid a mhùchadh !

CXXXVIII.

Is anns an là sin 's iad a dh'iarradh,
 Do shléibhtibh 's chreagaibh a bhi strìochdadadh ;
 A' glaodh riu—"Tuitibh oirnne sìos,*
 " Faic Criod a' teachd 's na neulaibh!
 " Oir thàinig latha mòr a chorruich,
 " Shéid a' ghaoth, is dhùisg an doinionn ;
 " Tha na tuiltean nis dol tharuinn,
 " Cha 'n aithne c'ait' an d'théid sinn" !

CXXXIX.

Ach feumaidh dha-s' a nis gu strìochd iad,
 Chum binn a bhàis gu 'n cur e 'n gniomh orr',
 'S gu 'n d' theid gun dàil an iomain sìos,
 Gu pian na h-àmhuinn theinntich !
 'S 'n tra chuireas Criod am binn an céill orr',
 'N sin cuiridh Teàrlach féin a sheul rith' ;
 Oir their e leis na naoimh gu léir,
 AMEN—is ceart a' bhinn i !

* Taisb. vi. 16, 17.

CXL.

Is feumaidh 'n sin gu 'n d'théid a sìos iad,
 Gu slochd an dorchadais gu sìorruidh ;
 Far am bi ac' gach cràdh is pian,
 Is gul is giosgan fhiacal ?
 Far nach bi soisgeul nis r'a luaidh dhoibh ;
 Far nach bi sàbaid ac r'a thruailleadh ;
 Far nach gabh Emanuel riu truas ;
 Oir tha 'd an cuan na dì-chuimhn' !

CXLI.

Tha iad tuilleadh 'n cuan na dì-chuimhn' ;
 Ach bidh air chuimhne dhoibh gu sìorruidh,
 Gach tarcuis rinneadh leo air Criod,
 'S air soisgeul sior na slàinte.
 Bhitheadh 'n a shaors' e dhoibh 's a' chuan ud,
 ('S na 'm feudt' a ràdh, 'n a bheagan fuasglaidh)
 Na 'n rachadh dhoibh air dì-chuimhn bhuan,
 Na chualadh leo o Theàrlach.

CXLII.

Ach cha 'n 'eil osnadhl ghoirt no ùrnuiigh,
 A chaidh riamh a suas o 'ghlùinibh ;
 Cha 'n 'eil deur a shil a shùil,
 No dùrachd chuir e 'n céill doibh ;
 Cha 'n 'eil uair a riamh a sheas e 'n cùbaidh,
 No chualadh leo-s' a theagastg cùbhraidh,
 Nach bi gu bràth, mar sgitheach ùr,
 'N an cridhe rùisgt', bhios geur dhoibh !

CXLIII.

O, teicheadh dh' ionnsuidh bhaile dhòn sibh,
 A tha air ulluchadh an Criosd dhuibh,
 Anns am faigh sibh dìdean shìor,
 O shiantaibh buan na feirge !
 Na tugaibh leum do 'n teine shìorruidh ;
 Na tugaibh géill do ghuth an diabhuil ;
 Do ghairm an t-soisgeil thugaibh strìochd,
 Oir Criosd tha ann 'ur tairgs'-se.

CXLIV.

Is e a ghuth, ri mic nan daoine,
 " Thigibh a m'ionnsuidh-s' tha ri saothair,
 " 'S fo uallach trom do chiont 's do dhaors',
 " S bheir mis' dhuibh saors' is suaimhneas.*
 O, c' uime mhillear sibh gu sìorruidh,
 No 'n cuan na feirg' an luidheadh sìos sibh,
 'N déigh na rinn 's na dh' fhuiling Criosd' !
 O strìochdaibh 'n diugh gu luath dha !

CXLV.

Tha 'n guth s' a' labhairt ribh-s' gu h-àraig,
 Air an d' dhrùith a theagast glà-san ;
 'S d' an d'rinneadh e, tre chumhachd gràis,
 'N a mheadhon slàinte shìorruidh.
 Seadh, d' an robh Iosa fear 'ur gràidh-san,
 Tre theagast phrísail Mhaighstir Teàrlach
 Mar eun a chruinnicheadh a h-àl
 A steach fo sgàil a sgiathan.

* Matt. xi. 28.

CXLVI.

Bha teachd a nuas a theagaisg bhuadhaich-s',
 Cha 'n ann mar thuilitibh frasach, fuaimneach ;
 No mar uisg' nam faoilteach fhuar',
 Gun dèars' do bhuaidh na gréine :
 Ach bha e sileadh oirbh gu h-ùrail,
 ('Thaobh bláth's na gréine bha ro dhlùth dha)
 Mar an t-uisge tlà is ciùin,
 No 'n drùchd a thig 's a' chéitean.

CXLVII.

'S 'n tra thigcadh nuas na frasan tlà ud
 'N sin air an talamh chit' na blàthan ;
 Bhitheadh gach mèas, is geug a' fàs,
 'S an fhàsach dheanamh aoibhneis.
 Bhitheadh na h-eòin a' seinn gu h-àrda :
 'S guth a' cholumain air a chlàistean,
 'Cur an céill dhuibh teachd gu blàth's,
 An t-samhraidh slàinte shaoibhir'.*

CXLVIII.

Ach theagamh nis gur gearan truagh dhuibh,
 Gu'n d' thàinig caochladh oirbh o 'n uair ud,
 Gu'n d'thàinig caoil' is goirt is cruas,
 'S gu 'n d'fhalbh an snuagh 's am blàth ud.
 Ach dh' fheudt' an toradh gu 'n do bhuanaich,
 Ged a dh' fhalbh am blàth 's an snuagh ud ;
 Oir fàs a sios, is fàs a suas,
 Is dual do bheath' nan gràs e.

* Dan. Shol. ii. 12, 13.

CXLIX.

A' ghairt 's an t-samhradh chi thu sgiamhach,
 Cha'n ann 's an àm ud gheibh thu biadh innt';
 Ach 'n tra bhitheas abuich i 's an dias,
 'S 'n tra chromas sìos gu làr i.
 Is ionann sud is siol na naomhachd,
 Ann am pobull an Fhir-shaoraidh ;
 Is tric, 'n am faireachadh-s', a shaoil,
 Gur claponadh, 'n àite fàs, dhoibh.

CL.

'S e rathad Dhé e thaobh a threud-sa,
 —Mu 'm bi iad àrdanach no féineil—
 Bhi tric a' folach uatha féin
 Na sgèimh' a chuir a ghràs orr'.
 'N an sealladh féin gu tric mar 's suaraich',
 'N sealladh chàich tha sult is snuagh orr' ;
 Cha'n ionann, faireachadh air cruas,
 Is cruas nach 'eil 'n a chràdh dhuinn.

CLI.

Oir cha 'n e blàth is eud na h-òige,
 Is cha 'n e aoibhneas lath' a' phòsaidh,
 Is mò a bheir gu Criod do ghìdir,
 Ach toradh beò nan gràs ud.
 Ach is maith na blàthan bhi 's an àm ud ;
 Is maith am fochann bhi 'san t-samhradh ;
 Oir mur bi fochann idir ann,
 Is foghar' gann, gun bhàrr e.

CLII.

Ach, theagamh, 'n diugh gu 'm bheil an Nàmhaid,
 'S ur 'n ana-creidimh féin ag ràdh ribh,
 Gu 'm bi e dhuibh 'n a dhìteadh bàis,
 An teagasg tlàth a dh' éisd sibh.

Tha cuid 'n ur measg d'an cunnairt àicheadh,
 Gu 'n d fhuair sibh lathachan fo Theàrlach,
 Nach di-ch'nich sibh, chum onoir gràis,
 Rè fad 'ur là 's 'ur cćine.

CLIII.

Cha chluinn sibh tuilleadh 'n trompaid òir ud,
 Bha seirm 'n ur cluasaibh 'n fhuaim ro ghlòrmhor,
 A philleadh gruaim is gul gu ceòl,
 'S 'ur bròn is caoidh gu dannsadh.
 Ach seallaibh nise ris a' Bhuachaill;
 'S urr' am briseadh s' dheanamh suas dhuibh ;
 Oir ann-san tha gach lànachd bhuan,
 Is iochd is truas nach gann duibh.

CLIV.

Is molaibh Dia air son na fhuair sibh ;
 'S na leigibh di-chuimhn' fad ur cuairt air ;
 Ach nochdaibh mach a bhrigh 's a bhuaidh,
 'N ur gluasachd troimh an t-saoghal.
 Is molaibh Dia, ged 'eil na fàidhean,
 Is 'ur luchd teagaisg uile bàsmhor,
 Gu bheil soisgeul sìor nan gràs,
 Os cionn gach bàis is caochlaidh.

CLV.

Is tric a luaidh na bilean gaoil ud,
 Gu bheil 'ur Sagairt truacant' naomh-san,
 A 'tagradh cùis a phobuill chaoimh,
 Air caithir naomh a ghloire;
 Is gu bheil fuaim an t-soisgeil éibhinn
 Mar fhuaim nan clagan-òir o 'éideadh,*
 Nochdadadh 'sheasaimh 'n làthair Dhé,
 'S a' cur an céill gur beò e.

CLVI.

Is tric a nochd e dhuibh-s' am fàradh,
 A chunncas roimhe so le Iacob;
 Ach fhuair c féin a nis gu 'bhraighe',
 Is dh' fhàg e sibhs' aig 'iochdar
 Ach rachaibh suas o cheum gu ceum air,
 —Cha dean sibh chaoidh a mach d'a leum e—
 Is gheibh mar sin sibh steach 'n a dhéigh-s',
 Gu làthair Dhé, mar 's miann leibh.

CLVII.

Is Dia gu naomhaich dhuibh gach eigin,
 Tha agaibh 'n diugh an tìr ur céine;
 Gu 'n cum sibh suas 'n a shlighe réidh,
 'S gu 'n robh e féin 'n Fhear-iùil duibh!
 'S ged a tha cheuma 'n diugh 's na cuantaibh
 'S a ròide domhain foluicht' uaibhse,
 Cha 'n fhad an ùin' 'n tra chi a shluagh
 Gur buadhach rinn e 'n stiùradh.

* Exod. xxviii. 34, 35.

CLVIII.

Ach mu 'n tig gu críoch mo dhàin mi,
 Theirinn focal ris na Bràithribh,
 A chuala riamh mu' bheath' no' bhàs,
 'S gu h-araid chuir air eòlas.
 Dhomhsa na measaibh e 'n a dhànachd,
 Oir dh'iarruinn labhairt ann an gràdh ribh,
 Is mar an neach gu cinnt a 's tàir'
 Do 'n chuid fhuair gràs is tròcair.

CLIX.

Tha 'n guth s' a' labhairt ris gach aodhair,
 A rinneadh dìleas do 'Fhear-saoraidh,
 'S cho-éignichcadh, le buaidh a ghaoil,
 Gu saothrachadh 'n a fhònain.
 O, chailleadh leibhs' an diugh 'n a bhàs-san,
 An caraid dìleas is am bràthair;
 Neach a sheasadhbh leibh 's gach càs;
 'S bha làidir anns an Tighearn.

CLX.

Mar 's minic ni, 'san latha bhlàir iad,
 A' cur nan cath gu dian ri naimhdibh;
 Air na rancaibh 'n tra thig beàrn,
 Ni chuid tha làthair suas i.
 Is seasaidh 'n sin ni 's dlùith' r 'a chéil' iad,
 Is lasaidh 'n duinealas 's an eud annt':—
 Ciod tha sud dhuibh cur an céill,
 Cha 'n fheum sibh is' ' a luaidh dhuibh.

CLXI.

Leanaibh-s' an eisimplir a dh' fhàg e,
 Oir ri a leantuinn tha i teàruint';
 Ann a bheath', 's na shaothair ghràidh,
 Rè fad a là 's a shaoghail.
 Tha cuid dhibh chunnaic ann gu h-àraid,
 —Is fhus' a smuaineachadh no 'ràdh leibh—
 Buadhan pears', is obair ghràis,
 Bha gann 's an làth-s' r'am faotuinn.

CLXII.

Chunnaic sibh anns-an beath' na h-ùrnuigh,
 Is beath' a' chreidimh is na h-ùmhachd,
 Beath' a' ghràidh 's a' chridhe bhrùit',
 'S na h-inntinn chiùin is nèamhaidh:
 Chunnaic sibh anns-an brod a' bhuaillaill',
 Is teachdair treun an Tiomnaidh Nuaidhe,
 A thuig an fhìrinn ann a buaidh,
 'S do 'n t-sluagh a chuir an céill i.

CLXIII.

Chunnaic sibh 'n onoir a chuir Dia air,
 An stiùradh 'threud-san is 'g am biathadh,
 Gus an robh e aosmhor liath,
 Gun chlaonadh riamh o 'ròidibh.
 'S e rinn cho feumail e 's an fhìonain,
 Bhi seasamh treun air taobh an Tighearn,
 Bhi cumail dlùth, 'n a bheath', ri Criod,
 'S bhi 'g iarruidh 'mhàin a Ghàidh-san.

CLXIV.

A chum an turuis bha e deasaicht',
 Le 'bhat' 'n a dhòrn, is e 'n a sheasamh,
 Is chunncadar gu teann an crios,
 Mu 'leasraibh fad na fàsaich:
 A lòchran riamh bha glan a' lasadh;
 Is bha a bhrògan air a chosaibh;
 Bha e 'n a òglach ulluicht', deas,
 'N tra thugadh fios a bhàis dha.

CLXV.

Is mòr an onoir chuir an Tighearn,
 Orra-san shuidhich e 's an fhìonain,
 Bhi deanamh gnothuich cedar Criod
 Is anamaibh sìorruidh dhaoine:
 Bhi cur an cùill an t-soisgeil shìorruidh,
 Chum peacaich chaillt 'tha bàitht' am fiachaibh,
 Is chum an t-sluichd tha teann dol sìos,
 Tre Criod bhi air an saoradh.

CLXVI.

'S mar 's mòr an onoir, 's trom an dreuchd i;
 'S mur faighear dileas sinn is eudmhor,
 Thig gach mallachd chuireadh 'n céill
 An leabhar Dhé a nuas oirnn'!
 Ach bitibh-s' beò air Criod a bhàsaich;
 Is bitibh tarruing as a lànachd;
 Bitibh dlùth ri caithir ghràis;
 'S 'ur saothair ghràidh bidh buadhach.

CLXVII.

Bithibh-se saoithreach agus eudmhor,
 A chum bhi saor o fhuil luchd-éisdeachd;
 Is bithibh beathachadh an treud',
 Le fuil 'ur Dé chaidh shaoradh.
 'S 'n tra ghairmear sibhse leis a 'BHUACHAILL,
 A chum bhur cunntas thoirt a suas dha,
 Gheibh an sin sibh crùn na buaidh',
 Is aoibhneas buan nach caochail.

CLXVIII.

Ach tha an guth so ribhs', na 'n éisdeadh,
 A tha 'n ur luidhe fo 'n an-éibhinn,
 A chionn bhi gabhail càram treud'
 Gun spéis do ghuth an Tighearn':
 Is do nach robh e riamh 'n a dhùrachd
 A threud-sa bheathachadh 's a stiùradh;
 Ach dh' fheuch gu bheil sibh coma dhiubh,
 'S an rùsg, gur e bu mhiann leibh.

CLXIX.

C' air son a chaidh sibh steach do 'n dreuchd ud,
 'S gu 'm feud ur coguis chur an céill duibh
 Nach e cliù no onoir Dhé,
 No maith a threud' a dh' iarr sibh:
 'S nach do mhothaicheadh cumhachd gràis leibh,
 Ann an atharrachadh ur nàduir,
 Ach gabhail fathast leis an sgàil,
 'S ag àicheadh bheath' na diadhachd?

CLXX.

Tha sibh ag àicheadh bheath' na diadhachd;
 Tha sud ro-shoilleir o bhur gniomh'raibh;
 Oir cha 'n i 'n eisimplir thug Criod,
 Is miannach leibh a leanmhuinn;
 Ach 'n àite sud, a' lot 's a' beumadh
 A' phobuill thaghta rinneadh eudmhòr,
 'S 'g am meas mar mhuinntir air lag-chéill
 Is troimhe-chcìl' 'n an eanachain.

CLXXI.

Tha sibhse buintinn riu 's an làth so,
 Mar bhuin na h-Iùdhàich ris an t-Slanuigh'r,
 G' a thabhairt thairis chum a' bhàis,
 Mar mhealltair 's fàidh 'bréige.
 Is ann mar sud a cheusadh Criod leibh,
 Anns an treud a tha giùlan 'iomhaigh,
 'S a' cur ur seul' mar sin ri gniomh
 Nan Iudhach dh'iarr a cheusadh.

CLXXII.

Tha 'n treud a' teicheadh uaibh, 's cha'n ioghnadh,
 Oir cha 'n e stòras tigh an Tighearn,
 Tha sibh nochdadhbh dhoibh mar bhiadh,
 Ach sin a 's miann le nàdur.
 O chualadh leo-san guth Fir-saoraidh,
 Cha lean iad sionnaich 'n culaidh chaorach;
 Is tha gach teagasg tioram, faoin,
 Mar phlaosgaibh mhuc, 'n a ghràin doibh.

CLXXXIII.

Ach their sibh—"B' ionann sud 's do 'n t-Slànuigh'r,

"An sluagh a lean e tre an fhàsach,

"Chuir ris cùl aig uair a bhàis

"Is rinn air tàir is dimeas."

Ach cha 'n e 'n sluagh a bha 'g a éisdeachd

A b' àirde glaodh 's an uair ud "Ceus e,"

Ach sionnaich fhuilteach, bhorb, is gheur',

Mic Lebhi agus Sgrìobhaich.

CLXXXIV.

Tha 'bhuaidh sin anns an t-soisgeil shìorruidh

—O, nach creideadh sibh gur fiòr e!—

Seadh, a thàirngeas peacaich leis 'n a lòn,

Mar iasg, gu cladach tèarnaith.

Cha bhi a chaoith e gun luchd-éisdeachd,

'S ma chuirear leibhs' gu glan an' céill e,

Bithidh e dhuibh 'n a chumhachd Dhé,

'S an treud, cha dean 'ur fàgail.

CLXXXV.

Ach mur tig caochladh oirbh nach d'thàinig

Thig an là gu 'm faic sibh Teàrlach;

'S gu 'n tog 'n ur 'n aghaidh 'bheath', 's a bhàs,

'S a shaothair ghràidhse, fianuis.

Is sud an sealladh dhuibh bhios cràiteach,

A bhi 'g a fhaicsinn-s' dol gu Pàrras,

'S sibh féin bhi dol, fo bhinn a' bhàis,

Gu àit' an léir-sgrios shìorruidh!

CLXXVI.

Is ann an sin, 's ann leam gur cinnteach,
 Gur h-i 'n àmhuinn dhubhs' 'bhios teinnteach;
 Oir cha bhi measg na gheibhear innt',
 Ni 's toilltinneich' na sibhs' oirr'.
 Oir maill' ri dibhearg Dhé, 'n a h-uamhas,
 Diteadh coguis, 's an-earbs' na h-uamhuinn,
 Thig gach mallachd oirbh o'n t-sluagh
 A rinneadh truagh d' ur trid-san.

CLXXVII.

O, 's e mo dhùrachd, ann an gràdh duibh,
 Gu 'n coinnich Ios' an latha gràis ribh,
 A choinnich roimhe so ri Saul,
 'S a leag gu làr a sìos e;
 'S gu 'n dean e dhibhse soithich' thròcair,
 Chum cur an céill an t-soisgeil ghlòrmhor,
 Air atharrach' a shult 's a' dhòigh,
 Na b' eòl a roimhe riamh dhuibh.

CLXXVIII.

Nis gu 'n deònaich Dia nan gràs dhuinn,
 A dhoirt na feartan ud air Teàrlach;
 A rinn 'n a bheannachd e 'n a là,
 'S gu Pàrras thug fa-dheòidh e;
 Gu 'n leig e nuas na feartan ceudna,
 Eadar theachdair agus threud oirnn,
 A ni 'n ar beannachd sinn do chéil';
 Is gheibh e féin a' ghloir dheth!

CLXXIX.

Ach 's beag a 's urrainn dàn no sgeula,
 No teangan chàirdean chur an céill dhuinn,
 D' a bhuadhaibh àillidh moltach féin,
 'S d' a bheusaibh bha ro àluinn;
 Oir bha e iriosal is uasal,
 Is bha e caomh, is sèimh, is suairce;
 Seadh, bha e làn do bhrod nam buadh;
 Ach 's mòr an snuadh chuir gràs air.

CLXXX.

'S am fad bhios tonn ri tràigh a' bualach,
 Am fad bhios feur a' fàs air cluainibh,
 Am fad bhios grian a' siubhal shuas,
 An astar buan nan speur dhuinn;
 Bithidh cuimhne is iomradh bhuadhach,
 Air a shaothair measg an t-sluaigh so,
 Oir chionn gu 'n d' leanadh i le buaidh,
 Bidh luaidh ri fad gach rέ oirr'.

IOMRADH AITHGHEARR

AIR

DR. STIUBHARD,

D' AN RINNEADH AM MARBHRANN A LEANAS.

Rugadh e's a' bhliadhna 1764, an Sgìreachd *Bhlàir*, no mar theirear an cèarnaibh eile do 'n Ghàidhealtachd ris an àite, *Blàr-an-Athall*, ann an Siorramachd *Pheairt*. B'e 'athair, Ministeir na sgìreachd ceudna; agus tha ainm dha e bhi 'n a dhuine diadhaidh, measail. An déigh do Alastair Stiùbhard bhi air a thogail 'n a òige an teaghlach 'athar, agus an déigh sin an teaghlach a bhràthar-céile, agus foghlum cubhaidh air a thoirt dha, chuireadh do* Oil-thigh Chill-rimhinn e; far an do choisinn e a leithid do chliù ann an àrd-fhoghlum a thogail, 's gu 'm feudadh e a ràdh mar a thubhairt Pòl, gu 'n d'thàinig e air 'aghaidh thar moran do a chomhaoisibh a measg a chinnich féin: ach, ged nach robh riamh 'n a ghiùlan ach maisealachd agus deadh bheus, is e féin a dh' aidicheadh, agus a dh' aidich, an déigh sin, ge b'e air bith mar thog e foghlum dhaoine, nach robh e ach aineolach mu 'n aon ni fheumail: agus mar sin gu 'n do mhair e, an déigh dha tighinn gu bhi 'n afhear-

* College of St Andrew's.

searmonachaидh anns an Eaglais, agus 'n mhинisteir Sgìreachd. Tha 'àm féin aig an Tighearn, a thaobh gach anama a ghairmear leis; agus cha 'n ainneamh idir 's an Eaglais, foillseachadh a' ghliocais mar a' ghràidh :hiorruidh, ann an coraibh fa leth, leis am bheil cumhachd oibreacaidh gràis air a thabhairt ni 's mò a chum soluis, a thaobh an ama 's am bheil e a' tighinn na ged bhiodh e air tighinn aig àm 's am bith eile.

An déigh do Mhr. Alastair Stiùbhard comas searmonachaидh fhaotainn, agus e a nis mu aois dhà bhliadhna fhar flichead claidh a shuidheachadh mar mhинisteir Sgìreachd Mhaolin, an Athall. Bha e 'n uair sin 'n a dhuin' òg ecanalta, foghluimte, eircachdail, measail. Bu leòr leis an t-saoghal, agus leis féin, 's an àm, an diadhachda fhoghluim e o dhaoiuibh. Ghabh coimhthional na sgìreachd ris gu toileach, taitneach, agus choisinn a ghiùlau maiseach, caoinhneil, deadh-ghean o 'n uasal agus o 'n iosal dha. Cha robh aon ghearan air a theaghasg. Ach, 's i a bhreth féin air an teagasc a bha 'n uair sin aige, so,—dh' fhàg e a' bhreth so sgrìobhta le a làimh féin, air dòrlach do shearmonaibh a sgrìobh e fhad 's a bha e fatlast 'n a cheud staid, agus is e so a tha e a' tabhairt mar chliù orra—“ Faoineasan gun fhiù; toradh aimsir an dorchadais agus na doille; gun aon ni do bhlas an t-soisgeil, làn do mhearachdaibh; airidh a mhàin air truas agus diùltadh;—am feum maithcanais agus tràcair' o Dhia gràsmhor, tre thoillteanas 'aon-ghin Mic.” Ach bha àm gràidh an Tighearn a' teachd am fagus. Is e an eend ni a rinneadh 'n a mheadhon ann an làimh an Spioraid a chum solus còlais glòire Dhé a lasadh 'n a inntinn, comhluadar càirdeil a bha aige ri ministeir mìrramach do 'n Eaglais, Mr. Black, a bha 'n uair sin 'n a mhинisteir Sgìreachd dlùth do bhaile mòr *Pheairt*.

bha dearbhli-shoilleireachd mu pheaceadh, mu fhìrean-eachd, agus mu bhreitheanas, o 'n àm sin a' dol air aghaidh 'n a anam; agus bheannaich an Tighearn gu mòr dha comhluadar agus litrichean Mhr. Black; oir buhanaich e rè ùine fhad, ann an leigeil ris 'fhaireachduinn agus a mhothachadh féin do 'n duin' urramach dhiadhaidh sin; agus nochd Mr. Black dha-san, agus d' a thaobh, mòr għliocas spioradail, mòr dhìlseachd 'n a earailibh, agus mòr għraddh. Fhad 's a bha an Tighearn 'g a tharruing agus 'g a thrèorachadh tre na ceumannaibh so, is e aideachadh Mhr. Stiùbhard féin, nach robh a theagħasg fathast ach ach mar "a' ghall-thromp," a' toirt fuaim neo-chinnteach uaipe; ach, gidheadh rinneadh greim air le saor-ghräs; agus bha e a' faotainn soluis. Thachair mu 'n àm sin, ann am freasdal Dhé, gu 'n d' thàinig ministeur diadhaidh á Sasunn an rathad; thaghail e air Mr. Stiùbhard; shearmonaich e 'n a Eaglais, agus dh'fhan e dà latha 'n a thigh. Bheannaich an Tighearn, gu h-iongantach, so dha; agus riamh o 'n uair sin, noclidadh gu soilleir, araon 'n a theagħasg agus 'n chaithe-beatha, gu 'n dubhaint an Tighearn ris, "Bi beò." Bha a theagħasg a nis, do rìreadh a réir an t-soisgeil; agus eud agus beatha 'n a theagħasg. Mhair e mar so, rè ùine thrì bliadhna; agus an sin, thòisich an Tighearn air dhòigh fhollaiseich, shoilleir, a bheannachd agus a chumhachd a thoirt d' a theagħasg. Bha obair mhòr a nis a' dol air a h-agħaidh, ann an Sgìr-eachd Mhaolin. Bha anama liònħor air an dùsgadh, air an ath-ghineamhuinn leis an Spiorad Naomh. Cha għiùlain an t-iomradh so dhuinn, oir feumaidh e bhi għearr, leudachadh air so. Ach thachair, mar thachair riamh, co luath agus a dhealaicheadh Mr Stiùbhard o 'n t-saogħal mi-chreidmheach, gu 'n do thionndaidh daoine

an t-saoghail 'n a aghaidh. Choinnich agus sheas e ri iomadh deuchainn. 'S a' bhliadhna 1805, fhuair e gairm o Sgìreachd Inbhir-feotharain au Siorramachd Rois. Bu ni a bha cruaidh air do rìrcadh dealaachadh ri coimhthional Sgìreachd *Mhaolin*. Feudar, le iomadh, coire fhaotainn dha, gu 'n dealaicheadh e idir riutha. Cha mhol sinn a leithid do dhealachadh mar ni ann féin. Ach aig an àm cheudna, feumar aideachadh,—e bhi foillsichte ann an eachdraidh na h-Eaglais,—an Tighearn bhi a' toirt a ghnùis d' a leithid, ann an coraibh fa leth. Cha 'n sfeud siun bhi an teagamh nach do chuir Mr Stiùbhard diadhaidh a chomhairle ris an Tighearn mu 'n ghnothuch chudthroniach. Agus cha miùò tha e air fhàgail 'n a theagamh nach d' fhuair e comhairle; oir dh' aidich an Tighearn gu mòr a shaothair agus a sheirbhis, far an deachaidh e,—ann am baile agus ann an Sgìreachd Inbhir-feotharain. Dh' fhàilnich a shlàinte gu mòr; agus mu 'n bhliadhna 1819, b' éigiù dha dol do Dhun-éidin a dh' fhaotainn comhairle, agus cuideachaidh do a shlàinte o làighibh foghlumte an àite sin. Fhad 's a bha e mar so an Dun-éidin, agus e 'g a fhaotainn féin a nis gu mòr air failneachadh ann an comasaibh corporra, agus gun sùil aige féin ri gairm eile 's am bith, fhuair e gairm gu bhi 'n a mhinisteir ann an aon do choimhthionalaibh Dhun-éidin; agus chunnaic e mar dhileasdanas dha féin, suidhichte mar bha e 's an fhreasdal, gabhail ris a' ghairm sin; agus shuidhicheadh e mar fhear do dhithis mhinisteirean a' *Chanongate* 's a' bhaile mhòir sin. Cha robh e a' bheag thar bliadhna 'n a mhinisteir an Dun-éidin, gus am faca an Tighearn iomchuidh a ghairm air falbh; agus chrìochnaich e a thurus, air an t-seachdamh là fishead do cheud mhìos an t-samhraidh, 's a' bhliadhna 1821, agus e an aois dà fhichead

bliadhna 's a seachd deug. Is e crìoch ùghdair a Mharbhrainn a leanas, cliù agus iomradh Dhr. Stiùbh-haird a chur an céill, agus air chuimhne. B' ainneamh 'n a là féin ministeir, a 's mò leis an d' fhoillsich an Tighearn cumhachd a ghràis. Bha so air fhàgail ro shoilleir, eadhon 's na nithibh a dh' ainmicheadh cheana, 's an iomradh ghoirid so féin. Agus mar bhios a chuimhne, a chliù, agus a dhìlseachd, cùbhraidh do phobull an Tighearn; agus gu h-àraigd dhoibh-san d' an d'thugadh tre a theagascg, mar mheadhon, creidsinn, no mothachadh fhaotainn air an staid féin mar anamaibh cailte an tùs; tha, aig an àm cheudna iomradh an duin' urramaich so air fhàgail do 'n Eaglais mar fhianuis air cliù agus gnè na h-inntinn sin, tha an Tighearn a' tabhairt dlíobh-san a dh' aidichear leis féin mar luchd-saothrachaidh 'n a fhòn-lios. An dream a chuirear a mach leis-san, ulluichear leis féin iad. Ma theasair gràs Dr. *Stiùbhard* o bhi 'n a flear-teagaisg gun ghràs; cha bharantas so do neach air bith dol am bannaibh na dreuchda sin, guu ghràs, gun iompachadh an Spioraid Naoimh. Ach is rabhadh 'iomradh-san do luchd-teagaisg, mar is eis-implir do luchd-éisdeachd e, co iad na h-innealan a dh' aidichear leis an Tighearn 'n a Eaglais féin.

M. M.

DR. STIUBHARD,

A'

DOL DO LEID.

Rinneadh na Rainiu so a leanas air Doctoir Stiùbhard, 'n uair chaidh e air sàl do Dhun-éidin air son a shlàinte. Air do 'n Ughdair bhi 'g amharc na luingo dol seachad, agus e féin 'n a sheasamh air bàrd, thilg na smuainte so suas dha 's an uair.

AIR FONN.—“*Is e do bhàs, Mhaighstir Murcha.*”

I.

A Longag laghach, luath-shiùbhlach,
Thigeadh gaoth anns na siùil ort,
Ni Maighstir Alastair Stiùbhard,
A stiùireadh gu tèaruint do Léid;
No tigeadh doinnionn no ciùin ort,
Na ni a ni dochunn no ciùrradh;
Ach imich romhad 'g a ghiùlan,
Gu ionad a dhùrachd, gu 'n téid.

II.

'S luachmhor an t-ionmhas a fhuair thu!
 Toiseach is taghadh nam Buachaill;
 A stiùradh threud anns na cluanaibh,
 'S am faigheadh iad suaimhneas is lòn;
 Fear na maise is nam buadhan,
 A choisinn meas dha, mar fhuair e:
 An Criosduidh deas, 's an duin' uasal:
 Is cruaidh bhi 'g a earbsadh ri Bòrd!

III.

Ach thus' tha riaghladh gu buadhach,
 Araon air shiantaibh is chuaintibh,
 'S a chuireadh air Sion a suas dhuinn,
 'N a d'Uachdaran dligheach a chaoidh,
 O, cum gu cothromach suas e,
 Builich air furtachd is fuasgladh;
 Is coimhid, an doimhne do thruais e,
 O chunnairtibh cuain agus gaoith!

IV.

'S bha thu leigheas gach creutair,
 Thàinig do d' ionnsuidh le 'n euslain,
 An làithibh turuis do chéine,
 Is t' fhulangais ghéir anns an flièoil;
 Cuir anns na meadhonaibh éifeachd,
 A chithear le léighichibh feumail;
 'S gu 'm pill e rìs o Dhun-éidin,
 Saor o gach péin agus leòn!

V.

Tha Inbhir-pheofaran cianail,
 O 'n là a thog thu do thriall uaip' ;
 I mar gu 'n luidheadh a' ghrian oirr',
 'S gu 'n iathadh uimp' sgàile na h-oidhch' !
 An sealladh cràiteach, cha 'n ioghnadh,
 A Reult ro-àluinn is fior-ghlan,
 Tha nis air fàgail a h-iarmailt,
 Rè iomadh bliadhn' a thug soills' !

VI.

'Tlia cuid, gun teagamh, innt' cràiteach,
 —Ge b'e a theirinn mu chàch dhiubh—
 A chionn an ccangal an gràdh riut,
 Nach urrainn do chàch iad a luaidh ;
 Oir 's e an eagal-s' gu h-àraidh,
 O chaidh thu idir air sàl uath',
 Nach fhaic iad tuilleadh 's an là s' thu,
 'S nach pill, gu bràth, thu gu tuath !

VII.

'S mur pill thu chaoi dh o Dhun-Eidin,
 S muladach, ciùirteach an sgeul e !
 Is iomadh sùil bhitheas deurach,
 Is cridhe bhios reubt' measg an t-sluaigh !
 'S a' chuid nach fairich am beum ud,
 Mar bhuille ghoirt agus gheur dhoibh,
 Is comharradh dearbht' orr' gu léir e,
 G'an d' luidh orr' dìth-léirsinn is cruas !

VIII.

Ach ma 's e suidheachadh 'n Ard-Righ,
—Oir ni Esan mar 's àill leis—
Gur h-ann an sud bhios do thàmh-san,
Is nach pill gu bràth thu gu Tuath;
Gu 'ma soiridh, 's gu 'm a slàn duit!
Is gu robh Criod Fear-do ghràidh-se,
Leatsa tre thurus an fhàsaich;
Ged a th' fhàgadh sinne 'n duigh truagh.

MARBHRANN

AIR

DOCTOIR ALASTAIR STIUBHARD.

I.

Och, tha ar speuran ro-ghruamach,
Is goirt an sgeula ri luaidh e,
Bhi toirt nan reul ud a suas uainn,
Bha, an tìr ar cuairt dhuinn, 'n an iùl
Ciod tha na freasdalan cruaidh' so,
Labhairt gun cheist anns an uair ruinn;
Gu 'n deònaich an Tighearn, 'n a thruas dhuinn
Cluasan chum éisdeachd na sgiùil.

II.

Gu 'n toir e 'phobull, mar 's miann leis,
Gu bhi do na freasdalaibh s' strìochdadadh;
Is gu bhi tuiteam gu h-ìosal,
'S ann aig cosaibh Chriosd anns an ùir!
Seadh, agus peacaich gu riaghailt,
Mu 'm bi an dorus air 'iathadh,
'S na nithe bhuineas do 'n sìochaint
Air 'm folach gu sìorruidh o 'n sùil !

III.

Thugadh air falbh na cinn iùil uainn,
 Bha aithnicht,' iomraideach, fiùdhail, [aibh,
 'S gu 'm b' ainneamh 'n leith'd ann an dùthch-
 Mar luchd-stiùraidh 's beathachaидh threud.
 'S a measg a' chuid dhiubh bu chliùiteich',
 Bha Maighistir Alastair Stiubhard,
 —D' am b' ainm an Doctoir mar 'b' fhiù e—
 Bha ainmeil 's na dùthchaibh 's gu léir.

IV.

Bha e ro-aithnicht' mar bhuaachaill,
 Is mar fhear-teagaisg ro-luachmhor;
 Neach anns 'n do choinnich na buadhan,
 Gun teagamh ri 'n luaidh bha gun bheud.
 Bha e caomh, iriosal, suairce,
 Is mìn, maiseach, neo-fhuaimneach,
 An crioduidh deas, 's an duin' uasal
 'N a chridhe, 'n a għluasad, 's n a bheus.

V.

Tha Inbhír-pheofaran cianail,
 Is neulach, gruaimeach a h-iarmaitl,
 'S i mar gu 'm foluicht' a' ghrian oirr',
 'S gu 'n iathadh uimp' dubh-neul a' bhàis!
 Aobhar na gruaim' ud cha 'n ioghnadh,
 Mar thuirt an sean-fhocal, 's fìor e,
 Gur h-ann 'n tra chaillear an riaghailt,
 Thig camadh is fjaradh 's a' chlàr.

VI.

Na 'm b' aithne 'n duigh dhi gu sònruicht',
 Ro-mheud a' challa 's an leòin ud,
 Shileadh gu goirt fad 's is beò i,
 Och, a leòn—c'uin nithear e slàn!
 Gu 'n dèonaich Athair na glòire,
 Am meud a mhaitheis 's a thròcair,
 Gu 'n toir e cridhe ni bròn dhi
 'S gu 'n seòl i gu tobair na slàint'!

VII.

A Mhaigh'stir Stiùbhard ro-ionmhuiinn!
 B' i mo dhùrachd bhi 'g iomradh
 Do chliù 's do bhuadhan ro-ionmholt'
 Bha iomraideach, aithnicht' measg cheud:
 Ach bhi 'g an aithris mar dh' ionrainn,
 —Oir bha iad ro ainneamh is ainmeil—
 'S gu 'n cur an rannaibh no 'n seanachas,
 'S neo-ionchuidh mo theangaidh 's mo ghleus.

VIII.

Is ged a sheinninn ni b' fhèarr iad,
 Dhuits' cha bhiodh comain no stà ann;
 Tha os-cionn molaidh do chàirdean,
 Is di-molaidh naimhdean fo ghréin.
 Ach Es' tha sacibhir 'n a ghràsaibh,
 Gu naomhaich 's gu 'm beannaich an dàn so,
 Do iomadh, is dhoibh-san gu h-àraig,
 Do 'n cràdh e nach faic iad thu féin!

IX.

A thaobh do ghibhtean 's do phàirtean,
 'S do Bhuadhan urramach nàduir,
 Is ni tha saor dhomh ri ràdh e,
 Gu 'n robh iad sud làidir is treun ;
 Ach fhuair iad snaigheadh ro-àluinn
 Fuidh 'n fhoghlum bu ghlaine 's a b' àirde,
 A thug dhoibh barrachd air àireamh,
 An àilleachd, is mìneachd, is sgéimh.

X.

Fhuair thu am foghlum a b' àirde,
 'S rinneadh 'm feum leat a b' fhèarr dheth,
 Bidh cuimhne bhuan air gu h-àraidh
 A measg chlann nan Gàidheal gu léir,
 Beannaichidh cuid anns gach àl diubh,
 'N là ghabhadh earrann is pàirt leat
 An tabhairt focail na slàint' dhoibh,
 'S a' chànmhuin a b' ionmhuinn leo féin.

XI.

Ach cha n' e foghlum no pàirtean,
 Ciod air bith feum tha, no stà annt',
 A rinn co feumail n' ar là thu,
 Is do d' shaothair ghràidh a thug buaidh ;
 Shaothraich 'm Fear-saoraidh le 'ghràs ort,
 —'San t-àm ud, gu fior, gu' m' b' àm gràidh e,
 Is bha ri fhaicinn o 'n là sin,
 Gu 'n robh 'ghràs dhuit saoibhir is buan.

XII.

Cha b' ann an toiseach do shaoghail,
 'N tra ghabh thu oifig an Aodhair,
 A fhuair thu aithn' air Fear-saoraidh,
 'S air saothrachadh 'ghràis ort le buaidh;
 Ach o fhuair thu léirs' air a ghaol-san,
 Chuir thu 'n céill e do dhaoinibh,
 Is bheannaich Esan do shaothair
 Do iomadh aon measg an t-sluaigh.

XIII.

Dh'aidich thu féin dhuinn gu saor e,
 Gur fìor gu 'n d'chaitheadh gu faoin leat
 Iomadh latha dheth do shaoghal
 Gun aithn' air an t-saors' bha thu luaidh ;
 'S gu 'n cuireadh tu seachad a dh-aonta,
 Gu teann, do sheirbhis mar aodhair,
 Chum leughaidh leabhraichean faoineil,
 D 'am mò 'n robh do ghaol anns an uair.

XIV.

Ach an Ti 'n a mhaitheas a rùnaich
 Gu 'n deantadh deas mar fhear-iùil thu,
 'N tra bha thu gun eagal gun chùram,
 An sin thug e sùil ort 'n a thruas ;
 Rinn e do choguis a dhùsgadh,
 'S dh'fhosgail gu glan e do shùilean ;
 O, thug e t-anam mar spùill dhuit,
 'S b' e sin an tra stiùireadh tu sluagh.

XV.

Chuir sud gu h-ìosal 's an ùir thu,
 Chuir sud gu tric thu gu d' ghlùinibh ;
 Nis bu tu 'n cìs-mhaoir 'n ad ùrnuigh,
 'S dhuit bu chleachdamh bha ùr sud 's an uair ;
 Is chunnaic thu nis le do shùil e,
 Gu 'm b' leisgean riamh thu gun chùram,
 Mu 'n treud gu ionaltradh 'stiùradh
 Ach gabhail an rùisg mar do dhuais.

XVI.

'S tra fhuair thu aithn' air Fear-saoraidh,
 'N a ghràs 's 'na chaoimhneas ro-chaoimh-san,
 Thug sud cridh' tiomaidh is maoth dhuit,
 Is cumadh ro-naomh dhuit 's gach buaidh ;
 Fhuair thu nis aithn' air na caoraich,
 Tearc mar a bha iad, is sgaoilteach,
 Is cheangail t-anam an gaol riu,
 'S bu ghaol e bha maireannach, buan.

XVII.

Och is truagh iad thug an leum ud,
 A steach do fhion-lios ar Dé-ne ;
 Gun ghairm a riamh uaithe féin ac',
 S gun aithn' air an sgeul tha 'd a' luaidh ;
 Seadh, tha gun aithn' air an sgeul ud,
 'N a glòir, 's 'n a toradh 's 'n a h-éifeachd,
 'O, cia mar bheathaichear treud leo,
 No blitheas iad feumail do 'n t-slùagh !

XVIII.

Ach thugar Stìopan is Glìob dhoibh,
 Is tighean còmhnuidh mar 's miann leo,
 'S tha ac' an àilghios a dh' iarr iad,
 Biodh Criod is a shoisgeul 's an uaigh ;
 'S ann leam gun teagamh nach ioghnadh
 Ged nach éisd caoraich an Tighearn,
 An teagasg tioram is blion ac':—
 Bha teicheadh riabh aca uath'.

XIX.

An Sgìre Mhaoilin gu sònruicht',
 Nochd am Fear-saoraidh a Ghàidhleachd dhuit :
 Is air do shluagh rinn e tràcair,
 Le dòrtadh orr' Spiorad nan gràs :
 A chuir gu tuireadh is bròn iad,
 O bheachd air 'n cunnairt 's an dòruinn,
 'S gu bhi gu h-obann a feòraich'
 Cia mar gheibh sinn eòlas na slàint' ?

XX.

Rinneadh 's an àm ud thu dìleas,
 An cur an céill dhoibh na fìrinn,
 'S an rathad gu ruigsinn air sìochaint,
 O theisteas na fìrinn a mhàin ;
 Be sud àm foghair' do rìreadh,
 Araon dhuit féin is do d' sgìre ;
 A leithid do àm, c' uin a chi sinn,
 'N ar sgìreachdaibh tioram is fàs !

XXI.

Thàinig á Maoilin gu tuath thu,
 Air cuireadh ìslean is uaislean,
 A chum a bhi dhoibh 'n ad bhuachaill,
 Air an robh, 's an uair ac' mòr fheum ;
 Ach leam is cinnt' gu 'm bu chruaidh leat,
 Bhi dealachadh riamh ris an t-sluagh ud,
 Mar chaoraich 'm fàsach gun bhuachaill,
 'S a' mèilich, gu truagh, as do dhéigh.

XXII.

Gun fhios co thigeadh 'n a t-àit-se,
 'N e fear bhiodh tairis is tlà riu,
 A bheireadh dhoibh ionaltradh 's àrach,
 Air cluainibh tha slàinteil is méith ;
 No 'n e an sionnach borb, làidir,
 A sgapadh 'n treud feadh an fhasaich,
 Leis 'm bu choma ged bu bhàs doibh,
 Ach fàgar an *Stìapan* dha féin.

XXIII.

'S tra chual thu 'n déigh sin, mar thàrladh,
 Nach d' fhuair an sluagh ud; 'n a t-àit-se,
 An neach a mheas iad bhi tèaruint'
 Mar bheath' no mar àrach do 'n treud;
 Leam is cinnteach gu 'm b' chràdh leat,
 An sgeula brònach a chlàistinn;
 Oir b' iad do chlann-san tre gràs iad,
 'S do ghràdh dhoibh idir cha d' eug.

xxiv.

'S chreidinn, gun teagamh, 's an uair ud,
 'N tra thugadh gairm o 'n taobh-tuath dhuit,
 Gu 'n d'iarradh comhairl' o shuas leat,
 Is mar dh' iarr gu 'n d' fhuair thu 'n ad fheum;
 Oir 's ann air comhairl' a' Bhuachaill',
 A chuireadh air Sion a suas dhuinn,
 Thigeadh do'n teachdair bhi gluasad,
 'S gach uair air a stiùireadh leis féin.

xxv.

Bha Sgir' Inbhir-pheotharan aoibhneach
 Tra dhealraich 'n reul ud le soills' oirr',
 I mar gu 'n teicheadh an oidhch' uaip'
 An oidhch' oirr' a luidh, fada, buan!
 Bu reannag shoilleir is shoillseach,
 Reannag gun smal oirr', gun fhoill innt',
 'N Teachdair, a fhuair iad mar roghnaich;
 'N a chaoimhneas thug Dia sud mu 'n cuairt.

xxvi.

'S mur d' thàinig na trom-fhrasan ùrail,
 No feartan cumhachd chum dùsgaidh,
 Nuas orra nis a bha dlùth dhuit,
 'S an ionad ùr 'n robh do chuairt.
 'S ann chionn gu 'n d' fhannaich ar dùrachd,
 'S gu 'n d' lasaich spiorad na h-ùrnuigh
 Is o' n ghlùn, ma bha i lùbadh,
 Nach robh dùrachd a' chridh' a' dol suas.

XXVII.

Gidheadh 'n ad theagasg bha éifeachd,
 Bheannaich an Tighcarn do 'n treud e,
 Is ged bu mhìn, och bu gheur thu,
 Mar ealtainn ris 'n eucoireach chruaidh:
 'S mar thug an Tighearn dhuit léirsinn,
 Chuir thu an soisgeul an céill dhoibh
 'S bu ghrinn an Gaelig 's am Beurl' thu,
 An aithris na sgéile do 'n t-sluagh.

XXVIII.

Thaobh do ghlan-fhogluim 's do shuairceis
 Bha thu riamh measail aig uaislibh,
 Gidheadh cha 'n abair 's cha luaidh mi,
 Gur h-ann chionn fuaim aoibhneich do 'sgéil;
 Ach 's ann bha meas aig an t-sluagh ort,
 'S aig na fhuair aithn' air an fhuaim ud,
 Chionn na sgéil' aoibhneich is bhuadhaich,
 A chual iad gu soillear o d' bheul.

XXIX.

O, chual iad fìrinnean luachmhoir!
 Soisgeil na sìth' is an t-suaimhneis,
 'N am brìgh, 's 'n an gloin' air an luaidh leat,
 Sud t' fhianuis air 'n t-sluagh ud gu léir;
 Sheirm thu dhoibh lagh agus soisgeul,
 Is sin gun chlaonadh, gun mheasgadh,
 'Fàgail gach anam gun lethsgcul,
 Nael gabhadh ri teisteas ar Dè.

xxx.

Thugadh dhuit tàlann, mar shaoil mi,
 'S theireadh àireamh measg dhaoin' e
 Bhi labhairt gu tlà is gu caoin riu,
 Air 'n do shaothraich gràs measg an t-sluaigh:
 Seadh, labhradh tu 'n tairisneachd chaomh riu,
 Mar neach 'n ad anam thug gaol doibh,
 'S bheireadh tu 'n lòn do gach aon dhiubh,
 Araon eadar chaoraich is uain.

xxxI.

Bu tu an labhairteach ùrail,
 'N tra sheasadh suas thu an Cùbaidh;
 Bhiodh smachd, is cudthrom, is cùram
 R' a thuigisinn o d' ghnùis anns an uair;
 An guth bu bhinn', ach bu chiùin thu,
 An cainnt bha thu ealanta, mùirneach,
 'S 'n ad theagasg simplidh is cùblraidih,
 'S a' sileadh mar dhrùchd orra nuas.

xxxII.

Bu mhìn, 's bu mhaiseach, is b' àillidh,
 Riamh thu mar fhear-tigh' ann ad fhardoich,
 Bu tu an companach gràdhach,
 'S am pàrant ro-ionmhuinn is caomh;
 Bu cheangailt' riamh ann an gràdh thu,
 Ri bochdaibh Chriosd air mhodh àraigibh,
 'S tra chitheadh tu aon do na Bràthraigibh,
 Air t-eudan àillidh bhitheadh faoilt.

XXXIII.

Ach bha do shiubhal 's do ghluasad,
 'S do chaitheamh-beath' fad do chuaire,
 'N an dearbhachd shoilleir do 'n t-sluagh ud,
 Air a' bhuaidh bh' aig do theagascg ort féin.
 Is mòr a' mhais' air an fhìrinn,
 Bhitheas am fear-teagaig ag innseadh,
 Tra tha a shiubhal co-shìnt' rith',
 Bithidh 'n tuilleadh brìgh dhuinn 'n a sgeul

XXXIV.

Bu sheasmhach, dileas an Cléir thu,
 Air taobh na firinn bhiodh eudmhòr,
 'N aghaidh gach neach bheireadh beum dhi,
 No do 'n treud a choisneadh le Criod:
 Ach an déigh chùig bliadhna deuga,
 O ghabh thu cùram an treud ud,
 Chaidh thu gu deas, a thaobh t-euslain,
 'S cha d' phill o Dhun-Eidin thu riamh!

XXXV.

O, gu 'n deònaicheadh an t-Ard-Righ,
 Am mòrachd ion-mholt' a ghràidh dhuinn,
 Na frasan ùrail is gràsmhor,
 Gu pailt ann ar là leigeadh nuas!
 A thogadh aognaidheachd bàis dhinn,
 A' ghoirt 's a' chaoil' dheth ar cnàmhaibh,
 'S a dheanadh ar Sion dhuinn àillidh,
 Air an do luidh fàsalachd bhuan.

XXXVI.

A bheireadh peacaich do rìreadh,
Tre bhioradh shaighdean na fìrinn,
Gu bhi a' glaodh, "Ciod a ni sinn,"
Chum dol as o dhìteadh do-luaidh?
Is gu bhi glacadh na Rìoghachd,
Le 'n uile neart agus dhìchioll,
'S a' dùnadh ri Slànuighear prìseil,
Gu bràth tha do-innseadh 'n a luach!

AN ROIMH-RADH.

CHUIREADH na Rainn sò ri chéile air son Teachdair' ur ramach, ris an robh mòr-cheangal aig an ùghdair, o'n cheud là riamh a chual e a theagasc—a nis o cheann fagus do dhà-fhichead bliadhna. 'S e a bliàs a bhi tighinn tric f' a chomhair 'inntinn, agus a toirt gu a chuimhne buadhan an fhir a dh'fhalbh, a ghluais idir e gu an cur ri chéile. Bu toigh leis a bhi smuaineachadh air a charaid a nis nach faiceadh e tuilleadh; agus bu toigh leis am bròn a bha na smuaintean s' a' toirt 'n an cois. Dhoibh-san a ehuir eòlas air an teachdair féin, tha e soilleir gu 'm bheil na chuireadh sìos anns na rannaibh so, 'teachd fad an déigh làimh air na dh' fheudadh bhi air a ràdh m'a thimehioll; oir gun teagamh, bha "a ehliù, 's an t-soisgeul, feadh nan eaglaisean uile." Ach gèarr mar tha iad air a ehliù sin a bhuinneadh dha, agus a fluair e, araon an tuathl 's an deas; agus neo-ionlan mar tha iad air iomadh dòigh eile, chuireadh a nis a mach iad, air iarrtus càirdean au teachdair', agus cuid eil' aig an robh dlùth-cheangal ris, am fad 's bu bheò e. Agus 's i dùrachd an Ughdair gu 'm biodh iad air am beannachadh dhoibh, agus do iomadh a thuilleadh orra-san—ach gu h-àraidh do 'n mheud

leis am bu mhiann bhi a' cuimhneachadh cliù, is teagasg, is beusan, an teachdaire o'n do chual iad gu tric an fhuaim aoibhneach—ach a nis nach cluinn iad tuilleadh—agus am bròn co beag feum 's a rinn iad deth 'n uair a bha e aca, agus a theangaidh a nis 'n a tosd fo sheul a' bhàis !

E. D.

FOCAL IOMRAIDH

AIR

MR. ROBISON URRAMACH,

D' AN RINNEADH AM MARBHRANN A LEANAS.

Tha uiread air a chur sìos 's a' Mharbhrann féin, nach ruig sinn a leas mòran tuilleadh iomraidh mu a chliù a chur sìos. Dhoibh-san do nach b' aithne an duine caomh, urramach so, cha 'n 'eil againn ach ar fianuis a thoirt, nach 'eil aon ni 's a' mharbhrann, ach ni a dh' fhoillsicheadh 's a chaidh a dhearbhadh, gu soilleir, farsuing, 'n a chaithe-beatha, 'n a theagascg, 's 'n a shaothairibh gràidh, 's an fhòn-lios. Feudaidh an t-ùghdair, gun teagamh a ràdh, mar thubhairt bàrd àraig ann an co-dhùnadhbh marbhrainn a rinn e do dhvine measail,— “Cha do luaidh mi mu 'n duin' ud, ach buaidh a chunnaic mo shùilean.

Rugadh Mr. Iain Robison, 's a' bhliadhna 1757, ann an *Achanahalraig*, dlùth air Caisteal Gòrdan, an Siorram: achd *Bhainbh*. Fhuair e cothrom sgoile ann an làithibh 'òige; agus thog e a chuid ionnsuchaidh gu h-ealamh. Fhuair e bhi 'n a mhaighstir-sgoile 's a' bhliadhna 1778; agus chuir an Comunn urramach an Dun-éidin e, 's an dreuchd so, do Sgìreachd *Far*, ann an Siorramachd *Chataoibh*, gu àite d' an ainm *Ach-a-nis*, am bràighe na

sgìreachd sin. Cha robh e ach ùine ghoirid 's an dreuchid, agus 's an àite so, gus am faca ministeir tuig-seach 's a' choimhearsnachd, gu 'm bu duin' òg e air an do bhUILICH an Tighearn tiodhlacan agus comasan inntinn a bha neo-àbhaisceach. Agus mhisnicheadh e leis a' mhinisteir sin, agus le ministeiribh eile aùn an Cléir *Thunga*, gu dol air aghaidh ann am foghlum, agus amharc ri dreuchd na ministreileachd. Cha ruig sinn a nis air iomradh poneail a thabhairt mu 'n àm, no mu 'n dòigh àraid 's an do thoilich an Tighearn obair nan gràs a thòiseachadh 'n a anam; ach a mhàin làndearbhachd bhi againn gu 'n do thòisicheadh ann i, an làithibh 'òige, agus gu 'n do dhearbh a chaithe-beatha siu, anns gach ceum. Cha b' i gairm dhaoine a mhàin a fhuair e; agus dhearbhadh singu paitl, leis an tomhas mhòr agus fharsning 's an d' aidich an Tighearn a sheirbhis an déigh sin. An déigh dha feitheamh air meadhonaibh an fhoghlum iomchuidh ann an Oil-thigh Dhun-éidin, fhuair e comas searmonaehaidh 's a' bhliadhna 1788, agus air an ath-bhliadhna ghairmeadh e gu bhi 'n a fhearr-teagaisg do choimhthional *Acharainidh*, ann an *Gullaobh*—cha b' Eaglais Sgìreachd i sin, ach àite Gàidhealach am bràighe na dùthcha sín, far an robh e 'n a *Mhissionary*. An déigh dha bhi mu chùig bhliadhna 's an àite sin, fhuair e an ath ghairm gu dol do chèarna eile do 'n fhion-lios,—*Erioball*, ann an *Dùthaich Mhic-aoidh*, far an robh aige bhi a' searmonachadh do thrì coimhthionalaibh, an Sgìreachd *Thunga*, an Sgìreachd *Dhiùrinis*, agus an Sgìreachd *Eadar-achaolas*. Agus an ceann chùig bliadhna a rìs, fhuair e an ath ghairm, o 'n choimhthional Ghàidhealach ann am baile *Bhòid*. Shaothraich Mr. Robison 's a' choimhthional sin mu aon bhliadhna deug; agus fhuair e an ath

ghairm an déigh sin, gu Sgìreachd Chinne-ghiùbhsaich, am *Bàideanach*, far an do bhuanach e 'n a shaothairibh, mu ùine chùig bliadhna deug, gus an d'fhuair e gairm an Ard-mhaighstir dol dachaith; air a' cheathramh là do inhòs meadhonach an earraich, 's a' bhliadhna 1825.

Tha aou ui sònruichte r' a amharec air ann am beatha an duin' urramaich so,—mar fhuair e co iomadh gairm, agus eo iomadh atharrachadh a thaobh ionadan a shaothrach, ann an seirbhis an t-soisgeil. Agus ged tha so ri amharec air 's a' choitchionn, mar ni nach tigeadh do 'n Eaglais no do a luchd-teagaisg bhi an geall air; gidhcadh, feadar a ràdh le saorsa, nach b' ionann Mr. *Robison* agus iomadh duin' eile. Agus ann an amharec air a' chùrsa 's an do ruith e, rè làithean a chuairt; bha, agus tha fathast, comharraidhean sònruichte air an tabhairt, gu 'n robh obair àraig aig an Tighearn r' a dhèanamh leis, anns gach àite agus cèarna far an do shaothraich c. Bu duine Mr. *Robison*, a bha a' tighinn beò do rireadh, am fagus do 'n Tighearn. Bha a sheasamh aige ann an comhairle an Tighearn. Tha a rùn-san aig an dream d' an eagal e gu fìor: agus bha sin r' a fhaicinn air an duin' urramach so. Ged bha an Soisgeul air a shearmonachadh roimh dha dol ann, anns a' cheud dà àite far an do shaothraich e, chunncas ath-bheothachadh iongantach air obair an Tighearn, an déigh dha dol ann. Agus fhad 's a thoilicheas an Tighearn a shoisgeul glòrmhor féin a chumail air chois, agus fianuisean dha féin a measg an t-sluaigh, cha di-chuimhnichear gu bràth, teagasg agus saothair agus cliù Mhr. *Robison*. Tha iad fathast r' am faotainn anns na cèarnaibh ud mu thuath, gu 'n aithnicheadh tu air an gnùis, ri luaidh ainm an duine bheannaichte so, gu 'n do chuir an Tighearn do rìreadh buaidh dhoibh-san 'n a theagasg

“Scadhl, tha an Spiorad ag ràdh, clinm gu ’m faigh iad fois o ’n saothair; *agus leanaidh an oibre iad.*” Agus ged nach b’ i siu beachd an t-saoghail, cha ghearrain teaghlaich a’ chreidimh gu ’n abradh sinn e,—a thaobh an dà choimh-thionail mu dheireadh, far an do shaothraich Mr. Robison,—nach robh an Soisgeul, gu fallain no gu soilleir air a shearmonachadh ’n am measg, gus an do stiùir an t-Ard-bhuachaille Mr. *Robison* d’ an ionnsuidh, agus sin air slighe nach b’ aithne dha féin, gus an d’ ràinig gach gairm dhiubh sud fa leth e; agus an sin, gu ’n d’ fhuair e breithneachadh gur h-ann o ’n Tighearn a bha iad. Eadar e féin agus an coimhthional ann am baile Bhòid bha ceanglaichean ro-dhlùth, fo bhannaibh an t-soisgeil. Bu “lòchran lasarach agus dealrach e,” cha b’ ann a mhàin ’s a’ choimhthional sin féin, ach air feadh nan cèarnan timchioll: agus ged b’ iomadhù sàruchadh a fhuair e, eadhon o luchd-drenchd Eaglais, a bha coimh-each, bha an Tighearn ’g a aideachadh;—bha aui flianuis ge-san ann féin; agus tha fianuis fathast a’ leantunin a shaothrach. Mu thimchioll a shaothrach agus mar dh’ aidicheadh e ann au Sgìreachd *Chinne ghiùbhsaich*—cha tig dhuinn labhairt gu farsuing; ach ann am focal, a ràdh, gu ’n robh an Tighearna maille ris. Tha iad fathast a làthair ’s an Sgìreachd agus air feadh na dùthicha sin, a dh’ aidicreas, gu ’m b’ e là an sonais dhoibh, an là, s an d’ fhosgail an Tighearn dorus dha gu a thighinn ’n am measg:—tha; anama, agus tha dòclias nach ainneamh iad, d’ am bi a chuimhne blasda, fhad ’s a chaomhnuas an Tighearn iad ’s an fhàsach. Aidicear leo-san, gur h-e an Tighearu a chuir ann e.

Bu duine Mr. Robison, gu ’m b’ ainueamh a leithid, air iomadh dòigh. Cha tuilleadh ’s a’ chòir dhuinn a ràdh, gu ’m b’ urramach e eadhon a mcasg nan urram-

ach ! Blia a chomasan, eadhous mar thiodhlacaibh nàdurras, àrd, foghainteach, bunaiteach, farsuing. Agus 'n uair dh' analaich an anail bheò orra sin; 'n uair dhealraich an solus a stigh orra, 'n uair bhaisteadh le *teine* iad, mar a rinneadh do rìreadh; an sin, b' àillidh agus bu chumhachdach an t-inneal a dh'ulluich gràs, air son na seirbhis a chum an do ghairmeadh e. Gun a dhùthchas bhi Gàidhealach, b' flianuis do na tiodhlacaibh a chaidh a bhuleachadh air, mar choisinn e a' Ghaelig; gu 'n d' fhuair e a leithid do ghreim oirre, cadhon mar chànan, nach aithnicheadh duine 's am bith uach b' i a chànan mhàthaireil, dhùthchasach i. 'S i eadhous bu roghnaiche leis féin: agus bha iomadh, d' am bu choimh-dheis am focal éisdeachd anns a' chànan so no 's a' Bheurla, leis am bu roghnaiche Mr. Robison éisdeachd's a' Ghaelig. Agus b' e féin aig an àm cheudna idir nach do chaill a chuid Beurla, ach a dh' fheudadh a labhairt ri riglribh. O thus na réise a ruith e, 's ann a thàinig Mr. Robison a mach, ann an treunad neirt. Gheibhleadh 'n a theagastgaoibhreas do bhlasdachd nan gràs. Bha bunaiteachd, soilleireachd, farsuingeachd, agus ùghdarras r' am faotainn 'n a theagastg, a bha iongantach, aiinneamh r' am faotainn. Bha tomud, brigh, agus farsuingeachd tuigse ann an cuartachadh 's ann an cuimseachadh nithe spioradail, ann an togail inntinn an Spioraid 's an fhocal ; bha so uile ann a leithid do thomhas air a bhuleachadh air, agus nach robh, theireadh tu, focal a labhradh e, nach seasadh air a bhonn féin :—ach cha b' ann ! ach air bonn neo-ghluasadach na firinn a sheasadh, 's a dhealraicheadh iad, ann am maisc 's an sgèimh na firinn, mar tha i sin ann an Iosa Criod. Chiteadh gu soilleir, gu 'n d' rinnceadh 'inntinn do rìreadh 'n a li-ionnhas a bha saoibhir. Ann au sgoltadh 's ann



an mineachadh theagasan bunaiteach an t-soisgeil, far am bu shioilleir do a luchd-éisdeachd gu 'n fhuair e féin fois agus sòlas, bha soilleireachd, teas-ghràdh, mìneachd, agus ùghdarras mar a' co-choiseachadh a chèile: agus e gu dian agus gu dileas a' trèorachadh a luchd-éisdeachd a chum na Cairge bith-bhuain, mar bhrigh agus mar shùim a theagaisg. Ma 's ceadaichte dhuinn sloiuneadh an duinealais a thoirt do ghiùlan agus do ghuìis fir-teagaisg ann an tigh 's ann an seirbhis Dhé, cha b' aithne dhuinn idir, 's cha 'n fhaca sinn, c' ait an robh e mar ann an gnùis Mhr. *Robison*; agus so, cha b' aun idir mar an-dànaichd; ach fo fhiamh agus eagal diadhaidh, a chiteadh aig an àm cheudna eadhon 'n a eudan cheanalt; —a thugse agus a ghràdh araon mar ag iarruidh greim a dheanamh air anamaibh; agus gu 'm faigheadh e an giùlan leis air falbh o dhìomhianas, 's o thruaillidheachd, 's o dhìteadh; 's a' foillseachadh a' ghràidh siu, clìteadh a shùil làn, agus cha b' aiumig a shil iad. Ach 's ann gu sònruichte, ann an co-flaireachduinn ri cloinn na h-ath-bhreith, 'n au àmligharaibh agus 'n an anmhuiinneachdaibh, a gheibh teadh araon a chaomhalachd, a dhìlscachd, agus a ghràdh, anu an spàирн cleachdaimhl, 'g an gairm, agus 'g an tàlaidh a dh' iounuidh ionaid am fasgaidh agus an suaimhneis. Is aun an so, cuideachd, a chìteadh fìor irioslachd agus fìor chaoimhneas, a' cur dreach air a ghnùis, a bheireadh fianuis do 'n auam shàruichte, gu 'n robh an duine ud, e féin, gun teagamh, air ionnlad ann an tobar a' ghràidh shìorruidh, a shuidheachadh aige ann an dearbh uchd a' ghràidh shìorruidh, agus e 'g a mhìneachiadh 's 'g a mlioladh. B' nrramach, agus bu ghràdhach an scalladh, os ceann gach àite eile 's an seasadh e, Mr. Robison, aig ceann bòrd an Tighearn; a chìridhe làn, 'auam mar air a

dhòrtadh a mach, ann am briathraibh spioradail, sèimhe, cudthromach, agus e mar ann an làthair a' chroinncheusaidh, a' moladh agus a' cliùthachadh an Uain. Is tric a shaoil sinn gu 'n fhuair e an sud, air dhòigh àraig, èarlas an òrain nuaidh, 'n a uchd agus 'n a bhilibh; agus a spiorad a' géilleadh fo chumhachd a sheallaidh air ionmhasaibh do-rannsuichte gràidh Dhé ann an Criod. A Mhr. Robison urramaich! chuir Saor-ghràs an t-urram ort 'n ad latha, gu 'n do thionaileadh a stigh leat na caoraiich chaillte gu lòn-mhor,—gu 'n do bheathaicheadh an treud leat! gu 'n d' altruim thu naoidheana an teaghlaich, agus gu 'n d' fhàs iad suas fo 'n ionaltradh, a thugadh dhuit as an leth gu a roinn orra. Agus gu cinnteach b' e sin do shonas 's an fhàsach. T' fhalluinn gu 'n tuit air do chloinn 's air cloinn do chloinne! Gu 'n togadh an Tighearna suas do leithide, ann an àm feuma aobhair an Rùin shìorruidh, 'n ar n-Eaglais.

M. M.

MARBHRANN

AIR

MR. EOIN ROBISON.*

I.

THA Bàideanach an diugh fo ghruaim;
A teachdair' àillidh thugadh uaip';
'S e bhi g' a chàradh anns an uaigh,
Thug sgeula chruaidh r'a aithris dhuinn.

II.

Ar leam gu 'n cluinn mi sean is òg,
Air feadh na tìr', ri gul is bròn:
Is dhoibhs' d' am b' àbhaist bhi ri ceòl,
Cha 'n eòl an diugh bhi aighearach.

III.

Cha 'n ioghnadh 'm bròn ud—'s i a chaill
An solus àluinn bha gun fhoill,
Bha tabhairt blàth's dhi agus soills',
Gu tric rinn aoibhneach, subhach i.

* AIR FONN, *Is tu mo luaidh, &c.*, no fonn 's am bith eil' a bhitheas freagarrach. Agus an cois gach rainn fa leth, feudar an Luinneag so a sheinn:—

Far och, is òch, is och mo leòn!
Tha fear mo rùin, an diugh, fo 'n fhòid!
Tha fear mo rùin, an diugh fo 'n fhòid!
'S cha téid air ceòl, no aighear leam!

IV.

An solus chuireadh gean is sùrd,
 Air luchd a' chridhe bhriste bhrùit',
 Is do 'n fhear-thuruis bheireadh iùl,
 A stiùireadh ceart gu Sion e.

V.

Ach theich a nis an reannag shoills',
 Is dh' fhàg sud Bàideanach fo 'n oidhch',
 Och, dh' fhàg sud Bàideanach fo 'n oidhch',
 'S a h-aoibhneas phill gu dubhachas!

VI.

'S cuireadh i uimp' a culaidh bhròin,
 Oir fhuair i aobhar nis gu leòir,
 Och, fhuair i aobhar nis gu leòir!
 Is mheud a leòin cha 'n aithne dhi!

VII.

A Mhaighstir ROBISON na h-àill' !
 Bu ghoirt am buille dhuinn do bhàs;
 Is iomadh neach do chloinn nan gràs,
 Rinn sud ro-chràiteach, muladach.

VIII.

Oir 's tearc iad b' urrainn domh a luaidh,
 Do theachd'ribh treun an Tiomnaidh Nuaidh,
 A réir mo bheachds', a thigeadh suas,
 Riut féin a'm buadhaibh urramach.

IX.

Bha agad gibhtean aithnicht', treun,
 Is buadhan nàduir bha d' an réir;
 Ach thug thu 'm barrachd measg nan ceud,
 An tuigse gheur, 's am breithneachadh.

X.

'S a thaobh gach buaidh dhiubh sud gu léir,
 Bu chuimseach freag'rach iad r'a chéil':
 Gach aon diubh deanamh gnìomh a dreuchd,
 'S gu grinn le chéil' ag oibreachadh.

XI.

Is maирг air gibhtibh dheanadh tàir,
 Tha teachd a nuas o 'n Ti a's Aird',
 Oir ged—dhiubh féin—nach dean iad stà,
 Ni cumhachd gràis 'n am beannachd iad.

XII.

Oir feuch, na cnàmhan bha 's a' ghleann,
 Bu bheag an stà 's am bladh 's an àm;
 Ach shéid an anail bhlàth, neo-fhann,
 Is rinn, gu teann, i 'm beothachadh.

XIII.

Mar sin a thaobh do ghibhte treun-s',
 Ged nach robh stà annt, mar dhiubh féin,
 Gidheadh rinn cumhachd gràis dhiubh feum,
 O 'n là 'n do shéid an anail orr.'

XIV.

Seadh, shéid an anaïl bheò is bhlàth,
 Air t-anam féin, an tùs do là; [bràth,
 'S mu 'n deach thu steach do 'n dreuchd gu
 Thug Iosa gràs neo-chumant dhuit.

XV.

B'e t-àm—'s an uair ud—àm a' ghràidh,
 Tra thuirt e riut, "Bi beò gu bràth;"
 'S tra "thilg e 'thrusgan ort mar sgàil,'"
 A' dortadh 'ghràis mar thuiltibh ort.

XVI.

'S e sud thug cumadh ceart is gleus,
 Do d' bhuadhaibh urramach-s' gu léir;
 Rinn cneasd' iad riamh an obair Dhé,
 'S mar iolair speur thug siubhal doibh.

XVII.

Chuir sud ort maise naomh is snuadh,
 Nach d' fhàg a riamh thu fad do chuairet;
 O 'n ath-bhreith ghlan, thig toradh buan;
 Is fhuaireadh annads' soilleir sud.

XVIII.

Bu mhòr a' bheannachd dhoibh-s' gu léir,
 A rachadh steach do fhion-lios Dhé,
 Mu 'n gabhadh iad orr' stiùradh threud.
 ~ S a' cheums' gu 'n leanadh t-eisimplir.

xix.

Oir ged a bhiodh ac' cuibhrionn gràis,
 'N an dol a mach, gu moch, mar b' àill,
 Theagamh fathast gu 'n d' thig an là,
 Gu 'm faigh sud sàr, nach aithne dhoibh.

xx.

'S e 'n tomhas gràis, is gibhte treun,
 A chunnaic Bràithrean annad féin,
 A thug dhoibh comhairl' chur r' a chéil',
 A chum na dreuchd—gu t-ulluchadh.

xxi.

'S ged bha do chothrom mò is gann,
 Cha robh do dhìchioll idir fann;
 Ghrad thog thu foghlum nach robh gann,
 'S do chùrs', gu teann, ghlan-ruitheadh leat.

xxii.

Ach bha m' Fear-saoraidh air do stiùir,
 A' fosgladh 'bhealaich dhuit 's an iùil,
 Is thug e dhuit-s' bhi leantuinn dlùth,
 Gach ceum do 'n iùl a nochdadadh leis.

xxiii.

Is diomhair ròidean freasdail Dhé,
 A shuidhich e 'n a rùintibh féin,
 S a' chuan gu minic tha a cheum,
 'S e féin a bheir gu solus e.

XXIV.

Co luath 's a dh' fhosgaileadh do bheul,
 Chum soisgeul Chriosd a chur an céill,
 An àite *leanaban* deanamh sgéil,
 'S e theireadh 'n treud* gu 'm b'. *Athair* thu.

XXV.

'S mar theireadh iadsan, amhluidh b' fhior;
 Oir 's i an obair ort rinn Criod,
 Mu 'n deachl' thu steach do 'n fhionain riamh,
 Chuir iomádh bliadhn' a thoiseach ort.

XXVI.

Thug sud dhuit aithne ghlan is gheur,
 Air beath' nan gràs, a'm pobull Dhé,
 Air chor 's tra chuireadh tu i 'n céill,
 Nach robh do sgeul r'a shreadh leat.

XXVII.

Thainig thu mach mar ghaisgeach treun,
 An ainm 's an neart t-Fhir saoraidh féin;
 Bu tu an gaisgeach sgairteil, gleust',
 Oir rinn e féin do dheasachadh.

* Leis an fhocal sin *an treud*, mar tha e air a glìnàth-achadh an so, agus an iomadh earrann eile do 'n dán, tha r' a thuigsinn, cha 'n e an coimhthional, ach *fior phobull an Tighearna*, 'n am measg.

XXVIII.

'S e rinn deasaicht' thu is gleust'
 Chum lagh is soisgeul chur an céill;
 'S gach aon diubh sud 'n a àite féin,
 Gun *troimh-a-chéil'*, gun *mheasgachadh*.

XXIX.

Och b' òrdail, soilleir, sultmhòr, réidh,
 Dheanadh tu 'n làimhseachadh lc chéil',
 Ionnus gur neach gun tuigs', gun chéill,
 Nach deanadh scum no toradh dhiot.

XXX.

Is thugadh gibht' dhuit, mar an ceudn',
 Air samhlaibh dìomhar leabhair Dhé,
 Bhi deanamh iomraidih ghlain is réidh,
 'S bhi nochdadadh 'm feum gu soilleir dhuinn.

XXXI.

Seadh, nochdadadh mach leat brìgh is feum,
 Gach samhl' is cosmuileachd gu léir,
 'S mheasadh iad sud lcat mar a' chéis,
 'S e 'n scud bha 'n stigh, a leanadh tu.

XXXII.

Ach thaobh gach fìrinn chuir thu 'n céill,
 O 'n leabhar bheannaicht' ud gu léir,
 Bu shoilleir aithnicht' e do 'n treud,
 Gu 'n d' fhuair thu fèin orr' faireachadh.

XXXIII.

'S maille ri faireachadh is léirs',
 Bu mhòr do bhreithneachadh, 's bu gheur,
 An nithibh diomhair Spiorad Dhé,
 Oir bha e féin 'n a sholus duit.

XXXIV.

Gu h-àraid anns an t-soisgeul shìor,
 Mar ann an sgàthan, soilleir, fìor,
 Chunnaic thu glòir is àillteachd Chriosd,
 B' e féin a' ghrian a dhealraich ort.

XXXV.

Chunnaic thu 'n sud, le gnùis gun sgàil,
 'S e glòir a phears' is glòir a bhàis;
 Seadh, glòir a chumhachd is a ghràis,
 Is glòir na slàint' a choisinn e.

XXXVI.

'S tra bhiodh tu 'g iomradh glòir na saors',
 —Mar thàrladh roimhe so do Mhaois—
 Bha cuid, aig uairibh, leis 'n do shaoil,
 Gu 'm fac iad t-eudan lasadh leath.

XXXVII.

Is truagh iad chuireas eòlas fuar,
 An àit an t-soluis tha o shuas,
 'S a ghabhas orr' bhi teagastg sluaigh,
 Le luaidh na sgéil nach aithne dhoibh.

XXXVIII.

'S fior, gu 'm feud eòlas nach bi gann,
 Is tomhas foghluim bhi 's a' cheann,
 Seadh, 's feudaidh teangadh ealant, theann,
 Bhi ac', 's an àm, chum labhairt leo.

XXXIX.

Abair gur guthaich iad ro-bhinn,
 'S gur glan tha'n t-searmoin ac' 'n an cuimhn',
 Is air a snaitheadh leo co ghrinn,
 'S ged shìnteadh roinn an locair oirr'.

XL.

Ach cia-mar, idir, ni iad luaidh
 Air soisgeul Chriosd, 'n a ghlòir 's 'n a bhuaidh,
 Le tuigse dhuirch, is cridhe cruaidh,
 Is coguis thruagh gun mhothachadh.

XLI.

Oir ged ni 'n dall air datliaibh sgeul,
 Am maise riamh cha 'n fhac e féin;
 'S ged bheirear bruidhean as an eun,
 Cha tuig e féin 'n a theirear leis.

XLII.

Is mar bha t-eolas, b' amhluidh t-eud,
 'S bu ghrinn a chòrd iad sud r' a chéil';
 Bha t-eòlas deanamh mach nan ceum,
 Is t-eud, gu teann, bha siubhal annt'.

XLIII.

Is faoin an t-eòlas tha gun eud,
 Mar sholus eugaidh fuor na Ré,
 Ach 's mòr an cunnart, mar an ceudn',
 Tra ghabhas eud an toiseach air.

XLIV.

Ionann 's mar luing air chuan gun stiuir,
 Le onfhadh gaoith, gu h-àrd, 's na siùil;
 'S e 'n cunnairt—'n àit bhi ruith a càrs',
 Gu 'm bris 'n a smùr air creagaibh i.

XLIV.

Ach bitheadh eòlas air an stiùir,
 Is bitheadh eud mar ghaoith 's na siùil,
 'N sin ruithidh 'n long gu réidh a càrs',
 Is stiùirear ceart gu caladh i.

XLVI.

Ach cuiream m' fhianuis air do threud,
 Is air na chual a riamh do sgeul,
 Mur robh thu dian air taobh do Dhé,
 Is eudmhòr anns na theireadh tu.

XLVII.

'S mar chaidh thu mach an ainm do Dhé,
 Bha esan leat ri fad do ré;
 Is feartan tlàth a Spioraid féin,
 Mar drùchd nan nèamh bha sileadh ort.

XLVIII.

Bu tric a leughtadh ann do ghnùis,
 Is tre do theagasg, sileadh 'n drùchd';
 Bhiodh deòir na leaghtachd ann do shùil,
 'S bu chùbhraidh, glan, na theireadh tu.

XLIX.

Bha 'n dealt ud sileadh ort-s' gu dlùth,
 O là gu là, ri fad do chùrs;
 'Se sud rinn riamh thu beothail, ùr,
 'S a chum ro-dhlùth ri d' oifig thu.

L.

Is mar fhear-labhairt, 's tu bha gleust',
 Ro-ealant', faobharach, is geur,
 Sòluimnte, sòlasach, is sèimh;
 Gun ri do sgeul, bhi fadalach.

LI.

Their iomadh leam-s' e, measg an t-sluaigh,
 Gun d' fhuair thu gibht' is comas luaidh,
 Araon bha taitneach do na chluais,
 'S a bhuidhaincheadh air cridheachaibh.

LII.

Bu tric a fhuair thu pailteas saors',
 An deanamh luaidh air nithibh naomh';
 Ach fhuair thu ciall bhi 'cleith do dhaors',
 'S bhi seirm, gu saor, an t-soisgeul dhuinn.

LIII.

Bha agad innleachd thar nan ceud,
 A thaobh gach fìrinn chuir thu 'n céill,
 Bhi labhairt sud ri tuigs' an treud,
 Is mar an ceudn', ri 'm faireachduinn.

LIV.

Ach 'n àit bhi cumadh focail Dhlé,
 Ri beachd no faireachduinn an treud,
 Nochdadh tu 'm focal dhoibh gu léir,
 Mar riaghailt Dhé do 'n fhaireachduinn.

LV.

Ach b' e mo bheachd-s' ort, iomadh uair,
 Gu 'n robh an fhìrinn bhiodh tu luaidh,
 'A tighinn uait-s' le smachd is buaidh,
 Nach cualadh leam aig iomadh neach.

LVI.

Oir réir nan nithe bhiodh tu luaidh,
 Chìteadh 'n a t-eudan faoilt' no gruain;
 'S bha sud a' faighinn tuilleadh buaidh,
 Air cridhibh 'n t-sluaigh bha feitheamh ort.

LVII.

Is fìor, nach faigh am focal buaidh,
 A dh' aindeoin achd an téid a luaidh,
 A dh' easbhuidh cumhachd Dhé nan sluagh,
 A bhi, 's an uair', 'g a chuideachadh.

LVIII.

Ach far 'n do chuir e roimhe féin,
 A bhi le 'shoisgeul deanamh feum,
 'N sin bheir e deasachadh is gleus,
 Do 'n *Inneal*, réir na h-oibre sin.

LIX.

'S tha cuid tre m' beannaich e an sgeul,
 A chionn gu 'n d' chuireadh iad leis féin;
 Ach cuid, 's cha dean e leo-san feum,
 Oir ruith iad féin, 's cha d' chuireadh iad.

LX.

An cur an t-soisgeil leat an céill,
 Gheibheadh am peacach, 's leanabh Dhé,
 'S gach seòrs fa leth am measg an treud,
 An cuibhrionn féin, mar bhuiteadh dhoibh. |

LXI.

Ris a' pheacach bhitheadh tu geur,
 A' cur a chunnairt dha-s', an céill;
 'S a' deanamh mach o leabhar Dhé,
 A chiont, is 'fheum air teasairginn.

LXII.

Ach 's tu a thagradh ris gu dian,
 A chum a tharruing dh' ionnsuidh Chriosd,
 'S a chum a ghlacadh leat mar iasg,
 Gun dàil, an lòn a shoisgeil-san.

LXIII.

Bha cuid a shaoil—na 'm b' e 's gu'm b'fhior,
 Gu 'n tugadh nàdur gaol do Chriosd—
 Gu 'n tàlaidh' tus iad, le do rian,
 Gu miannachadh dol maille ris.

LXIV.

'S tu chuireadh sgaireachduinn ro-gheur,
 Eadar an cealgair 's leanabh Dhé,
 A' deanamh soilleir dhoibh le chéil',
 Gach ceum d' an eadar-dhealachadh.

LXV.

Cha d' chuireadh riamh leat mòr do 'n ùin,
 No neart do theagaisg, air a chùis;
 Gheibheadh an cealgair uait a chliù,
 Ach 's tu nach biodh fada ris.

LXVI.

Oir mheasadh leat-s' mar fhìrinn dhearbht',
 Gur ionann peacach 's fear na ceilg;
 'S gu 'n robh gach neach dhiubh fo'n aon fheirg,
 Is sheirmeadh tu an soisgeul dhoibh.

LXVII.

Ach b' e do dhùrachd, air gach dòigh,
 Do chlannaibh Dhé, bhi toirt an lòin;
 Bhi toirt an sàth, do 'n aran bheò,
 A dh' òrduicheadh le 'n athair dhoibh.

LXVIII.

Bu tric chuir sealladh dheth an gnùis,
 Gun dàil, air t-anam, fonn is sùrd;
 Bhiodh deòir an aoibhneis ann do shùil,
 Is faoilt' do ghnùis a' lasadh riu.

LXIX.

'S tra rachadh steach thu 'n ceann na sgiùil,
 'N sin chìteadh beothachadh 's gach sùil—
 'N sin chìteadh aighear air gach gnùis,
 Mar ùraileachd an earraich orr'.

LXXX.

Ach 's tu a labhradh riu gu caoin,
 Mar neach bha ceangailt' riu an gaol;
 'S bu tric f' an comhair fhuair thu saors',
 A' sgaoileadh mach dhoibh t'fhaireachduinn.

LXXI.

Cha b'e do thlachd, mar chuid 's an là,
 Bhi lot' no bruanadh chloinn' nan gràs,
 No rùsgadh 'n laigsean 'm fianuis chàich,
 'S a' tabhairt sàthaidh leth taoibh dhoibh.

LXXII.

Ach labhradh tu ri cor gach seòrs',
 'N am measg-san uile thugadh beò,
 A réir gach cneadhl bhiodh orr' is leòn,
 Is b' eòl duit ciod a theireadh tu.

LXXXIII.

—Labhradh tu ris an anam leònt',
 Gu caomh, 's gu tairis, mar bu chòir,
 'G 'a sheòladh, air son neirt is treòir,
 Gu Leighich glòrmhor Ghilead.

LXXXIV.

—Labhradh tu ris an anam fhann,
 A' toirt dha misneich nach bu ghann,
 'S cha shaoilteadh nis gur h-e a bh' ann,
 Ged 's gann gu' n robh an anail ann.

LXXXV.

—Labhradh tu ris an anam sgìth,
 A' cur an céill da fois is sìth,
 'S a' tabhairt sgeula dha mu 'n tìr,
 Anns nach eil sgios no an-shocair.

LXXXVI.

—Labhradh tu ris an anam thruagh,
 D' an cràdh 's d' an gearan cridhe cruaidh,
 As-creidimh, 's fàsaidheachd ro-bhuan,
 Gun bhuaidh aig lagh no soisgeul air.

LXXXVII.

D' am faireachadh—ma fhuair e gràs—
 G'an shearg gach toradh bh' ann is blàth
 Ach tre do theagastg tairis, tlàth-s'
 Bhiodh coslas blàthan fathast air.

LXXVIII.

—Ach labhradh tu ri cloinn a' bhròin,
 'S ri bochdaibh Shioin do gach seòrs';
 Is sheinneadh tu—'s ann duit a b' eòl,
 An ceòl a dheanadh subhach iad.

LXXIX.

—Sheinneadh tu'n ceòl a chuireadh fonn,
 Air cridhibh airsnealach is trom,
 Is ris an deanadh 'n t-anam fann,
 Seadh, danns' s' an àm gu h-aighearach.

LXXX.

Bha agad toiseach air an treud,
 An doimhneachd faireachduinn is léirs',
 Is labhradh tu gu soilleir, réidh,
 Ri cor, is feum, gach anam diubh.

LXXXI.

Ach ris an anam bhochd bha 'n sàs,
 Is, mar leis fein, an deighidh chàich,
 Bha annad truacantas neo-ghnàicht,
 'S cha 'n fhàgadh tu air dheireadh e.

LXXXII.

Oir tra theid ainmhidh fodh' a'm blàr,
 Cha 'n e bhi leagadh air nan stràc,
 A bheir a chaoïdh e as an t-sàs;
 'S ann dh' fhàgas sud gun tapadh e.

LXXXIII.

Ach spionar fraoch, is gearrar fàil,
 'S cuirear fo 'chosaibh sud gun dàil:
 'N sin ni 'n t-ainmhidh bochd ud spàirn,
 Is sud, 's a' bhlàr, 'n a sheasamh e.

LXXXIV.

Tha cuid chaidh dheanamh ealant', gleust',
 Air lagh is soisgeul chur an céill;
 Is cuid, d' an gibht' bhi deanamh sgéil,
 Air coraibh geur na faireachduinn :

LXXXV.

Ach 's e mo bheachd-sa, na fhuair léirs',
 Gu 'n aidich leams', 's gu 'n cuir an céill,
 Gu 'n robh gach buaidh dhiubh sud le chéil',
 'S ann anad fein a' coinneachadh.

LXXXVI.

Bu chòmhnràd, seasmhach, thu 'n ad ghluas'd;
 Bu chiallach, faicilleach, 's bu stuam ;
 Seadh, b'fhaoilteach, fearail, thu, 's bu shuairc';
 'S cha chuireadh gruaim ach peacadh ort.

LXXXVII.

Cha d' leig thu as do shealladh riamh,
 Gu 'm bu tu Oglach 's Teachdair Chriosd;
 Is choisinn sud duit meas is fiabh,
 'S gach cuideachd riamh an suidheadh tu.

LXXXVIII.

'S bu mhòr a' mhais e air do sgeul,
 Gu 'n robh do għluasad riamh d'a réir;
 'S bu għrinn a chörd iad sud r' a chéil'
 Mar cheum is làmh a' chuireadair'.

LXXXIX.

Gun teagamh, bheannaich Dia nan gràs,
 Gu saoibhir pailt do shaothair għrġaidh;
 Bidh iomradh oirr' ri fad ar là,
 Is cluinnidh 'n t-àl nach d' rugadh uimp'.

XC.

Is iomadh anam fhuair dhi feum,
 'S a chuireadh o 'm faireachadh 'n céill,
 Gu 'n robh, gun teagamh, cumhachd Dhé,
 'Cur éifeachd bha neo-chumant' innt'.

XCI.

B' e Criod gu sònruicht' brìgh do sgeòil;
 'S ann air a cheann-san 'chuir thu 'n crùn;
 'S o thug thu dha-s' a' għlōir s' an cliù,
 Thug esan gnùis do t-obair-san.

XCII.

Is chuir e comain ort, 'n a għrādh,
 A chum do sholus riut gu slàn,
 A riamh gu àm, is uair, do bhàis;
 'S e sud 'n tra smàl a' choinneal as.

xciii.

Tha luchd an fhoghluim 'cur an céill,
 A thaobh na gealaich is nan reul,
 Gu 'm bheil an solus ac' o 'n ghréin.
 Tra tha i fein a 'm folach uainn.

xciv.

Bha thusa soilleir, glan, mar reul,
 A' tabhairt soluis fad do ré;
 Ach bha do sholus-san gu léir,
 O neart na gréin' a dhealraich ort.

xcv.

Ach tha thu nis 's na speuraibh shuas;
 Oir 'n reul chaidh as an t-sealladh uainn,
 S ann 'dhealras i le tuilleadh buaidh,
 An speuraibh buan na bith-bhuantachd!

xcvi.

Seadh, dealraidh si le barrachd soills',
 'S na speuraibh ud nach faic an oidhch';
 'S na speuraibh chaoidh nach faic an oidhch',
 Thaobh soills' na gréine maireannaich!

xcvii.

Do d' thaobhs' cha dean sinn gul no bròn,
 —Na 'n rachadh leam, 's e dheanainn ceòl—
 Oir 'm bàs bha dhuit-s' 'n a bhuanachd mòr,
 'S co dheonaicheadh gu 'm pilleadh tu?

XCVIII.

Ach ged bu bhuanachd dhuits' am bàs,
 Dhuinne bu chall e, 's b'aobhar chràidh ;
 Oir ann ar Sion rinn e béarn,
 Nach slànuichear an cabhaig dhuinn.

XCIX.

Abair gu 'm faighteadh neach 's an uair,
 A sheirmeadh 'n soisgeul glan do 'n t-sluagh,
 Ach c' àit am faighteadh, 'n deas no 'n tuath,
 'S e *Maighstir buadhach Robeson* ?

C.

Cha 'n ioghnadh cridhe gort is fann,
 Bhi aig do Bhantraich, is do chloinn,
 Is bròn nach dealaich riu gu teann ;
 Oir dhoibhs' bu *Cheann nam beannachd* thu.

CI.

Ged fhuair do bhantrach iomadh bliadhna',
 Do d' chomunn brìgheil, blàth, is dòn,
 'S e theireadh i umad aig a' chrìoch,
 " Nach lughad pian an dealachduinn."

CII.

Ach cuireadh iadsan uil' an dòigh,
 Ann am Fear-saoraidh, thug an leòn,
 'S thug esan dhachaидh uath' gu glòir ;
 'S fa-dheoidh bithidh iadsan maille ris.

CIII.

Air feadh gach àit an robh do chuairt,
 —Oir bha ort meas an deas 's an tuath—
 Bithidh do bhàs 'n a naidheachd chruaidh,
 A measg gach sluaigh bha taghal ort.

CIV.

Bithidh pobull *Ghall*; is dhùth'ch *Mhic-Aoidh*,
 Is *Eilein Bhòid*, gu léir ri caoidh;
 Ach *Baideanach*—ciod nis a ni?—
 Bu ghorta dhise 'n t-saighead ud!

CV.

Tha iomadh innt-se 'n diugh ro-chiùirt'
 A chionn nach faicear leo do ghnùis,
 'S nach cluinn iad tuilleadh, 'n inneàl-chiùil,
 'S a' *chùbaidh* 'chuireadh aighear orr'.

CVI.

Tha cuid dhiubh dh' aidicreas ri 'm beò,
 Gu 'n robh iad uair-eigin 's a' cheò,
 Is gur e teagasg grinn do bheòil-s',
 Thug eòlas air an t-soisgeul doibh.

CVII.

Is och, a chuideachd—'s goirt an ni,
 Bhi faicinn naoidheanan dol dhìth!
 'S a 'm beul bhi spionadh mach na cìch,
 Tra shìneadh iad air taghal rith'!

CVIII.

Ach as na naoidheanaibh ta fann,
 Dia gu 'n gabh cùram anns an àm !
 Gu 'n nochd e tròcair dhoibh nach gann,
 'S gu 'n roinn e féin an t-aran doibh !

CIX.

'S gu 'n deònaich e bhi pailt 'n a ghràs,
 Do 'n teachdair chaomh tha nis na t-àit ;
 Gu 'n dean e feumail e 'n a là,
 'S gu h-àraidh dhoibhs' 'n a *Bhan-altruim* !

CX.

Tha cuid fhuair naidheachd chruaidh do bhàis,
 Mar shaighead gheur dol annt' an sàs,
 A' ruigsinn steach gu smior nan cnàmh,
 'S a' gabhail tàimh ro-mhaireann annt'.

CXI.

'S e th' ac-sa 'm bròn nach tiormaich trà,
 Cha 'n ann mar bhròn no tuireadh chàich,
 Rè tamuill dh' éireas suas gu h-àrd,
 'S cha luath' a bha--no shiubhail e.

CXII.

Ionann 's mar dhrùchd na h-oidhch' air sliabh,
 Ri maduinn chiùin, mu 'n d'éirich grian;
 Ghrad-theich e mar nach robh e riamh,
 Tra thilg a' ghrian a gathan air.

CXIII.

Mar sin ni cuid, rè tamuill bròn;
 Ach coinnicheadh aighear riu is ceòl,
 'S gach ni a thaitneas ris an fheòil—
 Sud uath' am bròn! 's cha 'n fhaighear e.

CXIV.

Ach feuch, an t-uisge frasach, trom,
 Cha ghabh e tàmh mar sud air thom;
 Ach theid e domhain anns an fhonn,
 'S mar 's doimhne, 's ann a's maireannaich'.

CXV.

Mar sin aig cuid, tha 'm bròn-s' a' fàs,
 'N uair tha e teireachduinn aig càch;
 Is 's e bhi teireachduinn aig càch,
 Tha tabhairt sàthaidh leasaich' dhoibh!

CXVI.

'S o chualadh leam-s', an tùs mo là,
 Do theagast buadhach, cùbhraiddh, tlà,
 Thug thu am barrachd dhomh air càch,
 A measg nam bràithrean urramach.

CXVII.

A'm aignibh 'n uair sin, fhuair thu àit;
 'S cha deach' thu asd' ri fad do là,
 'S o thugadh dhachaидh thu le bàs,
 Tha t-àit-se fathast falamh annt.

CXVIII.

Ghlan chreid mi gu 'n robh ceangal dian
 Aig m' anam ruit, mar theachdair Chriosd:
 Ach cha do chreid mi e bhi riamh,
 Cho dian, 's an déigh an dealachduinn.

CXIX.

'S na 'm bitheadh ni ann dheanamh nèamh,
 Dhomh féin na b' iarrtanaich' na chéil',
 —A mach o chomunn sior mo Dhé,—
 'S e thusa féin bhi romham ann.

CXX.

Chuir iad do dhuslach dlùth do 'n àit'
 'S an robh do sheasamh iomadh là;
 'S mar bha do bheath', tha nis do bhàs,
 Gach Sàbaid deanamh teagaisg dhoibh.

CXXI.

Tha cuid, gun teagamh, a bheir sùil,
 Le cridhe trom, is spiorad ciùirrt',
 Gu minic, air a' mhìr do 'n ùir,
 Tha cùbhraidih dhoibh, o luidh thu ann.

CXXII.

'S nach cluinn mi neach-eigin dhiubh luaidh,
 Mar so, ris féin, os-ceann na h-uaigh';
 "Och, dh'fhalbh a nis gach dreach is snuadh,
 O 'n eudan uasal, fhearail ud!

CXXII.

“Och, cas no làmh an diugh cha għluais,
 Tha iad ’n an tħamħ, fo smachid na h-uaigh’!
 Cha labhair beul ’s cha ’n éisd a’ chluais,
 ’S cha chluinnear fuaim fir-tuiridh leath’!

CXXIV.

“Tha ’n t-sùil bha soilleir, beð, is blàth,
 ’S gu tric chuir faoilt’ air cloinn nan gràs,
 —An t-sùil tre ’n leughtadh ’n cridhe tlàth,—
 Fo sheul a’ bhàis, ’s cha ’n fhosgail i!

CXXV.

“An teangaidh uair-eigin bha gleust’,
 A’ cur an t-soisgeil dhuinn an céill,
 Tha nis i ceang’lt’ fo ghais an éig,
 ’S cha dean i sgeula tuilleadh dhuinn!

CXXVI.

“Och, a luchd-àiteachaidh na h-uaigh’!
 O ’n d’fhalbh gach àilleachd nis, is snuagh,
 ’S ann oirbh a luidh an tosdachd bhuan!
 O! c’uin a għluaiseas idir sibh!

CXXVII.

“Coidlidh an durrag anns an ùir,
 Is gabhaidh ’chuileag fois an cùil,
 Ri doinnionn għeamhraidh ’s gaillionn dhlùth;
 Ach dùisgear leis an earrach iad.

CXXVIII.

“ Ach c’uin ’thig earrach thogas suas,
 Luchd-còmhnuidh thosdach chiùin na h-uaigh?
 O! c’uin a dhùisgear iad á ’n suain?
 Is fada, buan, an codal e!

CXXIX.

“ Eiridh duilleach fathast air ghéig,
 Ged ’eil an diugh i lom gun sgéimh;
 Is pillidh grian an astar speur,
 An déigh dhol as an t-sealladh uainn.

CXXX.

“ Ach c’uin a chithear orr'-san sgéimh,
 An diugh tha seartg' fo làimh an éig,
 O! c’uin a thig na gathan grein',
 Bheir éirigh dhoibh o ’n leabaidh ud!

CXXXI.

“ Seadh, pillidh blàth ’s an déigh an fhuachd,
 Is pillidh là ’n déigh oidhche bhuan;
 Ach c’uin a bhriseas là air uaigh,
 ’S a h-oidhche bhuan theid thairis uaip?”

CXXXII.

Ach anam!—coisg do thuireadh truagh;
 Oir brisidh fathast là air uaigh,
 Roimh ’n teich gu sìor a h-oidhche bhuan,
 ’S gach gruaim a riamh bha ceangailt’ rith’.

CXXXIII.

Is éiridh 'dhuslach-san a suas,
 Os-ceann 'n do ghuil thu iomadh uair,
 Le tuilleadh àilleachd, mais', is buaidh,
 No ged, 's an uaigh, nach luidheadh e.

CXXXIV.

Is Uaigh ! leans' a mach 'n diugh do bhuaidh,
 Oir fhuair thu cead o Righ nan sluagh;
 Seadh, imich romhad, lean do bhuaidh,
 Is sluig-sa suas na fineachan.

CXXXV.

Ach as do chumhachd na dean uaill,
 Oir ged is maireann da, cha bhuan,
 Oir, chean', thug Gaisgeach treun nam buadh,
 A mach a' bhuaidh gu suthainn ort.

CXXXV.

Is ann-san togar suas a mhairbh,
 'N an cuideachd ghlòrmhor—'s iad a sheilbh
 'S an teanga tuilleadh cha bhi balbh,
 Oir dh 'fhalbh gach ni a cheangail iad.

RAINN

A

RINNEADH LEIS AN UGHDAIR

AIR A

. THURUS DO EILEAN H-IORTA

ANNS A' BHЛИADHNA 1822.

M

AN ROIMH-RADH.

Chuireadh na rainn a leanas r 'a chéile, leis an Ugh-dair rè a cheud thuruis do Eilean h-Iorta 's a' bhliadhna 1822. Anns an Dàn, tha e a' deanamh iomraidh air a' chùram a mhothaich e mu staid an t-sluaigh mu 'n d' fhuair e gairm dol g'am faicinn. Ach air dha gairm fhaotainn o 'n Chuideachd an Dun-éidin a tha chum sgaoileadh Eòlais Chriosd feadh Ghàidhealteachd na h-Alba, ghabh e a thurus gun dàil. Agus anns an Dàn tha e a' cur sìos mar ghabh an sluagh ris agus ri a shaothair 'n am measg, rè ochd-là-deug :—saothair tha e ag earbsadh a bheunaich an Tighearn do chuid do 'n t-sluaigh. Bha e o 'n uair sin, trì chuairt s' an Eilean. Agus bha toileachas-inntinn aige gach cuairt dhiubh sin, ann bhi fiosrachadh an t-sluaigh. Ach 's ann air a cheud turus a tha an Dàn a' deanamh iomraidh.

TURUS AN UGHDAIR

DO

EILEAN H-IORTA.

I.

Air toirt leam smuain air an Eilean,
Tha fad o gach fearann mu 'n cuairt;
Ghrad-dhùisg mo chùram 's mo mhulad,
Ri cuimhneachadh cunnairt an t-sluaigh.

II.

Tha iad mar chaoraich gun bhuachaill,
A nochdas dhoibh cluaine no iùl;
'S do mhilleadh sìorruidh tha buailteach;
Och, 's cruachasach cianail an cùis!

III.

No mar an luing th' air a luasgadh
Le garbh-thonnaibh cuain, 's i gun stiùir;
Gun fhios ciod an taobh gus an gluais i,
No 'm buail i air creagaibh 'n a smùir!

IV.

An cor mar sin tha ro-bhrònach;
 Tha 'd buailteach do dhòruinn gun chrioch;
 Gun neach ann idir bheir cómhndadh,
 'S a nochdas an ròd doibh gu Criosc.

V.

Abair, tha cùmhnant nan gnìomh ac',
 No iarmad, co-dhiubh, dheth 'n an gné;
 Is sud an stéidh air an iarr iad,
 Gu 'n tugadh an Tighearn dhoibh spéis.

VI.

Ach tha iad bàitht' ann am fiachaibh
 'S an gnìomhran 'n an luideagaibh breun;
 Is as a' chùmhnant cha snìomh iad,
 An deilbhidh bheir dùon dhoibh no sgèimh.

VII.

Thug briseadh 'n lagha 's a' Ghàradh,
 Sliochd Adhaimh fo 'n mhallachd gu léir,
 Fo chumhachd peacaidh is Shatain,
 Is fo 'n bhàs a bhagradh mar phéin.

VIII.

Am bàs a leag sinn co ìosal,
 'S nach d' fhàg againn iarrtus no treòir,
 Gu pilleadh chaoidh ris an Tighearn,
 Mar thobar an fhìor-uisge bheò.

IX.

Tha againn sùilean—’s cha léir dhoibh;
 Is cluasan—’s cha ’n éisd ris a’ chòir;
 ’S cridheachan cruidh’, th’ air an seuladh,
 Fo chumhachd an Eig—gu ar bròn !

X.

Oir theich, gun dàil, uainn an Tighearn,
 ’N tra chreid sinn an diabhul ’n a àit;
 Is dh-fhalbh, an sin, a bheath’ dhiadhaidh,
 Is riogaich am peacadh chum bàis !

XI.

’S ann a tha nis sinn mar chnàmhaibh,
 A dh’ fhàgadh tur-sgaoilteach ’s a’ ghleann,
 Ged thigeadh gu chéil’ iad an òrdugh,
 Fathast anail bheò cha ’n ’eil annt’.

XII.

Gidheadh, ged a chaill sinn ar comas,
 Air obair a dheanamh do Dhia,
 Cha ghabhar sin uainn mar lethsgeul;
 A chòir-san tha seasmhach gu sìor.

XIII.

Oir, ’s ann a mhill le ar toil sinn,
 Gach comas a fhuair sinn o Dhia;
 Is thug sinn thairis gu slàn iad
 Do Shatan ’s d’ a obair gu dian.

xiv.

Is chionn ar ciont' is ar n-eucoir,
 Mar thréigeadh leinn Tighearn nan sluagh,
 'S nach tugamaid urram no géill dha,
 Thainig binn lagh' Dhé oirnn a nuas;

xv.

A dh' fhàg e gu léir sinn fo 'n mhallachd,
 Gun chòir bhi air beannachd no truas;
 Ach dhruid a suas sinn fo 'n chorruich,
 'S fo dhoinnionn na feirg' tha do-luaidh !

xvi.

'S am bàs ud luidh air na h-Iortaich
 —Oir co a chaidh as uaith fo ghréin?—
 Is rinn an cùis-san ni 's measa,
 Bhi gun aithne', gun fhios air, iad féin.

An cor, gun teagamh, is truagh e;
 Gun neach ann a luaidheas an sgeul,
 O chian, am Betlehem 'chualadh,
 Le buachaillibh faire an treud.

xviii.

Sgeul a mhòir-aoibhneis do dhaoinibh,
 Gu' 'n d' thàinig Fear-saoraidh do 'n fheòil,
 A chosnadhl beath' agus saorsainn,
 'Ni 'n saoradh 's an tabhairt gu glòir.

XIX.

'M bheil sinn gun choire 's gun diteadh?
 'S an sluagh ud dol dìth fa ar còir,
 Mur seirm sinn soisgeul na sìth' dhoibh,
 Mar 'n innleachd tre 'n tigeadh iad beò.

XX.

'S fior, chaidh an àireamh an tainnead,
 O thainig an galar mar sgiùrs,
 A thug luchd-cuain leo do 'n Eilean,
 Is nach d' fhàg dhiubh fear as an triùir.

XXI.

Ach ged chaidh 'n àireamh an tainnead,
 Cha lughad an t-anam 'n a luach:
 Bha còrr ann 's cùig-fichead anam;
 'S co chanadh nach air' iad air truas?

XXII.

Bu cridhe cruaidh mar an ailbhinn,
 Nach leaghadh, 's nach fair'cheadh ri 'n càs!
 Och, gun sgiathraig a' Cholumain:
 'S mi dh' fhalbhadh air iteal gun dàil;

XXIII.

Ghiùlaininn ocras is cruadal,
 Is cunnartan cuain agus gaoith':
 A chionn gu 'm faicinn an sluagh ud:
 'S gu 'n luaidhinn dhoibh naidheachd na sìth'.

xxiv.

An naidheachd ait agus aoibhneach,
 Do oighreachaibh ifrinn 's a' bhàis;
 A bheireadh beath' dhoibh, is saoibhreas,
 Seadh, oighreachd nach teirgeadh gu bràth.

xxv.

Gu bheil Iehobhah 'n a ghaol duinn,
 —'S is gaol e, nach gabh cur an céill—
 Ann an Criosd mar ar Fear-saoraidh,
 A réiteach an t-saoghal ris féin.

xxvi.

Is co nach seirmeadh an naidheachd,
 O éirigh gu luidhe na gréin' ?
 O co, ach esan nach d' fhairich,
 'S nach d' aithnich a cumhachd e féin !

xxvii.

Is mòr an t-iomart 's an t-saothair,
 Gheibhear aig cloinn-daoin' anns gach àl,
 A' tional ionmhasan saoghalt',
 'S air 'n ionmhas nach caochail, cur tàir'.

xxviii.

Théid cuid dhiubh astar air chuantaibh;
 'S air thurusainb buan', o nach pill;
 A dh'iarruidh ionmhais nach buan doibh,
 Is gu 'n luathachadh féin do 'n chill !

XXIX.

C' uime nach bithinn-s' co eudmhor,
 'S tha iadsan tha 'n déidh air an òr?
 'N gnothuch gun teagamh ni 's feumail',
 Is gu 'n abradh *Reuson*, gu 'm chòir.

XXX.

Seadh, ann an gnothach Fir-saoraidh,
 A ghràdhaich clann-daoine gu bàs,
 Is bheir an saoibhreas nach caochail,
 Tra theid saoibhreas 'n t-saoghal 'n a smàl!

XXXI.

Air dhomh mar so bhi fo chùram,
 Mu thimchioll na cùis' anns an àm,
 Cha b' fhad tra fhuair mi mo dhùrachd,
 Le cothrom is iùl gu dol ann.

XXXII.

Oir ris an Tighearn bha m' ùrnuigh,
 A thaobh meud mo chùraim mu 'n t-sluagh;
 Gu 'n deanadh Esan mo stiùradh,
 Gu ionad mo dhùrachd 'n a thruas.

XXXIII.

Tha Cuideachd urramach, ainmeil,
 'N Dun-éidin, tha dearbhta 'n an eud,
 Is bha riamh feumail, mar dh' earbtadh,
 Feadh Ghàidhealtachd Alba gu léir.

XXXIV.

A bha ri dìchioll 's ri saothair,
 Gun chlaonadh 'n an eud, no 'n an truas,
 A chum eòlas an Fhir-shaoraidh
 A sgaoileadh, réir uireasbhuidh 'n t-sluaigh.

XXXV..

Is chionn an truais ris na h-Iortaich,
 'S an cridhe bhi fosgait' d' an càs,
 Thug iad dhomh gairm dol do h-I-orta,
 A dh' fhiosrachadh cuideachd an àit.

XXXVI.

Seadh, 's a shearmonachadh 'n t-soisgeil
 Mar an sin, gun cheist, bh' orr' a dh' fheum;
 'S gach meadhon, òrduicht' a chleachdamh,
 Chum beachd a thoirt dhoibh agus lèirs'—

XXXVII.

Cha bu luaith' a thugadh 'n tairgs' dhomh,
 Na mheas mi a mar ghairm dol n' a thriall;
 Sin thog mi—thruis mi—is dh' fhalbh mi,
 Ag earbsadh mo chrannchuir ri Dia.

XXXVIII.

Is ged bha aimsir ro-gharbh ann,
 Leam shoirbhich an Tighearn, gu fior;
 Dh' ulluich e caidreamh is càirdean,
 Gach là dhomh air mhuir is air thìr.

XXXIX.

Ach fhuair, fo dheireadh, mi sealladh
 Do 'n Eilean,—an sealladh bha uam;
 Is thog sud sùrd orm, is ogan,
 'S do m' spiorad thug togail a suas.

XL.

Ach ge b' e chitheadh an t-Eilean,
 'N a sheasamh gu biórach 's a' chuan,
 Le a sgorra-chreagaibh corrach,
 Is a bheanntaibh neo-thorrach gun snuagh;

XLI.

Seadh, le a gharbh chladach uaine,
 Is borb-thonnaibh uaibhreach na fairg',
 Cladhach gu domhain mu 'n cuairt dha,
 Is g' a bhualadh le ionnsuidhibh garg';

XLII.

'S an t-Eilean a' seasamh, gun strìochdadadh,
 Do 'n t-séisd tha gu h-ìosal r' a bhonn;
 Ged 'eil a shealladh air ciaradh,
 Le caitheamh is liath-cheo nan tonn.

XLIII.

Is ge b' e chitheadh an sealladh,
 Ris theirinn, gun teagamh, 's an àm,
 Gu 'm bu chùis-gheilt dol 'n a choinneamh,
 'S nach gabhainn, gun chuireadh dol ann:

XLIV.

Seadh, bu chùis-gheilt e gun teagamh,
 Dol fagus, no idir 'n a dhàil :
 'S mur bitheadh gairm dhomh o Fhreasdal,
 Cha chuirinn mo chos air an tràigh.

XLV.

Ach tra tha cuireadh o dhaoinibh,
 Mu ghnothuch Fir-saoraidh, 'g ar gairm,
 Tha againn aobhar bhi saoilsinn,
 Gu 'n gléidh e gu caomh sinn tre 'ainm.

XLVI.

Bu mhaith bhi siubhal 'n a cheumaibh,
 'S e féin a chur romhainn gach là;
 Oir cha 'n fhàg e, is cha tréig e,
 Na dh'earbas iad féin ris, tre ghràs.

XLVII.

Ach 's an àm ud bha an sealladh,
 'N a theagast ro-shoilleir dhomh féin,
 Air Eaglais Dhé air an talamh,
 'N a turus gu cala nan nèamh.

XLVIII.

Oirr'-san tha tuiltean a' bualadh,
 'S na tonnan 'g a luasgadh gu garbh'
 'S tha iad aig uairibh a' bagairt
 A sguabadh gu h-obann air falbh.

XLIX.

Ach aon diubh sud cha 's fhaigh buaidh oirr,
 'S cha ghuais iad chaoidh as a h-àit;
 Chuireadh gu daingean a suas i,
 Air huan-charraig chinnteach nan àl.

L.

Seadh, tha a bunait air carraig;
 Is carraig tha domhain 's a' chuan;
 Eadhon am Buaidhibh na Diadhachd,
 'S an rùintibh tha diomhair is buan !

LI.

Is cha 'n 'eil cunnart tha 'n dàn di,
 No sàruchadh gheibh i 'n a càrs',
 Air nach faigh thairis gu slàn i;
 Oir 's e Fear-a-graiddh th' air ar stiùir.

LII.

'S am feadh, mar so, bha mo smuaintean,
 Air 'n aitreabh o shuas 'gabhall tàimh,
 Feuch' sud ri brollach na tir' sinn,
 Is ar bàt' 'g a sineadh air tràigh.

LIII.

Ach 's gann a chuireadh mo chos leam,
 No sheas mi air sgeiribh na tràigh',
 'N tra chitheadh tu 'n sluagh ud 'n an teas-ruith,
 Gun lasachadh, 'tigheachd a' m' dhàil:

LIV.

Is sud gu cas iad cur fàilt' orm,
 'S a sìor-chrathadh làmh rium gu léir;
 Mar gu 'm biodh aithne sheachd bliadhna,
 Gu fior, aig an t-sluagh ud orm féin.

LV.

Ach an tra chual iad mo naidheachd,
 Is aobhar mo thigheachd do 'n àit,
 Teann mar a ruitheas tein-athair,
 Las aighear 's gach eudan gun dàil.

LVI.

Nis an ni dh' iarradh leam, fhuair mi,
 'S biodh glòir, gu buan, do mo Righ!
 Chunnaic mo shùilean an sluagh ud,
 Is luaidh mi dhoibh soisgeul na sìth'.

LVII.

Seadh, shearmonaich mi an soisgeul,
 'Nam measg-san, rè ochd làithe deug;
 Sin fòs a Shàbaid, 's a sheachduin;
 Gun neach dhiubh a sheachnadh mo sgéil.

LVIII.

Sheirmeadh an lagh leam, 'n a àite,
 A dh' fhàg sinn fo throm-mhallachd Dhé,
 A chionn ar tuitcam an Adhañh,
 'S o 'n là sin, ar pcacanna féin.

LIX.

'S mar dh' fhàg am peacadh sinn buailteach,
 Do thruaighibh tha do-chur-an-céill;
 Gun seòl no rathad gu tèarnadh
 Mur seasadh, 'n ar àite, Mac Dhé!

LX.

Ach sheas gu toileach 's a' bhùarn e;
 Is dh'àrdaich e 'n lagh bh' oirnn an tòir;
 Thug e do cheartas làn-dhioladh,
 'S air buadhaibh na Diadhachd chuir glòir.

LXI.

Tha 'n t-sligh' nis réidh, agus fosgait',
 Is tha e ro-cheart ann an Dia,
 A bhi fireanachadh pheacach,
 Tha creidsinn, gun teagamh, an Criod.

LXII.

Labbair mar so mi, mar dh' fhaod mi,
 Mu innleachd na saorsa, tre ghràs;
 Mu Phears' is obair Fir-saoraidh,
 Is buadhaibh a ghaoil is a bhàis.

LXIII.

Is ann an seirm a chroinn-cheusaiddh,
 Is caoimhneas ar Dé dhuinn an Criod,
 Chitheadh tu 'n cridhcachan 'g éirigh,
 Mar ri sgeul nach cualadh leo riamh.

LXIV.

'S gun cheist, an naidheachd bha ùr dhoibh;
 'S tra bha cumhachd an Ughdair 'n a lorg;
 Bha cuid a' nochdadhbh mòr-dhurachd
 'Bhi dùnadhbh rith'—'s teicheadh o 'n fheirg.

LXV.

'S e searmonachadh an t-soisgeil,
 Air teisteas is ùghdarras Dhé,
 Is sin gun easbhuidh, gun mheasgadh,
 An teagasg a bheannuich's e féin.

LXVI.

Oir chuir an Spiorad an céill e,
 —Is thugamaid geur aire dha—
 Gur e teagasg a' chroinn-cheusaidh,
 A mhàin, cumhachd Dhé dhuinn chum slàint'.

LXVII.

'S bha sud, 's an àm, dhomh ro-shoilleir;
 Oir 'n tra theirinn sgeul riu mu Chriosd,
 Is iomadh sùil bhitheadh sileadh,
 Is cuid dhiubh a' tuireadh gu dian.

LXVIII.

Oir cha b' mhuinntir gun chùram,
 'S gun dùrachd, ag éisdeachd na sgéil,
 'Bha 's a' chruinneachadh ùr ud;
 Gach gnùis chuireadh sud dhuit an céill.

LXXI.

Chà 'n ionann dhoibh sin 's do iomadh,
 Tha fo shileadh 'n t-soisgeil gach là;
 'G am bheil an cruas dol ann teinthead,
 'S an codal ni 's truim' orra fàs !

LXX.

Mar chuireadh gu minic an céill e,
 'S tha fiosrachadh geur air gach là,
 An tein' tha leaghadh na cécire,
 Gu bheil cruas na créidh' leis a' fàs.

LXXI.

'S mur robh ac' fathast mòr eòlas
 Air na fìrinnibh sònruicht' chaidh luaidh,
 Thaisbeanadh dìchioll, is deòin leo,
 Chum togail an eòlais bha uath'.

LXXII.

'S cha chaillinn idir mo dhùil dheth,
 Gus 'n dùinear mo shùil anns a' bhàs,
 Nach 'eil cuid dhiubh fhuair dùsgadh,
 Is cuid a chaidh dhùsgadh fhuair slàint.

LXXIII.

A nis, a shluagh Ealain Iorta !
 Is fiosrach gach aon dhibh gu léir,
 Gu 'n chuir mi 'n céill dhuibh Fear-saoraidh,
 Is saorsa, troimh 'ainm-san, gu réidh.

LXXIV.

O, gabhaibh uile gu saor ris!
 Seadh, gach anam aosd' agus òg;
 Gabhaibh, O gabhaibh gun dàil ris;
 'S bhur 'n anam-na gu bràth bithidh beò!

LXXV.

Mu'm fac' mo shùilean a riamh sibh,
 Bha iarrtus aig m' anam is deòin,
 Gu 'n seirminn slàinte, tre Chriosd dhuibh,
 Mar an t-sligh' gu sìochaint is glòir.

LXXVI.

Tha 'n latha 'tighinn a dh' innseas,
 'N e saoradh no dìteadh bhios ann,
 Gu 'n robh mi rè ùin' ann bhur n-Eilean
 'G ur teagast mar dh' fhaodainn 's an àm.

LXXVII.

'S a nis, mur faic mi sibh tuilleadh,
 Mo shoraidh dhuibh uile 's mo ghràdh;
 Is, gu 'm bu slàn dhuibh fa dheireadh,
 Aig àm cur na cruinne 'n a smàl!

IOMRADH AIR BEATHA

A'

CHRIOSDAIDH, LEIS AN UGHDAR.

Rinneadh an Dàn a leanas air duine àraidh d'am b' ainm *Seumas Dòmhnullach*, athair an ùghdair; neach a bha 'n a chriosduidh urramach, aithnichte n 'a linne. Rugadh e ann an Sgìre Childdonnain an *Cataobh*, 's a' bhliadhna 1735; no mar theireadh e féin, deich bliadhna roimh bhliadhna' a' Phrionnsa.—Mu aois dheich bliadhna fichéad chaidh e do *Ghallaobh*, do 'n Sgìre d'an goirear Sgìre *Mhiora*, (Reay,) far an robh a chòmhnuidh a' chuid eile d' a làithibh. Ghairmeadh null air Iordan e, 's a' bhliadhna 1830; is mar sin, aig aois cheithir fichead bliadhna 's a' cùig deug!—aois air nach 'eil ach ro-thearc a' ruigsinn!—Mu ochd bliadhna mu 'n do chaochail e, dh'fhàilnich a radharc e, ach bha a chuimhne, 's a thuigse, 's a chomasan eile, air an cumail ris, gu slàn, gus a' chrìch. Fhuair e aithne air an Tigh-earn, mar chuala mi e féin ag ràdh, aig aois ochd bliadhna-deug. Agus mar sin fhuair an criosduidh ud turus buan ann am beatha a' chreidimh, mu 'n d'ràinig e Iordan—trì fichead bliadhna 's a' seachd-deug!—Bu neach e a thug barrachd air iomadh do chloinn Dhé ann an solus tuigse, ann an geurachd breithneachaidh, ann an caomhalachd eridhe, is ann an anmhuinneachd

coguis.—Agus maille riu sin uile, fhuair e tàlann a bha ainneamh, a bhi cur an céill a smuainte ann an tearc do bhriathraibh. Bu tearc do rìreadh, is bu taght' a bhriathra auns gach dleasdanach uaigneach no fhollais-each mu 'm biodh e; ach bu mhòr am brigh 's an tomad! Air Di-h-aoine Orduigh, gu minic, aig co-dhùnadh na seirbhis, an tra bhiodh feum air cuimseachd an ùrnuigh, bhiodh gairm air Seumas!—Goirid an déigh dha thighinn do Sgìre Mhòra, rinn an Teachdair 's an sluagh roghainn dheth, gu bhi 'n a Fhear-ceasnachaidh; —dreuchd air son an do mheasadh e ro iomchuidh. Is choimhlion e dleasdanasan na dreuchd ud fad tuille is dà-fhichead bliadhna, air mhodh a bha taitneach d' an t-sluagh, agus, tre bheannachadh Dhé, feumail do iomadh.—Bha e do nàdur mìn agus tairisneach, is bha e a' nochdadadh sin 'n a mhodli labhairt ris an t-sluagh. Is a chionn so, bha cuid a' saoilsinn nach robh e garbh gu lcòr riu; agus air do neach àraighe sin a' ràdh ris, “Na 'n rachadh tusa agus mis,” ars esan, “do 'n bheinn a ghìacadh nan each fiadhaich—thusa le cuipe agus mise le badan coirce, co agaiun a' 's mò a bheireadh dhachaidh dhiubh? Glac an toiseach leis a' choirc iad, agus an sin gabh a' chuip dhoibh mar a bhios feum air. Ann an teagastg an t-sluagh, is fèarr gu mòr a bhi g' an tàlaidh na bhi 'g an gràineachadh.” Bu mhòr a mheas air na meadhonaibh follaiseach. Oir bha e a' faicinn gu 'n robh ùghdarris Dhé sgrìobht'orra. Agus ged a bha cuid 'g au tréigsinn, a chionn nach robh iad a' faghail annta na nithe a bha freagarrach ri 'm blas féin, cha b'urrainn esan aii eisimplir riamh a lean-tuinn. 'S an tra theireadh cuid dhiubh ris, “a Sheumas, c' arson a tha thu a' fantuinn 's an Eaglais?” Fhreagrach e “co a dh' iarr oirbhse a fàgail?” Dhiarr

an Tighearn oirnn' e, ars iadsan. "Ro-mhaith; agus aig an latha mhòr 'n uair a chuireas Criosd a' cheist ribhse, their sibh ris g' u 'n d'iarr a féin oirbh an Eaglais fhàgail; ach na 'n robh mis' air a fàgail, is gu 'n cuireadh e a' cheist rium-sa, cha b'urrainn mise a ràdh gu 'n d'iarr; ach gu 'n d'iarr euid do 'n phobull orm e." Air dha coinneachadh aig àm air leth, ri mnaoi àraidh a bha dhiubh-san a theich o 'n Eaglais, 's a bha air a meas gidheadh, 'n a mnaoi dhiadhaidh, ach bha do nàdur faobharach, cabhagach; ars ise ris, "Och, is och! is-truagh an là a rug oirnne!—teagasg tioram!—pobull marbh!—moll, moll, moll gun chruithneachd! Dh' fhàg an Tighearn an Eaglais"! "A bhean," ars esan, "tha thus' an diugh a' fasgnadh, agus tha gaoth ro-àrd air an t-sabhal agad; gheibhinnse gràinnean, tha agad-sa a' dol leis a' ghaoith dhe 'n deanainn sìol-cur." Chum i an t-aithghearr a tosd. Ged bu mhòr a mheas air na meadhonaibh follaiseach, cha 'n éisdeadh e teagasg mearachdach; is cha robh sin aige r' a dhèanamh 's an Sgìre 's an robh a chòmhnuidh. Bha an soisgeul aige ann am fallaineachd.—Chuir an Tighearn comain air os cionn iomadh, gu 'n do chum e a sholus ris gun smal gus a' mhionaid dheireannaich! 's ann aig dol a mach na h-anail a chaidh a' choinneal as. Bha e pòsda da chuairt. A' cheud chuairt mu 'n d'fhàg e *Cataobh*. Chaochail a cheud bhean 's a' bhliadhna 1773. Agus phòs e rìs 's a' bhliadhna 1775. Bha clann aige ris gach aon dinbh sud; ach cha bheò neach dhiubh a nis, ach an t-ùghdair. B' esan an dara aou do chloinn an teaghlaich dheireannaich.

Chuireadh an dàn a mach ann an trì earrannaibh. Is tha na li-earrannan air an cur sìos 's an òrdugh a 's iomchuidh'.

- I. An Criosduidh air a thurus gu Iordan.
- II. An Criosduidh aig bruaich Iordain.
- III. An Criosduidh thall air Iordan.

Anns a' cheud earrann tha eachdraidh a bheatha air a cur sìos o 'n èolas a bh' aig an ùghdar air féin. 'S an dara earrann tha e féin mar gu b' ann a' labhairt; air iomadh do na nithibh a chuireadh sìos innte, a bhi gu tric air an aithris leis. Agus anns an treas earrann tha e nis a' labhairt ruinn o nèamh.—Bu tric a labhradh e mu Iordan, mar an amhuinn a bha eadar an fhàsach agus tìr a' gheallaidh—a' ciallachadh le sin, am bàs. 'S ann air an aobhar sin tha am focal sin (Iordan) air a cho-'cheangal ris gach earrann do 'n dàn.

Gu 'n deònaicheadh au Tighearn dhuinne bhi 'n ar luchd-leanmuinn air a' Chriosduidh, agus orra-san uile "a tha, tre chreidimh agus fhoighidin, a' sealbhachadh nan geallanna!" S e so dùrrachd an ùghdaire d' a thaobh nan uile a leughas an dàn, agus gu li-àraidh d'a thaobh gach criosduidh a ta "air an turus gu Iordan"!

A' CHEUD EARRANN:

AN CRIOSDUIDH AIR A THURUS GU IORDAN.

AIR FONN.—*'Se fulangas mo Shlánuighir.*

I.

Is cuimhne leam, is b' aithne dhomh,
Am maduinn òig' mo là,
Seadh, daoine treun' is aithnichte,
A 'm beath 's an cath nan gràs,
A chuireadh 'n crùn gu toilichte
Air Ceannard mòr na slàint';
'S a chaoiadh nach roinneadh 'n onoir ris,
Ach bheireadh 'n t-urram dha.

II.

'S a measg an àireimh bheannaicht' ud,
A ruith gu glan an réis,
Bha fear, is dheanain aithris air
Gu dealaicht' ann mo sgeul;
Is dhomhs' bu chomain sònruicht' sud,
'S bu deòin leam 'chur an céill
B'e m' athair thaobh na feòla e,
'S mo chòmlinadh 'n tùs mo ré.

III.

Bha 'n Tighearn dha ro-thròcaireach,
 An laithibh òig' gu fìor;
 'Rinn ath-bhreith ghlan, is ghlòrmhor air;
 'S thug eòlas dha air Criosd;
 A dhòirt a Spiorad Naomh-san air,
 Roimh aois nam fichead bhliadhna';
 'Chuir seul is sult na naomhachd air,
 Nach d'fheud e chall a riamh.

IV.

Bha buadhan aithnicht' nàduir aig';
 Is pàirtean beothail, treun;
 Ach beothail treun mar bha iad sud,
 'S e gràs a rinn dhiubh-feum:
 'S e sud thug gleus, is cumadh dhoibh,
 Is togail glan ri nèamh:
 'S a chuir gu léir air obair iad,
 Mar uisg' air muilionn gleust'.

V.

Ni iomadh uaill á tàlannaibh,
 Is gibhtean làidir cinn:
 Ach ciod, mo thruaigh', an tàbhachd-san,
 Gun anail bhlàth bhi annt'!
 Ceart ionann 's mar na cnàmhan ud,
 Tha sgaoilteach, fàs' 's a' ghleann:
 An cnaimh a's mò, cha'n f'hèarr e dhiubh
 Na 'm fear a's tàir' a th'ann.

VI.

Ach thigeadh 'n anail chaoineil orr,
 O cheithir ghaothaibh nèimh';
 Is sud na cnàmhan sgaoilteach ud,
 Gach aon diubh teachd gu chéil'.
 'N sin éiridh suas mar armait iad,
 'S mar an'maibh bed—gu léir;
 Mar sud bidh gibhtean iomraiteach,
 Fo obair ion-mholt' Dhé.

VII.

Ach thug an Tighearn ungadh dha;
 —Seadh, ungadh glan nan gràs—
 Gun idir a bhi cunntadh ris,
 No 'g ionndran na thug dha.
 Bha 'n ola chaomh ud drùthadh air,
 Mar dhrùchd, o là gu là;
 'S gu minic, tomhas dùbailt dhi,
 'N tra bhiodh na glùinean sàs.

VIII.

'S bu tric a bha na glùinean ud,
 A' lùbadh gach aon là;
 Is 'anam faghail ùrachaидh,
 Gach ùin' aig caithir gràis.
 Oir thugadh spiorad ùrnuigh dha,
 'Chum dlùth e rith', gu bràth,
 'S maith 's cuimhne leam gu 'n lùbadh e,
 A ghlùin air sliabh is blàr.

IX.

Ach 's e an t-ungadh cùbhraidh ud,
 Bha drùthadh air gach àm,
 Thug anmhuinneachd is brùiteachd dha,
 'S rinn ùrail e 'n a chainnt.
 Rinn sud e cneasd 's gach dleasdanas ;
 —'S bu deas e dol 'n an ceann—
 'S an aobhar Chriosd, bu sheasmhach e,
 Gun dol a leth-taobh ann.

x.

Gu h-àraidh, 'n dreuchd a' Cheasnachaidh,
 'S an d' sheas e, iomadh bliadhna';
 Bu dileas e 's an dleasd'nas ud,
 Gun lasachadh no sgìos ;
 Cha bhithheadh chaoidh e fadalach,
 No rag, an ceann a' ghnìomh',
 'S cha b' fhurasd duit g' an coidleadh tu,
 Fo 'theagasg-san a riamh.

xi.

O, b' èasgaidh anns an dleasd'nas e,
 'N tra sheasadhbh e measg sluaigh;
 A' tabhairt tuigs' is teagaisg dhoibh,
 O 'n cheist a rachadh luaidh.
 Gun idir bhi 'g an sàruchadh,
 Le ceistibh àrd is cruaidh ;
 Ach tabhairt teagaisg slàinteil dhoibh,
 'S am bitheadh stà, is buaidh.

XII.

Ach thugadh gibht gu sònruicht' dha ;
 —'S cha chòir a cleith' 'n ar sgeul—
 Gach smuain bhi soilleir, òrdail aig',
 'S gu 'm b' eòl da 'n cur an céill.
 Bu chuimir, taght', 'n a bhriathraibh e,
 'S na thigeadh riamh o 'bheul ;
 Ach O, bu luchdmhor, ciallach e,
 'S na briathraibh ud gu léir.

XIII.

B' e 'n criosduidh suilbhír, faoilteach e ;
 —Biodh saorsa stigh, no cruas—
 Tra bhithheadh 'm fianuis dhaoine e,
 Cha 'n fhaict' air 'eudan gruaim :
 Oir mheas e chaoidh mar fhiachaibh air,
 Bhi moladh Chriosd do 'n t-sluagh ;
 'S bhi 'nochdadadh mach na diadhaidheachd
 'N a maise, riamh, 's 'n a snuadh.

XIV.

Bu tric, do chuid, a dh' innis e,
 Gu 'n d' shir e sud o shuas,
 Bhi cumail eudain shubhaich air,
 O 's ceann a' chridhe chruaidh.
 'S tha iomadh bheireadh fianuis air,
 Mar dh' iarr e sud, gu 'n d' fhuair,
 'S gun cheist, rinn sud, 's an fhionain e,
 Ni b' fheumail', riamh do 'n t-sluagh.

xv.

Bu bheag air riamh an lùbaireachd ;
 'S an eudan mhùgach, bhalbh ;
 'S na h-osnaidh chneadach, chiùchranach,
 Gun sùgh annt' ach an dealbh.
 Ach dh'aithn'chteadh 'n anail chùbhraidih leis,
 Seach dùbailteachd is cealg :
 Is far am faicteadh bhrùiteachd leis,
 Bu dlùth e dhoibh, gu dearbh.

xvi.

Bu shoilleìr, geur, a bhreithneachadh,
 Air obair ghlan nan gràs :
 Is b'aithne dha an dealachadh,
 Tha eadar beath' is bàs.
 Ach b' e a mhiann bhi carthannach,
 An tabhairt breith air càch,
 'S bhi fàgail dha-s', d' am buineadh e,
 Bhi deanamh sgaraidh slàn.

xvii.

Cha b' toigh leis riamh bhi fasganadh,
 Le gaoith bhiodh bras, is dian ;
 'S le srannaibh àrd', 's a h-osagan,
 A chasadadh 'n cruithneachd sìos.
 Bu mhò, gu mòr, bu shàbhailt' leis,
 Bhi fàgail muill 's an t-sìol ;
 Na 'n sìol—gu 'n rachadh gràinnean dheth,
 Le moll, gu bràth a sìos.

XVIII.

Ach, thaobh na beatha spioradail—
 Tre chreidimh bha e gluas'd ;
 'S cha b' ann air beath' na faireachduinn,
 No 'n t-seallaith, bha e suas.
 'S e CRIOSD, 's an teisteas firinneach,
 Tha 'm Bioball dhuinn a' luaidh,
 Bu bhunait creidimh rìreadh dha,
 'S cha b' e gach ni a fhuair.

XIX.

Bu toigh leis riamh, mar theireadh e,
 'N a fhaireachduinn bhi beò;
 Ach e bhi beò air faireachduinn,
 Bu bhochd leis sud, mar lòn.
 Ach tra bha 'n creidimh seilbheahadh,
 Bhiodh doirbheas aig an fheòil;
 Bhitheadh 'n fhaireachduinn a' soirbheachadh,
 Is cuirm aic' air a' bhòrd.

XX.

Ach fhuair e 'n creidimh aithnicht' ud,
 A dh'oibrich Spiorad Dhé
 'S ri Criosd gu dlùth, a ghreimicheadh,
 Air barrant' 'fhocail féin :
 A rachadh mach le 'fhalamhachd
 A dh' aindeoin air gach éis,
 'S nach pilleadh idir dhachaидh e,
 Gun naidheachd mhaith 'n a bheul.

XXI.

An creidimh beò, is luachmhòr ud,
 A fhuair na naoimh a riamh :
 A sheas ri aghaidh chruachasan,
 'S a bhunaich gus a' chrioch.
 Nach gabhadh guth no taisbeanadh,
 An àit an teisteis fhìor ;
 Ach ghabhadh fois 's an teisteas ud,
 'Sa gheibheadh faisg air Dia.

XXII.

'S e 'n creidimh ud a fhuaireadh leis,
 Bha buadhach ann-s', tre Chriosd,
 Ri aghaidh ciont', is truaillidheachd,
 Is buairidhean o shìos:
 A sheas gu treun, 's gu maireannach,
 Ri cathaibh geur' is dian:
 Is ris gach gaoith is doinninn dhiubh,
 A shéid air 'anam riamh.

XXIII.

Cha b' choigreach do 'n as-creidimh e,
 Mar dh' aidicheadh e féin :
 Gidheadh cha tug e caidreamh dha,
 'S cha chreideadh e a sgeul.
 Ach chuireadh teist a' gheallaidh leis,
 Fa choinneamh 'n fhàidhe bhréig'.
 'S tra chuireadh, sud 'n a ghealtair e,
 Gun chomas fosgladh béis.

xxiv.

Ach riamh tre chreidimh ghluaiseadh leis,
 Gu seasmhach, suaimhneach, dian :
 Gu faicilleach, neo-bhruaidleanach
 'S gach smuain, is guth, is gnìomh.
 Gu h-uaigneach, is gu follaiseach,
 Bha chomunn-san ri Dia ;
 B' e gràdh is tlachd a phobuill e,
 'S b' iad sluagh a chomuinn riamh.

xxv.

Cha d' leig a riamh á 'shealladh e,
 Gu 'm b' choigreach is fear-cuairt,
 Mar 'aithrichibh—air thalamh e,
 'S gu 'n robh a dhachaidh shuas ;
 A là gu 'n robh a' teireachduinn,
 'S a' giorrachadh gach uair ;
 'S gu 'm buineadh dha bhi 'g ulluchadh
 Air son a dhachaidh bhuain.

xxvi.

Ged thugadh làithean lìonmhòr' dha
 —Cùig-fichead bliadh'n, ach cùig—
 Rè fad nan là 's nam bliadhna ud,
 Cha d'fhàilnich riamh a threòir.
 Is mar bha àm an dealachaidh,
 A' tarruing faisg 'n a chòir,
 Bha 'n t-anam, teann, ag abuchadh,
 'S fo fhadachd, gu bhi 'n glòir.

XXVII.

'S e 'n Tighearn chuir an comain air,
O choinnich ris e 'n tùs;
A chum a riamh gach comas ris,
'S gu fallain ghléidh a chliù;
A chum gu slàn a sholus ris,
Mar choinneil dhealraich ùr:
'S aig àm toirt suas na h-anail leis
Bu choinneal sud gun smùid.

A' CHRIOCH.

AN DARA EARRANN.

AN CRIOSDUIDH AIG BRUAICH IORDAIN.

Air an Fhonn cheudna.

I.

Is dlùth air amhainn Iordain mi,
'S tha 'n fheoil a' gabhail sgàth;
Bu mhaith a nis an dòchas ud,
Nach cuir gu bròn no nàir—
An dòchas fhuair na h-aithrichean,
Air carraig bhuan nan àl;
Tre 'n d' fhuair gu tèaruint' dhachaidh iad,
A steach do thìr Chanàin.

II.

An dòchas fòs 's an creidimh ud,
Tre 'n d' aidich iad 's an àm,
'S an t-saoghal so, gu'm b' choigrich iad,
Gun chaidreamh bhi ac' ann:
Tre 'n d' iarradh dùthait shaoibhir leo,
Is oighreachd nach bu ghann;
'S tre 'n d' fhuair iad sin chuir aoibhneas orr',
'S e boillsg' dhi, bhàrr nam beann.

III.

Tha 'n fheòil a' crith, 's cha 'n ioghnadh e,
 Dol sìos gu Iordan bàis;
 Tha sgàil na h-oidhch' ag iathadh orm,
 'S tha cianalas a' fàs;
 Oir 's e tha romham sìorruidheachd,
 Nach tomhais grian no là;
 An cuan a ta neo-chriochanach,
 Gun ìochdair ann no tràigh!

IV.

Is dlùth an snaidhm, 's is dìomhair e,
 A cheangail riamh r'a chéil',
 Anam is corp gu mìorbhuiteach;
 —Och 's dian an ceangal e!—
 Ach sgaoilidh 'm bàs e uair-eigin,
 Is gheibh an uaigh 'cuid féin;
 Is siubhlaidh 'n sin an tuathanach
 Bh' air chuairt 'n a phàilliunn créidh.

V.

Thaobh fuigheall ciont' is truaillidheachd,
 Tha fuaitte rium gach àm,
 'S e 's mulad throm aig uairibh dhomh,
 Nach 'eil mo ghluas'd ach mall;
 'S e eagal 's mò gu h-àraidh leam,
 —'S tha 'n diugh 'g am fhàgail fann—
 Na th' eadar so 's am bàsa dhomh,
 Na aon ni tha 'n taobh thall.

VI.

Ach tha mo shùil ri Slànuighear
 Bha gràsmhor fad mo chuairt;
 'S a threòraich troimh an fhàsach mi,
 Nach fàg e mi 's an uair;
 Ach fòs gu 'n dean e teasairginn
 Dhomh féin, 's an t-seasamh chruaidh,
 'S gu 'n sgoilt e dhomh na h-uisgeachan,
 Gu ruig mi null, le buaidh.

VII.

'S ann anns-an tha mo mhuinighinn,
 A chuir an cath bha cruidh,
 Ri naimhdibh làidir, fuileachdach,
 'S a thug a mach a' bhuaidh;
 Thugadh buaidh air Satan leis,
 Air peacadh, bàs, is uaigh;
 'S do thaobh an t-sluaigh a ghràdhach e,
 Am bàs do shluig e suas.

VIII.

Do cheartas thug e riarachadh,
 Is dìoladh mar bu chòir;
 'S an lagh ro-naomh cho-lionadh leis,
 Bha orms' gu dian an tòir;
 Is choisneadh saorsa shiòrruidh leis,
 Air bhuaidhibh Dhia chuir glòir,
 'N tra ghlaodh c, "Tha e criochnaichte"—
 'S e sud mo dhòn, 's mo threòir.

IX.

Na rinn 's na dh' fhuiling Slànuighear,
 Mar sud an àit a shluaigh,
 'S e mhàin is bunait thèarnaidh dhomh,
 'S cha 'n e gach gràs a fhuair—
 'S e sud is dòn 's is tèarmunn domh,
 Dol 'n coinneamh bàis is uaigh,
 'S e sud bheir dhachaidh sàbhailt mi,
 Do 'n àit' am faic mi 'n t-Uan.

X.

Ach O! 'm faigh neach co ghràineil rium,
 'S do nàdur co mi-naomh,
 A chaoidh a steach 'n a làthair-san,
 Tha àillidh, glan, gun ghaoid !
 Ach glanaidh fuil an t-Slànuighir,
 Mo ghràinealachd gu saor ;
 Is gheibh mi 'n sin do 'n àros ud,
 'S am bheil muir-làn a Ghaoil.

XI.

Theann dhlùthraig laigsean nàduir orm,
 Is shearg mar sgàil mo shnuadh,
 Mo neart tha tur 'g am fhàilneachadh,
 'S gach comas tha dol uam ;
 Tha 'n deilbhidh fight' gu snàitheann dhi,
 'S tha 'n spàl a' ruith gu luath ;
 'S an corpa dìblidh, bàsmhor so,
 Dol sìos gach là do 'n uaigh.

XII.

Ach cridhe cruaidh is dò-bheirteach,
 Is inntinn fheòlmhor, thruagh,
 'S as-creidimh fuiteach, fòirneartach,
 'S iad sud mo bhròn 's an uair !
 'N t-as-creidimh 's olc gu h-àraidh e,
 Tha toirt mo shàr gu cruaidh ;
 Air m' anam tarruing fàsachaidh,
 'S air Fear mo ghràidh cur gruaim.

XIII.

'S e sud an t-olc rinn crònach dhiom,
 Am fionain nan saor-ghràs ;
 Och 's e a dh'fhàg mi-sgiamhach mi
 Am fianuis Fhir-mo-ghràidh !
 Mo thurus rinn e cianail dhomh,
 'S mo thriall ro mhall gach là ;
 'S e m' eagal 'n deireadh bhliadhnaich e,
 Gur crionadh dhomh, 's nach fàs.

XIV.

Is i mo bheachd, is theirinn e,
 A thaobh a' chreidimh bheò,
 Gu 'm bheil—'s gach àit 'n do ghineadh e—
 'N t-as-chreidimh air a thòir :
 Is iadsan riamh nach d' fhairich e.
 'N a éire thruim, 's 'n a bhròn,
 Nach 'eil—ge bith a theirear leo—
 'N an creidimh-san ach sgèòd.

xv.

Is diomhaireachd o 'n Ard-Righ e,
 Thaobh clann nan gràs gu lèir,
 Am peacadh bhi air 'fhàgail annt',
 'S gun d' thug e gràdh dhoibh féin ;
 'S gur eagal iomadh là dhoibh e,
 —Ged 's nàir leo'chur an céill—
 An àit e annt' bhi bàsachadh,
 'N am beachds', bhi fàs ni 's treun'.

xvi.

Ach 's comharradh do-àicheadh e,
 Air gràs bhi faghail buaidh,
 'N tra bhitheas corp a' bhàis mar sud,
 Dhoibh féin 'n a chràdh 's an uair;
 Is feudaidh sud bhi foillseachadh
 Dhoibh saoibhreas gràis do-luaidh ;
 'S bhi 'g abuchadh nan oighreachan,
 Ni 's mo chum aoibhneis bhuain.

xvii.

Ach 's mòr mo thruas ri àireamh dhiubh,
 'San làth s', tha 'g aidmheil Chriosd;
 Nach d'fhuair an aithne thàbhachdach,
 Air beath' no bàs gu fior :
 Ciont' cha 'n 'eil 'n a chràdh dhoibh sud,
 No corp a' bhàis 'n a phian :
 Is tòir cha 'n 'eil aig Satan orr':
 Cha d'fhàg iad e a riamh.

XVIII.

Och, 's mealladh mòr, 's is cràiteach e,
 Th' air àireamh measg an t-sluaigh,
 Le aideachadh gun ghràsaibh ac',
 Dol 'n coinneamh bàis 'n an suain,
 Gun eagal orr' roimh shìorruidheachd
 A dh'iathas ump' gu luath!—
 Bidh gul is giogsan fhiacal ac',
 A chaoidh mar dhìoladh duais!

XIX.

Ach bheirinn comhairl' àmail orr'
 Mu'n d'theid mo cheann 's an ùir,
 Gu 'm pilleadh is gu 'n tionnd'adh iad,
 Gu teann gu Righ nan dùl;
 Is ghuidhinn air a' phàirt ud dhiubh
 Bha fad mo là dhomh dlùth,
 Gu'n dùineadh iad ri Slànuighear,
 Gun dàil a chuir 's a' chùis.

XX.

Oir theirinn, 's thogainn fianuis air,
 Thaobh Iosa, Fear mo ghràidh,
 Gur Ceannard caomh is fialaidh e,
 'S gu 'n d' fhuair mi riamh e tlàth:
 Gu bheil e truacant', tròcaireach,
 Is pailt gu leòr 'n a ghràs:
 'S a mheud 's chuireas dòchas ann,
 Gu 'm bi iad beò gu bràth.

XXI.

Is bheirinn comhairl' shònruichte,
 Do ghineil òg ar là,
 Am fad 's tha 'n cothrom òirdheirc ac',
 Is aignidh bheò is bhlàth;
 Am fad 's tha toil so-lùbaidh ac',
 Is ùin' gu iarruidh gràis;
 Is èasgaidheachd 'n an glùinibh ac',
 Gu lùbadh sìos gach là;

XXII.

Air Criod gu 'n cuirteadh eòlas leo,
 'S air sòlsasaibh a shaors';
 'N sin bhiodh e 'n a Fhear-pòsda dhoibh,
 Is dh'òladh iad deth 'ghaoil:
 Oir àm na h-òig' gu 'iarruidh-san,
 'S gu mealtuinn Chriod gu saor;
 Is mis' nach tugadh mìos dheth sud,
 Air bliadh'n' an diugh do m' aois.

XXIII.

Ach cor na h-aois, 's ro chràiteach e,
 A chaith an là gun fheum!—
 Nach teicheadh iad gu Slànuighear,
 Aig trà dol fodha gréin'!
 Oir 's ni ro chianail, eagalach,
 Gun teagamh, e ann fèin;
 'S e aois, is bàs, is aineolas,
 Bhi coinneachadh a chéil'!

xxiv.

Tha comain chuir an Tighearn orm,
 Is dh'iarrainn chur an céill,
 Gu 'n d'fholaithe e gu miòrbhuileach,
 Mo lochdan diomhair féin;
 Gu 'n d'cheadaich e, 'n a fhàbhar dhomh,
 Air 'ghràs bhi deanamh sgéil;
 Mo lochda chur 'n a làthair-san.
 'S do chàch bhi 'g 'aidmheil féin.

xxv.

Thaobh 'fhreasdail anns an t-saoghal dhomh
 Bu chaomh e, 's cha bu shearbh;
 Oir fhuair mi biadh is eudach ann,
 Mur d' fhuair mi maoin is ainm;
 An t-aran làitheil dh'òrduich e,
 'N a thròcair dhomh gu dearbh;
 Ach chum e suas air dòchas mi,
 'S cha b' ann air stòras seilbh.

xxvi.

Chunncas cuid do dhaoinibh leam,
 Bha saoithreachadh gu teann,
 'S a' tasgaidh suas, mar dh'fheudadh iad,
 Mòr mhaoin dhoìbh féin 's d' an cloinn:
 Ach chunnaic mi 'n stòras saoghalt' ud,
 Dol leis a' ghaoith mar mholl:
 Is mhol mi 'm freasdal caomh ud dhomh,
 Nach d'thug dhomh maoin r' a chall.

XXVII.

Tha sluagh mo ghaoil 's mo bhràithreachais,
 —Na bràithrean caomh' is treun—
 A shiubhail troimh an fhàsach leam,
 Air m' fhàgail nis gu léir.
 Is dh'fhag sud aon'rach, cianail, mi,
 Mar eun air sliabh leis féin,
 'S o dh'fhalbh an comunn tòrail-san,
 Tha m'aigne triall 'n an déigh.

XXVIII.

Tha m'aigne triall—'s e mhiannaichinn,
 Bhi mar ri Criosd 'n a Ghlòir;
 'S tha togradh, mar air sgiathraigheann,
 Ag iarruidh bhi 'n a chòir;
 Ach cudthrom ciont' tha 'g iathadh orm,
 Mar cheap ri sgiath an eòin,
 Teann leagaidh sud gu h-ìosal mi
 Ri talamh sìos gun treòir.

XXIX.

Ach feitheadam-s' àm an Tighearna,
 —An t-àm, gu fior, as fèarr;
 'S d' a thoil ro-naomh-san strìochdar leam,
 Thaobh riaghlaidh beath' is bàis;
 'S tra thig an t-àm a dh' òrduich e,
 An ruintibh 'ghlòir' 's a ghràis,
 Feuch, sud a null thar Iordan mi—
 'S a Ghlòir dha féin gu bràth.

xxx.

Sud thairis air gach buaireadh mi,
Gach cunnart cuain is gaoith,
Gach laigs', is ciont, is truaillidheachd,
Gach pian, is gruaim, is caoidh;
Is sud a steach do'n lùchairt mi,
'S am faic mi gnùis an Righ;
'S 'n a chomunn iomlan, ùrail-san,
Gu seinn mi 'chliù a chaoidh!

AN TREAS EARRANN.

AN CRIOSDUIDH THALL AIR IORDAN.

Air an Phonn cheudna.

I.

An Crioduidh ud bha uair-eigin,
Aig bruaich nan uisge dlùth;
'S d' am b' ghearan na bha thruaillidheachd,
Ro-fhuaight' ris fad a chùrs';
Nis fhuaireadh steach do 'n t-suaimhneas leis,
Bha fad a chuairt 'n a shùil;
'S tha 'spiorad-san a' cuairteachadh
Na caithreach shuas, le cliù.

II.

Ach O, cha tig e dh' aithris dhuinn,
Na dh' fhairich e 's an uair,
'N tra bha a spiorad dealachadh,
Ri talamh, is dol suas:
No meud, is glòir an t-sonais ud,
Th' aig anam nis gu buan!
'S ged thigeadh—'s i mo bharail-se,
Nach gabhadh 'n t-aithris luaidh.

III.

Ach creideamaid, d'a rìreadh e,
 Air teisteas fior-ghlan Dhé,
 Gu 'n labhradh réir na firinn e
 Ged thigeadh rìs e féin.
 Is ged nach tig o'n tìr ud e,
 'S am bheil a shìochaint réidh,
 Ar leam, gidheadh, gu 'n cluinn mi e
 Mar so, toirt brigh na sgéil—

IV.

“ Nis fhuaireadh null air Iordan leam;
 'S a' ghlòdir do Righ nan dùl !
 Oir thug e aiseag ghlòrmhor dhomh,
 Chuir Iordan air mo chùl.
 Seadh, sgoilt e dhomh na h-uisgeachan,
 Bha tric fa chomh'r mo shùl;
 'S aig uairibh bha 'n an clisgeadh dhomh,
 Ri àm dhomh ruith mo chùrs'.

V.

“ Ach cia mar fhuaireadh dhachaidh leam,
 Thar astar dorch nam beann;
 No cia mar sheas mo chosan rium,
 Gun tuisleachadh 's a' ghleann ?
 Cha 'n urrainn domh sud aithris duibh,
 Cha ghabh e cur an cainnt:
 Ach Iosa riamh bha tairis rium,
 Gu 'm b' Charaid e 's an àm.

VI.

“ Bu ghann chaidh as an t-sealladh uam,
 An talamh, is na bh’ ann,
 ’N tra thàinig ’s thug e coinneamh dhomh,
 Gu h-ullamh anns an àm.
 ’S roimh ’aghaidh fhaoilteich bhuadhaich-san
 Gach uamhann theich gu teann;
 Gach neul is ceò, a chuairtich mi,
 ’S gach gruaim a bha ’s a’ ghleann.

VII.

“ Fhuair m’ anam beachdan soilleir dheth
 Air thalamh, rè mo chùrs’;
 Seadh, beachdan bha ’n am beannachd dhomh
 ’S rinn ’anail dhomh ro chùbhr’;
 Ach O, thaobh glòir’ an t-seallaidh ud!
 —Bu shealladh e bha ùr—
 A’ ghrian, bu ni gun solus i,
 An coimeas ri a ghnùis!

VIII.

“ Is sona ’n sluagh gu sònruicht’ iad,
 Fhuair eòlas air ’n an là:
 Fhuair aithne ghlan is shòlasach,
 Air Glòir a Phears’ ’s a ghràis!
 ’S e sud a dheanadh ullamh iad,
 Gu coinneamh thabhairt dha:
 ’S a dh’easbhuidh sud ’s neo-chomasach
 Do anam dol ’n a dhàil!

IX.

“ An dol o ùin’ gu bith-bhuantachd;
 ‘S e ’n iteal a bha teann!
 Gu deimhin féin cha b’fhiorsrach mi,
 Air tiota a bhi ann:
 Cha b’ luaith’ a d’fhalbh an anail ud,
 Bha goirid agus fann;
 No sud an làimh mo CHEANNAIRD mi,
 Is sud an t-anam thall!

X.

“ Bha amhainn Iordan eagalach,
 Gun teagamh, dhomh ’s an uair;
 Och, b’ aobhar gheilt an sealladh ud
 A ghabh mi dhi o ’bruaich!
 Ach theich an sruth gu cabhagach,
 Roimh Shagart treun nam buadh:
 Is pianta ’bhàis, chuir eagal orm,
 Sud thairis iad gu luath!

XI.

“ Ach ’s amhainn i bhios uamhasach,
 Dò ’n anam thruagh gun Dia;
 ’N tra bheanas e ri ’bruachaibh-san,
 Och, sud gu luath e sìos!
 ’S is ni e bhitheas cràiteach dha,
 Nach d’ chreid, ’n a là, e riamh,
 Gur uisge domhain bàthaidh sud,
 Do ’n neach gheibh bàs gun Chriosd!

XII.

“Och, ’s truagh iad theid gun ulluchadh,
 A’u coinneamh bàis is uaigh’;
 Gun chòir an Criosd, gun chumadh ris,
 Gun fhaireachadh air truaigh’!
 A théid an coinneamh sìorruidheachd
 Gun dòn, tre fhuil an Uain;
 A dh’ fhulang réir an gnìomhara,
 Fo phiantaibh feirge buain!

XIII.

“Ach fhuaireadh null air Iordan leam!
 Is dh’fhàgadh ’n fhedil air chùl;
 Gu minic, bha ’n a dòruinn dhomh,
 ’S a chòmhdaich mi le mùir;
 Thug, iomadh latha, tuireadh dhomh,
 Is sileadh air mo shùil;
 A’ milleadh riamh mo sheallaidh orm,
 Is comuin Fhir mo rùin!

XIV.

“Cha bheag an t-sìth ’s a’ bheannachd dhomh,
 Bhi dealaicht’ ris an fhedil:
 Oir dh’ fhalbh, ’n a cois, gach an-shocair,
 Air m’ anam riamh bha ’n tòir.
 ’N tra dhealaich rium mo thruaillidheachd,
 ’N sin theich gach truaigh’ is bròn;
 Gach olc, is laigs’, a chuairtich mi;
 ’S am Buaireadair fa-dheòidh.

XV.

“ Is fhuaireadh steach gu tèaruint leam,
 Do thìr Chanàain shuas:
 An tìr am bheil na bràithrean ud,
 ‘S an fhàsach bha air chuairt;
 An tìr am bheil mo Shlànuighear,
 A thug dhomh gràdh ro-bhuan.
 ‘S an sealladh dheth, ’s an sàsachadh,
 Th’ aig m’anam, tha do-luaidh.

XVI.

“ Ach cia mar nithear aithris leam,
 Air beannachdaibh na tìr’?
 Oir ’s tìr a tha cur thairis i,
 Le bainn’ is mil gu fior.
 Tha sùil ro-chaomh an Tighearn oirr’,
 O thus na bliadhn’, gu crìch:
 ‘S an sluagh a th’inn, sàr-lionar iad,
 Le maitheas sìor, gun dìth.

XVII.

“ Cha ’n abair am fear-àiteachaidh,
 Gu bràth gu ’m bheil e tinn;
 ‘S cha ghearin e air fàsalachd,
 No gainne sàth’ bhi innt’:
 Is mar bu mhò a shàruchadh,
 Fo chorp a’ bhàis, r’ a linn;
 Is mò, gu mòr, a ghàirdeachas,
 ‘S is àirde nis a sheinn.

XVIII.

“ O, seinnear nis gu h-àrda leis;
 ’S le cloinn nan gràs gu léir;
 Do’n Ti, o chian, a ghràdhaich iad,
 ’S a thug dhoibh slàinte ré!
 Cha bhi iad tuilleadh ’m Bàbilon,
 No ’n Clàrsaichean gun ghleus:
 Ach seinnidh iad lc gàirdeachas,
 ’S cha ’n fhàilnich guth no teud.

XIX.

“ Ach O, nach b’fhios do ’n àireamh ud,
 Tha ’g àiteach gleann nan deur,
 An sonas buan, ’s an sàsuchadh
 Tha romp’ an làthair Dhe!
 Dheanadh e ’n aigneadh fhuasgladh dhoibh,
 O shaoghal truagh an céin’;
 ’S bheireadh e gloine gluasachd dhoibh,
 Is tuilleadh luath’s do ’n ceum.

XX.

“ ’N sin b’fhurasd peacadh fhuathachadh;
 ’S do ’n Uan bhi tabhairt gràidh;
 Is seasamh ’n aghaidh Bhuaireadair;
 ’S bhi cruadalach ’s a’ bhlàr.
 Seadh, chuireadh e ’n cuid eagalan,
 ’S as-creidimh, tur gu nàir.
 Is chumadh, chaoiadh ’n an sealladh iad,
 Gun teagamh, tìr Chanàain.

XXI.

“ Ach dheanadh sud iad comasach,
 'Bhi togail fianuis thréin,
 An aghaidh lochdan follaiseach;
 'S bhi labhairt á leth Dhé.
 Seadh, dheanadh sud iad coguiseach,
 'S gach gnothuch tha fo ghréin:
 Is cheangladh sud, gu maireannach,
 Gach anam dhiubh r' a chéil'.

XXII.

“ Tha iomadh ni mu 'n dealaich iad,
 'N am barail, eatorra féin:
 Oir fathast, 's clann air thalamh iad,
 Air ghainne tuigs' is céill'.
 Gidheadh, tra bhios 'n an daoinibh iad,
 Bidh caochladh orr' gu léir:
 Is chi—gu 'm b' nithe faoin' iad sud,
 A sgaoil iad riamh o 'chéil'.

XXIII.

Ach shiubhladh an dlùth-chomunn iad,
 Mar choigrich is luchd-cuairt;
 A' tarruing as na tobraichibh,
 A dh' ulluich dhoibh an t-Uan:
 Ag ith' an sàth, gu togarrach,
 Do'n aran bheò is bhuan:
 'S cha mhearachd, ged a theirinn e,
 Bhiodh 'n aigneadh romp' dol suas.

XXIV.

“ Is ged bhiodh sgòs, is ocras orr,
 Is tart, an tìr an céin’;
 ’N tra gheibh iad steach, cha ’n acain iad,
 Na bh’ aca riamh do phéin.
 Cha chuimhnich iad aon uireasbhuidh,
 A dh’ fhairich iad, fo ghréin.
 Oir tha gu leòr a’ feitheamh orr’,
 An tigh an Athar féin.

XXV.

“ Ach fhuair mi nis na dh’iarradh leam;
 Is m’ uile mhiann gu bràth !
 Le naomhachd rinneadh sgiamhach mi,
 An coslas Chriosd gu slàn:
 Le soills’ na glòir’, shàr-lionadh mi,
 ’S mi dlùth do Dhia, gun sgàil.
 Is caithear leam an t-siorruidheachd,
 A’ snàmh gu sìor, ’n a ghràdh.

XXVI.

“ Is fior e, nach ’eil uireasbhuidh,
 Air ’fhaireachadh leam shuas;
 Ach fathast ’s e mo spiorad th’ann;
 Tha earrann dhiom ’s an uaigh.
 Ach tha mo shùil, le gàirdeachas,
 Ri teachd an là, ’s na h-uair’,
 ’S am bi an corp comh-pàirteachadh,
 Do lànachd glóir’ an Uain !

XXVII.

Ach co an cridh' a bhreithnich e,
 No'n t-sùil a chunnaic riamh,
 Mòr mheud is gnè an ulluchaidh,
 D'a phobull féin, rinn Dia!
 Ach 's sona dhoibh, 's is beannaicht' iad
 Fhuair aithne ghlan air Criosd:
 Oir mealaidh iad, 'n a chomunn-san,
 An sonas ud, gu sìor!

A' CHRICOH.

IOMRADH

AIR

OBAIR AN SPIORAID

ANN AN SLUAGH DHE.

AN ROIMH-RADH.

Tha Criod, roimh dha dol suas, ag innseadh d' a
dheiscioblaibb, gu 'm bu bhuanachd dhoibh Easan a
db'halbb; "Oir mur falbh mi," deir e, "cha tig an
Combfhurtair do' bbur 'n ionnsuidh-sa; ach ma dh'
fhalbhas mi, cuiridh mi esan do' bhur 'n ionnsuidh,"
Eoin, xvi. 7. Agus tha e ag innseadh, 'n uair a thig-
eadh e, ciod i an obair a dhèanadh e. Faic rann 8-15.
—Faic, mar an ceudna, Eoin, xiv. 26, agus xv. 26.
Tha e soilleir o na h-earrannaibh so, maille ri iomadh
earrann eile air feadh an Sgriobtuir, gu 'm bheil obair
mhòr agus ghlòrmhor aig an Spiorad r'a dheanamh, a
réir suidheachaidh co-cheangail nan gràs; cha lugha i
na bhi a' glòireachadh Chriod, ann an tarruing phea-
each do ionnsuidh, agus cumail suas, is toirt air a
h-aghaidh, na beatha spioradail ann an cloinn Dhé, gus
am bi iad air an abuchadh air son glòire. Ach, tha
aobhar eagail gu 'm bbeil an obair so, ann an tomhas
mòr, dol as ar sealladh, eadar theachdairean agus pho-
bull. Agus a dh'easbhuidh an teagaisg so, bitheadh an
soisgeul air a shearmonachadh 'n ar measg, ann an
gloine, o là gu là; ach bithith e gun bhrigh dhuinn.
Fanaidh peacaich mar bha iad, agus cha bhi fàs, ach

dol air ais, ann an gràs, aig pobull Dhé, mur tig an Spiorad a nuas! Faic Isa. xxxii. 13-17. 'S ann, nime sin, chum a bhi toirt beachd dhuinn air obair an Spioraid, mar tha i air a foillseachadh 's an Fhocal; agus sinn a għluasad gu ri bhi dian-thagħad lu 'n tigeadlu an Spiorad glòrmhor ud a nuas oirnn, eadar theachdairean agus phobull, mar Spiorad dùsgaidh, soillseachaidh, iompachaidh, sòlasachaidh, agus naomhachaidh,— a chuir an t-ùghdair na rainn so r' a chéile. Agus 's i a dhùrachd agus 'ùrnuigh ri Dia, gu'm beannaicheadh Esan an t-“iomradh” do 'n leughadair!

Tha beagan do rainn air an cur ris an dàn a nis nach robli 's a' cheud chlò-bhualadh; a mheasadli leis an ùghdair bhi feumail: agus aithnichear iad leis a' chomharradh so-(“), aig toiseach gach rainn.

E. D.

IOMRADH, &c.

AIR PONN—“*S e fulangas mo Shlànuighir.*”

O, dheanainn luaidh—’n am b’ urrainn mi,—
Air obair Spioraid Dhé !
Mar tha i chaoidh r’ a h-aithneachadh,
'N a toradh is n’ a beus.*
'S fior, tha a freumh tur-fholuicht’ uainn;
Mar chraoibh ’s an talamh shèimh,
Ach innsidh ’chraobh le ’toradh dhuinn,
Gu ’m bheil aic’ bun is freumh.

II.

Ach, Ughdair mhòir na h-oibre ud,
S’ a thobair beath’ na slàint’,
An cridheachaibh do phobuill-se;
O, cuidich leam ’s a ’chàs !
Is deònaich saors’ is solus dhomh,
Is breithneachadh, tre ghràs,
Air t’ obair, chum gu’m b’ aithne dhomh,
A h-aithris ann mo dhàn !

III.

O, thàinig mùthadh gàbhaidh oirnn;
 'S ro chràiteach e r'a luaidh !
 Oir thuit gu léir an Adhamh sinn,
 Is dh' fhàgadh anns' sinn truagh:
 Ged chruthaicheadh gu glòrmhor sinn,
 O, chaill an t-òr a shnuagh !
 'S tha obair ghrinn an òr-cheird nis
 Gu brònach, millt', is truailt' !

IV.

A steach do 'n t-saoghal thàinig sinn—
 Fo bhinn a' bhàis gu truagh !
 Do'n pheacadh nis is tràillean sinn,
 'S do Shatan,' thug oirnn buaidh !
 'S na h-uile 's an staid bhrònaich ud,
 Mar mhairbh gun deò 's an uaigh;
 Gun chuideachadh, gun dòchas ac',
 Ach ruisgt' do dhòruinn buan.

V.

Ach rùnaich Dia, o shìorruidheachd,
 An diomhaireachd a ghràidh,
 Seadh, peacaich chaillt', gu mìorbhuileach,
 Tre Chriosd, a thoirt gu slàint':
 'S mar choisinn Easan saorsa dhoibh;
 Tha Spiorad Naomh nan gràs
 A' teachd a mach gu 'n naomhachadh,
 'S cur riu na saors' gu slàn.

VI.

'S gun cheist is iad an t-àireamh ud
 A gràdhaicheadh le Dia,
 'S a thaghadh air mhodh ghràsmhor leis,
 Air son 'n do bhàsaich Criosd.*
 'S ann riu-s' a mhàin 'chomh-pàirticheas
 An Spiorad slàinte shìor;
 Is anam dhiubh cha 'n fhàgar leis,
 Gu dol gu bràth a sìos.

VII.

'N an d' bhàsaich 'n àit nan uile e,
 —Is sud tha cuid ag ràdh—
 Am bitheadh anam fulang dhiubh,
 Fo ghuin an dara bàis ?
 No 'n agradh lagh is ceartas dhiubh
 Na féich, gu beachd, bha pàidht' ?
 O, 's truagh gach sluagh is Teachdair dhiubh,
 Do 'n bheachd ud a bheir àit !

VIII.

Is fior, tha gairm ar soisgeil-ne,
 Gun leth-bhreth, do gach sluagh;†
 Is thaobh nan uile chreideas e,
 Bidh ac'-san saors', le buaidh :
 Is firinn sud ; ach aidich 'mid
 Gu'n seas an taghadh buan ;
 Oir 'n dà chuid 's ponca creidimh iad,
 Air teisteads Righ nan sluagh.

* Eoin, x. 11, 28.

† Marc xvi. 15, 16.

IX.

Tha rùintean Dhé 'n an diomhaireachd ;
 'S cha 'n iognadh leinn an sgeul ;
 Dha féin a mhàin is riaghaitt iad,
 'N a ghnìomharaibh gu léir.
 Ach O, cha b' iad na rùintean ud,
 'Bha dùint' 'n a uchd o chéin,
 'Thug e mar riaghaitt ùmhìlachd dhuinn ;
 Ach 'Fhocal cùbhraidh féin.*

X.

An sud, tha gairm an t-soisgeil dhuinn,
 — 'S gun cheist, o chridhe Dhia —
 Gun dàil, air bonn a theisteis-san,
 Bhi teicheadh dh' ionnsuidh Chriosd.
 Tha 'n soisgeul teachd le ùghdarras,
 D' am buin dhuinn lùbadh sìos :
 'S e sud a 's riaghaitt ùmhìlachd dhuinn,
 'S cha 'n e na rùintean sìor !

XI.

'S an cur na saorsa ghlòrmhoir riu,
 Réir òrduigh sìorruidh Dhé,
 Ni 'n Spiorad obair dìrdheirc orr',
 Mar òr ro dhearbht' n a ghnè ;
 Bidh Chriosd 'n a bhunait dòchais dhi,
 'S 'n a chòmhnhadh buan gach ré.
 'S an ath-bhreith tha i töiseachadh,
 'S tha GLÒIR a' teachd 'n a déigh !

* Deut. xxix. 29.

XII.

Is thaobh gur obair ghràsmhor i,
 Mar tha i innte féin,
 Is ionann chaoidh 'n a nàdur i,
 An cloinn nan gràs gu lèir ;
 Oir ge b' e eadar-dhealachadh
 A gheibhear measg an treud,
 Is caoraich d' an aon olainn iad,
 'S gu h-uile d' an aon ghnè.

XIII.

Ach 's obair tha ro-dhìomhair i,
 Am pobull Chriosd 's gach àl ;
 Tre 'm bheil iad 'giùlan 'iomhaigh-san,
 'S le 'n anam strìochdadadh dha !
 O 'n t-saoghal thruagh tha 'n obair ud
 Tur-fholuicht', seadh, do ghnàth :
 'S am pàirt, is obair fholuicht' i
 O 'n anam féin, fhuair gràs.*

XIV.

Tha 'm Focal, anns gach Tiomnadadh dheth,
 Toirt iomraidih shoilleir, fhìor,
 Mu'n obair ghlòrmhor ion-mholt' ud,
 Tha ionmhuiinneach le Criossd.
 Is cumamaid ri 'theisteas-san
 Tha seasmhach, buan, gu sìor ;
 Is foghlumaid an teagastg uaith',
 Tre 'n tuig sinn obair Dhia.

* Col. iii. 3.

XV.

'S e 'n Spiorad Naomh is ùghdair dhi,
 Araon 'n a tùs, 's 'n a fàs;
 Is 's e fa dheireadh, chrùnas i,
 'Chum cliù an Triath gu bràth.
 'S tra thig an Spiorad uasal ud
 A nuas air cloinn a' bhàis,
 Fior-nochdaidh e, gu buadhach annt',
 Ard-uachdranachd a ghràis.

XVI.

'S e dhearbas orr' am peacaidhean ;
 Seadh, peacadh gin is gniomh' ;
 'S gur h-e a riamh bu chleachdamh dhoibh,
 Bhi briseadh reachda Dhia ;
 Gu 'n d' tharruing sud gach truaighe orr',
 Seadh, truaighean trom' is sìor ;
 'S gu b' e an ciont' a b' uamhasaich',
 Gach uair, bhi diùltadh Chriosd !*

XVII.

Tra bheir e bioradh 's dùsgadh dhoibh,
 Is cùram mu 'n staid chaillt', †
 Bidh mothachadh air ciùrradh ac',
 'S bhi rùisgt' do'n fheirg a thoill :
 Oir falbhaidh, 'n aon-uair cuideachd uath',
 Gach luideag is féin-fhoill ;
 Is gheibhear sin ri tuireadh iad,
 Gun chuideachadh, gun soills'.

* Eoin xvi. 8.

† Gniomh ii. 37.

XVIII.

Ach anns an luidhe bhrònach ud,
 'S tra theich gach dòchas bréig',
 An Spiorad bheir 'n a thròcair dhoibh,
 An dòchas, chaoidh, nach tréig.
 Ach lotaidh e, mu 'n slànuich e;
 'S bidh 'n sàthadh, theagamh, geur:
 Ach mar is doimhn' ùn sàthadh ud,
 Bidh 'n slànuachadh d'a réir.

XIX.

Gidheadh, fo'n lot cha 'n fhàg e iad,
 — Cha b' e, gu bràth, a rùn—
 Se 'n tarruing chum an t-Slànuighir,
 Gu h-àraidh tha 'n a shùil :
 Is ni e obair ghràsmhor orr',
 'Cur tàbhachd annt' is lùth's;
 A chum gu 'n creid, 's gu'n tèarnar iad,
 'S do ghràs gu 'n toir iad cliù.

XX.

Seadh, ni e obair ghràsmhor orr';
 An nàdur ni e nuadh:
 D' an ghoireadh, leis an t-Slànuighear,
 An ath-bhreith tha o shuas.*
 'S tra ni an Spiorad glòrmhor ud
 An tabhairt beò 's gach buaidh,
 Ri Criod, an sin, dlùth-chòrdaidh iad,
 Le creidimh beò, 's an uair.

* Eoin iii. 3.

XXI.

Cha ghabhar ach tre chreidimh ris ;
 'S cha chreid sinn chaoidh dhinn féin ;
 Oir anam marbh, co theireadh e,
 Gu 'n creid e teisteas Dhé ?
 Ach ceart mar tha ar sàbhaladh
 O chumhachd gràis gu léir,
 Tha 'n creidimh beò, is slàinteil ud,
 O ghràs dhuinn mar an ceudn'.

XXII.

Tha mearachd mhòr—'s is cràiteach i—
 San là s' a' dol mu'n cuairt ;
 Ach taitnidh claoïdh ri nàdur i,
 Seadh, nàdur féineil, truagh !
 Gu 'm bheil creidimh anns an t-Slánuighear,
 Trid am bheil slàinte bhuan,
 Dol roimh an ath-breith ghràsmhor ud,
 'S o nàdur 'g éirigh suas !

XXIII.

Is fior, gu cinnt, gur dleasðanas,
 Bhi creidsinn ann an Criod ;
 'S bhi gabhail ri a theisteas-san ;
 Oir tha, gun cheist, e fior ;
 Is gur e ciont' nam míltean e,
 A chual an fhìrinn riamh,
 Nach d'thug iad aire 'rìreadh dhi,
 'S nach d' chreid iad i o Dhia.

xxiv.

Ach 's aon ni sud mar dhleasdanas,
 Tha taisbean' ùghd'rais Dhé,
 'S a chòir a tha o pheacaich aig',
 Do 'reachd bhi 'g agairst géill:
 'S is ni gu h-iomlan eile e,
 'M bheil comas ac', dhiubh féin,
 Bhi gairm gu bith a' chreidimh ud
 A anam tha fo 'n eug!

xxv.

Na bitheadh neach ag innseadh dhomh,
 Gur firinn sud o Dhia;
 Oir àicheadhaidh a phobull e,
 O 'thùs gu 'chrìch a sìos.
 An creidimh, 's lus nach d'àraicheadh
 An gàradh nàduir riamh;
 Dh'f heumadh e fonn a b' f hèarr na sud,
 Chum fàs thoirt dha is gnìomh.

xxvi.

Ri Criod, a deiream, còrdaidh iad,
 Le creidimh beò gu saor:
 Is gheibh iad ceangal pòsaidh ris,
 Am pòsadhbh chaoidh nach sgaoil.
 Is bheir e dion is stiùradh dhoibh,
 'S fior chomunn dlùth, is caomh;
 'N sin their a *chéit*, le dùrachd ris,
 'S tu "fear mo rùin, 's mo ghaoil."

XXVII.

'S e Criod an fhionain fhìrinneach,
 Mu'n d' innseadh dhuinn leis féin ;
 'Chomhpàirticheas gun diobradh riu,
 Am beath' 's am brigh gu léir :
 Tha aonadh dlùth is diòmhair ac'
 Ri Criod,* tre Spiorad Dhé,
 Air nach cuir ùin' no sìorruidheachd
 Chaoi dh crìoch, no idir sgeul.

XXVIII.

'S e 'n t-aonadh bonn a' chomuinn ud,
 Th' aig 'phobull-san ri Dia,
 'S tre 'm builich e, gu h-ullamh orr',
 A chomunn blàth is fior ;
 Araon 's e bonn nan còirichean,
 Gu sònruicht', th' ac' an Criod,
 Tre 'm faigh iad, mar is dòchas dhoibh,
 An oighreachd ghlòrmhor shìor.

XXIX.

Ach O, nach aonadh beannuicht' e,
 Th' aig 'n anam nis ri Criod !
 Tre chreidimh, chaoi dh, o 'n tarruing e
 An toradh nach bi blòn :
 Oir 'fhìreantachd tha uime-san,
 Tre 'n ghabhadh ris le Dia,
 Is Criod bidh mar na h-uile dha,
 Gu h-uile, is gu sìor.

XXX.

Bidh 'n Spiorad Naomh a threòraich iad,
 Gu sònruicht', dh'ionnsuidh Chriosd,
 O'n là sin gabhail còmhnuidh annt',
 Mar Spiorad sòlais shìor.
 Is ni e Teampull àluinn dhiubh,
 Mar àite-tàimh do Dhia;*
 'S oibrichidh e gu gràsmhor annt',
 Gach là, an toil 's an gnìomh.

XXXI.

'S e 'n Spiorad ceudn' a naomhaicheast†
 Gach aon fa leth do'n treud,
 A' tabhairt cumaidh, 's aomaidh dhoibh,
 A dh' aondann ri toil Dhé.
 Is anns an obair dhileas ud,
 'S e firinn' Fhocail féin
 Am meadhon tre an saothraich e,
 'S ann air gach aon gu léir.

XXXII.

'S fo obair ghlan na naomhachd ud,
 Bidh gràdh gach aoin do Chriosd;
 Oir thearbadh nis o 'n t-saoghal iad,
 'S o chomunn dhaoin' gun Dia.
 O lagh a' pheacaidh shaoradh iad, ‡
 'S o dhaors' gach ana-mhiann:
 Tha corp a' bhàis 'n a dhaorsa dhoibh,||
 Ach gheibh iad saors' 's a' chrìoch.

* 1 Cor. iii. 16.

‡ Rom. viii. 2.

† 1 Pead i. 2.

|| Rom. vii. 24.

XXXIII.

Is fior, bidh cathan piantail ac'
 A riamh o fhuair iad gràs;
 Oir 'n fheòil bidh chaoidh a' miannachadh,
 'S ag iarruidh rìs a h-àit.*
 'S an cogadh ud cha chriochnaich e
 Gu sìor gu uair a' bhàis:
 Ach sguiridh 'n sin gu sìorruidh e,
 Oir choisinn Criost am blàr!

XXXIV.

Ach maille ris gach sàruchadh,
 Is cràdh a th' ac o 'n fheòil,
 Thig saighdean geur o Shatan chuc,†
 Gu bràth, tha orr' an tòir.
 'S bheir daoine fuath bhios dearbhta dhoibh,
 Is deochan searbh r' an òl;
 An so bithidh geur-leanmhuinn orr',
 Is garbhlachd ac' 's an ròd.

XXXV.

Ach gheibh gach neach do, 'n àireamh ud,
 Gun teagamh, gràs is glòir:
 Oir chionn gur beò an Slanuighear,
 Gu bràth bidh iadsan beò.‡
 'S e gealladh cinnt' an Tighearn dhoibh,
 Gu 'n siab e uath' na deòir;
 'S bidh es' 'n a chuibhrionn shìroruidh dhoibh,
 'S thig crìoch air làithibh 'm bròin.§

* Gal. v. 17. † Ephes. vi. 17. ‡ Eoin, xiv. 19. § Isa. lx. 20.

XXXVI.

O, leanamaid an naoïnhachd ud,
 Ni 'n t-anam aon ri Criod,
 An coslas is an caomhalachd,
 'S an comunn saor is sìor!
 Do'n pheacadh is fior nàmhaid i,
 'S is bàs i dha 's a' chrioch!
 'S e mais' glòir a nàduir i,
 'S tre 'm meal gu bràth sinn Dia!

XXXVII.

'S e Spiorad Naomh na firinn e,
 A mhìnicheas a ciall,*
 'N sin gabhaidh iad do rìreadh rith',
 Mar 'n fhìrinn tha o Dhia.
 Is bithidh si, tre 'n fhasach, dhoibh
 Mar sgàthan soilleir, fior,
 'S am faic iad glòir an t-Slànuighir,
 Tha àillidh mar a' ghrian!

XXXVIII.

Bidh Focal Chriosd mar sgàthan doibh,
 'S am faic iad 'ailleachd féin ;
 'S ni 'n sealladh mùthadh àluinn orr',
 Gu 'n nàdur-san, 's a sgèimh.†
 'S ma thugadh sùilean fosgait' dhoibh,
 Is sgoltadh tuigs' is léirs',
 'Chum faicsinn glòir' a' chuspair ud ;
 Sud obair Spioraid Dhé.

* Cor. ii. 10, 12.

† 2 Cor. iii. 18.

XXXIX.

Bidh 'm Focal naomh 'n a lòchran dhoibh,
 Fo sheòladh 'n Spioraid cheudn',
 Tre 'm bi iad air an treòrachadh
 Gu tìr na glòir' gu réidh.*
 Bu chianail, dorch, an turus dhoibh,
 —'S cha b' turus e gu nèamh—
 Mur bitheadh 'n lòchran dealrach ud,
 'Toirt soluis dhoibh 'n an ceum.

XL.

'S i 'n fhìrinn 's bonnchar creidimh dhoibh,
 Mar theisteas fhìor-ghlan Dhé;
 Tre 'm fairich, is an aidich iad,
 Gur coigrich iad fo ghréin:
 Tre chreidimh 'n fhocail gluaisidh iad,
 'N an turus suas gu nèamh;†
 'S an Spiorad cumaidh suas annt' e,
 Tre bhuaidh a' chroinne-cheus'.

XLI.

'S e an crann-ceus' gu sònruichte,
 An lòn, 's an dòn, 's an stéidh;
 An sud, tha seasamh glòrínhor ac',
 Air carraig chòmhuard réidh ‡
 'S a mheud 's a fhuair an creidimh ud,
 'S a ghìacas teisteas Dhé,
 S iad-san gu fior a dh'aídicheas,
 Gun saidealtais, e féin.

* Salm. cxix. 105. † 2 Cor. v. 7. ‡ Salm. xl. 2.

XLII.

Seadh, aidichidh, 's cha 'n àicheadh iad;
 Gun nàire air an gruaidh,
 Fior-ghlòdir is crùn an t-Slanuighir,
 'Chuir cuid, 'n ar là, 's an uaigh!
 Oir chuir iad cùl—'s cha chiùirteach leo—
 Ri ùghd'ras Chriosd 's an uair,
 Is roghnaicheadh, le dùrachd leo,
 An rùsg an àit an Uain.*

XLIII.

Och! sud gu lagh is Cùirtibh iad,
 Gu ciùrradh oighreachd Dhia!
 'S do dhaoinibh thugadh ùmhachd leo,
 A' lùbadh dhoibh roimh Chriosd:
 Is ruag iad as a' ghàradh e,
 'S an robh a thàmh o chian;
 Is dh'fhàgadh nis mar fhàsach e,
 'N a ghàradh tioram, blòn!

XLIV.

'S ma tha iad measg an àireimh ud,
 A mhothaich gràs a riamh:
 Riu theirinn—Ged nach faidh mi—
 Gu'm faigh sibh cràdh is pian.
 Is ni e nach gabh àicheadh dhuinn,
 G'an d' chràidh sibh Spiorad Dhia;
 'S gu 'n luidh orr' doille 's fàsalachd,
 An teagasg dh'fhàgas blion!

* Eoin, x. 12, 13; Esec. xxxiv. 11–20. Jer. xii. 7–12.

XLV.

Ach ge b' e fhuair an creidimh ud,
 A ghreimicheas ri Criod,
 Dhoibh bheirear neart gu 'aideachadh,
 'S gu seasamh leis gu dian :
 Oir 'n Spiorad, tha 'n a thròcair-san,
 'Na chòmhnuidh annt' gu sìor
 An creidimh cumaidh beò e annt',
 Seadh, beò annt' gus a' chrìoch.

XLVI.

'S e Spiorad na h-uchd-mhacachd e,
 Am macaibh Dhé nan sluagh,
 A theagaisgeas le acarachd
 Dhoibh ABA ghlaodh 'n a chluais;*
 Oir bheir e muinghinn cloinne ðhoibh ;
 Is aithne ghlan, le buaidh,
 Air Dia, 'n a aogas athaireil,
 'N sin theid an ABA suas !

XLVII.

Bithidh e 'n a fhear-tagraidh annt',
 Ag eadar-ghuidh' le buaidh;
 'G an teagast gu bhi 'g asluchadh,
 Le osnaibh tha do-luaidh†
 Seadh, ni e pobull ùrnuigh dhiubh,
 'S gach dùth'ch am bheil an cuairt:
 Is gheibh iad neart is ùrachadh,
 'N tra thig an drùchd a nuas.

* Rom. viii. 14. † Rom. viii. 26.

XLVIII.

Aig uairibh, an tra lùbas iad
 An glùn, aig caithir gràis,
 Thig frasan blàth, is ùrail orr',
 Mar dhrùchd a bheir orr' fàs.
 Is ruithidh 'n sin gu sùrdail iad,
 An cùrs', o là gu là;
 Is gheibh thu 'n anail chùbhraiddh ac',
 'S a 'ghnùis bhios geanail, tlàth.

XLIX.

Ach, O, nach robh mar Iacob sinn,
 Le spàирн a ghleac gu dian ;*
 Gus 'n d'fhuair e 'bheannachd àraigdh ud,
 A dh'fhàg e air a rian !
 Oir ged bha 'n t-aingeal gràsmhor ud,
 Tur làidir gu 'chur sìos ;
 'S ann chuir e neart is tàbhachd ann,
 Rinn Iacob treun 's a' ghnìomh.

L.

'S e gealladh Dhia do Israel,
 A dh' fhiosraich e le 'ghràs,
 Gu 'm bi e mar an t-uisge dhoibh,
 Mar uisce mìn is tlàth.†
 Ach 's minic thug e dòirtidhean,‡
 A chòrr air 'fheartaibh gnàth'cht',
 Tre 'n chuireadh aois is òigrìdh leis,
 Gu sònruicht', dh' iarruidh slàint'.

* Gen. xxxii. 24-26. † Hos. xiv. 5. ‡ Isa. xliv. 3.

LI.

O, c'ait an diugh, 'm bheil cuimhneachas
 'N an linn chaidh seachad uainn?
 'S an robh e do ar sinnearaibh
 Toirt *Cuingeis* iomadh uair!
 'N tra bha an Spiorad glòrmhor ud,
 'G a dhòrtadh chean a nuas,
 'S gu Slànuighear 'g an treòrachadh,
 'S an d' fhuair iad sòlas buan!

LII.

Bu shealladh ait do Thròcair sud,
 —D' am b' bhròn gun cheist ar truaigh!—
 'N tra thigeadh 'n Spiorad glòrmhor ud,
 'N a dhòirtidhean a nuas;
 'S tra ghlacadh e na ceudan dhiubh,
 Seadh, ceudan an aon uair!
 'G an tarruing leis gu h-éifeachdach,
 Gu treud is crò an Uain.

LIII.

An sin, bha làithean samhraidh ac',
 'S an dannsadhbh iad gu gleust';
 Chaidh thairis nis an geamhradh uath'
 'S chluinnt' òran binn nan eun:
 'S 'n a measg-san, chluinnt,' gu suilbhireach
 Guth a' cholumain shèimh':
 Chitht' lus is geug fo thoradh 'n sin;
 'S an talamh féin fo sgèimh!*

* Dan. Sholaimh ii. 11-31.

LIV.

'S cha 'n e g'an cual, ach chunnaic sinn ;
 'S bu shealladh beannuicht' e !
 'S e peacaich thruagh', gu muladach,
 Ri tuireadh 's sileadh dheur !
 Oir mhothaicheadh an cunnart leo,
 'S bhi nis fo mhallaichd Dhé,
 Air 'n d'thug an Spiorad urramach,
 Le' chumhachd-san, dhoibh léirs'.

LV.

'S e rinn 'n a shealladh beannuicht' e,
 Am focal bhi dol sàs
 Am peacaich làidir cheannairceach,
 'S g' an leagadh sìos gu lär :
 'S an Spiorad leis 'n do leònadh iad,
 'G an treòrachadh gu slàint' ;
 Air Slànuighear toirt edlais dhoibh,
 'S 'g am pòsadh ris gu bràth.

LVI.

Tha cuid fhuair dhachaidh sàbhailt dhiubh,
 S' air leabaidh 'm bàis rinn sgeul,
 Air cumhachd 's gràdh an t-Slànuighir,
 A nochd a ghràs dhoibh féin :
 Is anns a' chreidimh bhàsaich iad,*
 An dòchas slàinte réidh,
 'N tra chuireadh 'thaobh is dh'fhàgadh leo,
 Am pàillunn talmhaidh créidh.†

* Eubh. xi. 13. † 2 Cor. v. 1.

LVII.

'S tha chuid dhiubh fathast dh'fhàgadh dhuinn,
 Tre chaoimhneas ghràidh ar Dé,
 Nis bed tre chreidimh 'n t-Slànuighir,
 'S a' gluas'd gach là d'a réir.
 Is Dia gu' n gléidh gu sàbhailt iad
 O Shatan, 's uatha féin;
 'S o shaoghal coimheach, àrdanach!
 'S gu' n cuir an t-àireamh 'meud!

LVIII.

Is truagh gach neach a dli' àicheadhas
 Gur obair ghràis a bh' ann !
 'S gu' m b' shoilleir do na Bràithibh i,
 'S do chàirdibh Chriosd 's an àm:
 A thaobh na sheallas tàireil oirr',
 Ag ràdh gur e bh' innt' moll,
 No chuireas á leth Shatain i,*
 Bidh cràdh ac' dheth is call !

LIX.

'S fior, bha iad measg an àireimh ud,
 Air 'n d' thàinig crith, is gluas'd ;
 Ach thuit air falbh o'n là sin iad :
 'S mo chiràdh, tha 'd nis 'n an suain !
 Ach c'ait' 'n robh 'n Spiorad saothrachadh
 'Measg dhaoine riabh, le buaidh,
 Nach cuireadh Dia an t-saoghal so
 Faoin-dhealbh do 'n obair suas ?

* Mat. xii. 24, 31, 32.

LX.

Ach co, a chionn sin, dh-àicheadhadh
 Gu 'm b' obair ghràsmhor i?
 No chuireadh á leth Shatain i?
 Bu chràiteach, goirt an ni !
 'San t-siol a 's faillain' dh'fhàsas dhuinn,
 Bidh diasan fàs gun bhrìgh ;
 Ach, a chionn sin, co 'chàineadh e,
 No 'leigeadh dha dol dhìth ?

LXI.

Ach chloinn na' h-oibre gràsmhoir ud,
 Na cràidhibh Spiorad Dhé;*
 Tha annaibh 'na fhear-àiteachaidh,
 Mar Spiorad gràis gu réidh !
 Mu 'n tarruing e a làthaireachd,
 Re iomadh là uaibh féin,
 'S gu 'm faigh sibh caoil' is fàsalachd,
 A dh'fhàgas sibh gun fheum ?

LXII.

Cha 'n e, gu tur, gu 'm fàg e iad,
 'S an d' ghabh e tàmh a riagh ;
 Oir seasaidh 'n ceangal gràsmhor ud,
 Gu bràth, th' ac' ri Criod.
 Ach bidh mar phreas an gàradh iad,
 A dh'fhàsadhbh seac is cròn,
 A fhreumhan ged nach bàsaich iad,
 Air 'bhàrr cha 'n fhaic thu biadh.

* Ephes. iv. 30.

LXIII.

Ach 's truagh, gun cheist, gach anam dhiubh,
 Do nach aithne am feum
 Air 'n obair mhòr is bheannuicht' ud,
 A dh'fhairich pobull Dhé!
 Oir peacadh bithidh raighladh annt',
 'S an diabhull mar an ceudn'!
 Is fanaidh fearg an Tighearn orr',
 Do Chriosd mur toir iad géill!

LXIV.

Bha cuid dhiubh 'n an sùil-fhianuisibh
 Air obair Dhia 's an uair,
 'S iad féin 'n an seasamh dìomhanach;
 Do Chriosd gun tabhairt cluais,
 'N tra chaidh e mach 'n a charbad-san,
 Air anamaibh 'toirt buaidh'!
 Ach nis, an là ud dh'fhalbh e uath';
 'S an staid, gu dearbh, tha truagh!

LXV.

'S e 'n Spiorad Naomh ni toileach iad,
 Bhi tabhairt géill do Chriosd;
 'S am bi gach saors' is sonas ac',
 Nach dealaich riu gu sior.
 'S O! anam, thoir an obair dha,
 A bhuiteas dha mar Dhia!
 Mu 'n tig am bàs gu h-obànn ort,
 'G ad leagadh teann a sìos!

LXVI.

'N sin dorus tròcair dùinear ort,
 Bha dlùth dhuit fad do là;
 Tre 'n tugadh cothrom dùsgaidh dhuit,
 Gu cùram mu do shláint';
 Ach chionn gu'n d' chuireadh cùl leat rith',
 Bidh càradh agad 's cràdh;
 Oir dh'fhalbh a nis an ùin' ud uait;
 An ùin' nach pill gu bràth!

LXVII.

Ach fathast, 'm feadh 's tha ùin' ann dhuit,
 Is gairm as-ùr o Dhia,
 Mo thruaighe léir, nach dùisgeadh tu,
 'S nach dùineadh tu ri Criod!
 Tha 'ghàirdean fathast sìnte dhuit,
 O creid, gu cinnt', gur fior!
 'S gun dàil, ma 's e, 's nach pill thu ris,
 Di-mhilltear thu gu sìor!

LXVIII.

Mo thruaighe léir, cha 'n aithne dhuit
 Do chunnart no do chall,
 No mhallachd tha 'n a luidhe ort,
 Mar eallach tuilleadh 's trom!
 'S cha 'n e a's lugha cunnart dhuit,
 Do d' chunnart thu bhi dall!
 Ach Dia gu 'n tog an dalladh dhiot,
 Mu 'n leagar thu fo 'n fhonn!

LXIX.

Is sibhse 'shluaigh mo chùraim-sa,
 O, b' e mo dhùrachd dhian,
 Ri Fear mo ghràidh gu 'n dùnadhbh sibh;
 'S an ùir mu 'n luidhinn sìos!
 Oir dhòirteadh e, 'n a ghaol-san oirbh,
 An Spiorad Naomh gu fial:
 O Gluaisibh!—teichibh!—aomaibh ris!
 Seadh, aomaibh,—'s gabhaibh ciall!

LXX.

Tha iomadh dhibhs' mi-chùramach;
 —Is ciùrrtach leam a luaidh!—
 O! idir, c'uin a dhùisgeas sibh,
 O'r dùsal trom, 's 'ur suain?
 Oir, ma gheibh bàs is breitheanas,
 —Tha feitheamh air gach sluagh—
 Sibhse gun Chriosd 's gun mhaiteanas,
 Bhur seasamh bithidh truagh!

LXXI.

'S ma chi mi measg an àireimh sibh,
 'S an là an nochdar Chriosd,
 Chum sgaraidh chaoidh o 'làthair-san,
 Na rinn air tàir a riamh:
 Is ni e 'n diugh ni deurach mi,
 —Ach sgeul e bhitheas fior—
 Ri 'r diteadh-san gu 'm feumar leam,
 Mo sheul a chuir gu sìor!

LXXII.

'S 'a chuid 'n ur measg a ghràdhaicheadh
 Le Dia nan gràs o chian:
 'S mar thoradh air a ghràd-san dhuibh,
 A thàlaidh sibh gu Criod;
 Gu 'n robh a Spiorad gràsmhor-san,
 Ghabh tàmh 'n a phobull riamh,
 Chaoideh maille ribh, 's 'g ur 'n-àiteachadh—
 —Sud m' ùrnuigh ghnàth ri Dia—

LXXIII.

'S fo stiùradh 'n Spioraid uasail ud,
 A chuireadh nuas 's gach àl,
 O bithibh beò, is gluaisear leibh
 Seadh, gluaisibh ann gach là!*
 Faigheadh e tric a' lùbadh sibh,
 Is dlùth ri caithir ghràis;
 Is cuimhnichibh 'n ur 'n-ùrnuighibh
 'M Fear-iùil le miann bhur slàint'!

LXXIV.

Is tagairibh, gu dùrachdach,
 Gu 'n tigeadh 'n drùchd a nuas,
 D' ar n-Eglais, bheireadh ùrachadh,
 Is lùth's gu seasamh suas;
 Gu seasamh le a Ceannard-san,
 A cheangal ris 's an uair;
 Is bheirear dhi na beannachdan
 A cheannaich e d' a shluagh.

* Gal. v. 25.

LXXV.

“ Gu ’n tigeadh àm ath-bheothachaidh,
 A thogadh reothadh bhàis,
 Dheth iomadh tha ’n am priosunaich,
 Aig ceartas Dhia an sàs!
 Gun eagal roimh an t-siorruidheachd,
 A dh’ iathas ump’ gun dàil;
 Far am bi ceartas ’g iarruidh uath’,
 An diol nach toir gu bràth!

LXXVI.

“ Gu ’n tigeadh ’n anail chaoimhneil ud,
 O cheithir ghaothaibh nèimh,
 A shéideadh air na cnàmhreibh dhuinn.
 Tha fad ’n an tàmh fo ’n eug!
 O, ’s tioram, seadh, ’s is lìomnhor iad,
 Fo ghrian an t-soisgeìl shèimh;
 Is iomadh nis air liathadh dhiubh,
 ’N an slighibh cianail féin!

LXXVII.

“ Gu ’n tigeadh ’n anail éifeachdach,
 Air oighreachd Dhé a nuas!
 A thogadh goirt is caoile dhiubh,
 ’S a chaochaileadh an snuagh.
 Oir na nithe ta làthair annt’,
 Ghrad bhàsaicheadh gu luath,
 Mur bi an Spiorad glòrmhor ud,
 ’G an cumal beò gach uair.

LXXVIII.

“S e sud a bheireadh ath'rachadh,
 Seadh, earrach 'n déigh an fhuachd,
 'S a bheireadh aimsir shamhraidh dhuinn;
 'S an geomhradh theicheadh uainn.
 Ni ghaoth o dheas, tra shéideas i,
 An déigh na gaoith o thuath,
 Ar lios 's ar spòsraidh ùrachadh,
 'S bidh áileadh cubhraidh uath'.

LXXIX.

“O, Spioraid, thugadh éisdeachd leat,
 Is spéis do ghlaodh do shluaigh;
 Tha là 's a dh' oidhch' ag éigheachd riut,
 Le osnaibh gheur do-luaidh !
 Gu 'n tigeadh àman ùrachaidh,
 Air cloinn a' chùmhaint, nuas;
 An anail dheanadh sùrdail iad,
 Chum ruith an cùrs le buaidh.

LXXX.

“An anail dheanadh gnìomhach iad,
 Am fion-lios Dhé gach là;
 'S a dheanadh seasmhach, eudmhor, iad,
 Is treun, 's an latha-bhlàir:
 A dheanadh Criod ro-phrìseil dhoibh,
 Is iads' ro-dhìleas dha';
 A bheireadh 'n inntinn spioradail,
 'S d' a spiorad'lachd bhi fàs!

LXXXI.

'S a theachdairean an Tighearna,
 N a Fhionan-san fhuair dreuchd,
 'S 'n a thigh a ghabh r' a riaghlaadh-san;
 'S tha 'g iarruidh maith an treud;
 O! chuireadh leis fo fhiachaibh sibh,
 Bhi biathadh 'phobuill féin,
 Is peacaich 'ghairm gu strìochdadadh dha,
 'S am bi ac 'dòn gach ré!

LXXXII.

Air drùchd an Spioraid ghlòrmhoir ud,
 Biodh eòlas agaibh 's leirs'
 Is thugaibh àite comhnuidh dha,
 Gu sònruicht', annaibh féin.
 Oir 's e bheir saors 'is comas dhuibh,
 Ni ullamh sibh 's an dreuchd;
 'S a dh'easbhuidh 'ghnùis 's a chomunn-san,
 Bhur 'n obair tha gun fheum!

LXXXIII.

O bithibh chaoidh mar sholusaibh,
 Ro-dhealrach measg an t-sluaigh;*
 Is cuimhnichibh gur salann sibh,
 Do 'n talamh 'm bheil bhur cuairt.†
 Is seirmeadh glòdir Fear-saoraidh leibh,
 —A ghaol, a bhàs, 's a bhuaidh—
 'S fo dhrùchd an Spioraid, saothraichibh;
 'S bhur saothair-san gheibh duais.

* Phil. ii. 15.

† Matt. v. 13.

LXXXIV.

Ach Dia nan gràs gu'n deònaicheadh,
 A Spiorad dhòirteadh nuas!
 Chum tional steach nam fògarach,
 'S gach sean is òg a ghluas'd!
 Gu 'n dùisgeadh e na codalaich,
 Gun eagal tha'n an suain!
 'S gu neartaicheadh e 'phobull-san,
 Gu cogadh leis an Uan!

LXXXV.

Ach, cia mar nithear sgeula leam,
 Air Spiorad Dhé, gu slàn'!
 'N a obair dhìomhair éifeachdaich
 Air 'phobull féin 's gach àl!
 Is obair shruth o 'n Diadhachd i;
 'S an Diadhachd tha a tàmh!
 Seadh, obair air son siorruidheachd !
 'N so crìochnaichead mo dhàn.

IOMRADH AITHGHEARR

AIR

MR. IAIN CEANADAIDH URRAMACH,

MINISTEIR A' CHAISTEIL RUAIIDH,

DO 'N RINNEADH AM MARBHRANN A LEANAS.

Rugadh Mr. Iain Ceanadaidh, 's a' bhliadhna 1772; ann an Cis-uirn, an Sgìreachd na Comraich, an Siorramachd Rois. Ach, ged b' ann do Sgìreachd na Comraich a bha Cis-uirn, is ann ri Sgìreachd Loch-caruinn bu mhò agus bu dlùithe dàimh an t-sluaigh; agus b' fhòr sin gu h-àraig mu theaghlaich athar Mhr. Iain Ceanadaidh, gu sònruichte fhad 's a bha Mr Lachunn urramach air cheann na seirbhis agus na treuda an Loch-caruinn. Bha Dòmhnull Ceanadaidh, athair Mhr. Iain, 'n a dhuine air an robh mòr mheas, mar dhuine diadhaidh. Chaidh a thogail 'n a dige le iarrtus air taobh a phàraintean, agus nach d' àicheadh e féin, gu 'm biodh e 'n a mhinisteir an Eaglais na h-Alba; ach an déigh dha dol air aghaidh rè seal 'n a fhoghlum, tharruing e air ais, gun fhios cinnteach bhi a nis againn ciod an impidh shònruichte fa leth fo 'n do chumadh air ais e. Agus mu thimchioll a chaithe-beatha, is leòr mar theisteads, a ràdh, gu 'n robh mòr mheas aig Mr Lachunn Loch-caruinn air. An

déigh d' a mhac, Mr. Iain, bli air cinntinn 'u a òganach, 's e a' dol air aghaidh 'n a fhoghlum chum na ministreileachd, theireadh Mr. Lachunn iomadh uair r' a athair, na briathran a chaith a labhairt ri Daibhidh mu 'n teampull, agus mu Sholamh a mhac,—“A chionn gu 'n robh e 'n ad chridhe tigh a thogail do m' ainm-se, is maith a rinn thu gu 'n robh e ann do chridhe: gidheadh cha tog thusa an tigh, ach do mhac,—togaidh esau an tigh do m' ainm-sa.” Cha 'n fheud sinu bhi an teagamh, nach facea Mr. Lachunn urramach deadh chomharraidean air obair nau gràs ann an Iain Ceanadaidh, mu 'n rachadh e an fliad so: agus tha fios aig pobull an Tighearn, air feadh na Gàidhealtachd mu thuath, gu 'm bu duine Mr. Lachunn, 'u a ghinealach, d' an robh rùn an Tighearn air a foillseachadh, gu h-iongantach, ni bu mhò na fhuair duine eile 's am bith r' a linn, air au cualas iomradh leinne, 'n ar n-Eaglais. Agus cha mhò is fiosrach sinn, gu 'n robh an déigh sin, duine 's am bith eile an Albainn, 'n a' làithibh no 'n a ghinealach féin, bu dlùithe a rèanig, na Mr. Iain Ceanadaidh, air sealladh soilleir bhi aige air rùu an Tíghearn, ann au co-chomunn a' chreidimh agus a' gluràidh r' a Ard-mhaighstir féin.

Tha fios gu maith aig co-aoisibh Mhr. Iain Ceanadaidh a tha fatlast a làthair, gu 'n do thaisbeanadh gu ro mhoch, eadhon an làithibh 'òige, comharraidean air obair nan gràs ann, air mhodh sònruichte, soilleir: agus bha iomadh saorsa iongantach 's an flreasdal air am buileachadh air. Fhad 's a bha e fatlast 'n a naoidean, thàinig a' *Bhreac* a stigh air an dùthlaich, aon gheamhradh, gu trom, bàsmhor. Bha dithis do theagh-lach 'athar, bu sheiue na Iain, air an gairm air falbh leatha. Bha Iain féin air maduinn àraig air a thoirt co

iosal, 's nach b' urrainn doibh a bha timchioll a leapa a ràdh, am bu mharbh no 'm bu bheò e. Thàinig au luchd-cèirde gu an cistean-mairbh ulluchadh air chionn na cloinne a chaochail cheana; na càirdean, trom, muladach, deurach; agus 's e a dh'fhoighnich an luchd-cèirde, an gabhadh iad a nis tomhas an treasaimh fir, agus e gu soilleir, a réir am beachd-san, air siubhal. "Cumaibh oirbh" ars an t-athair; "feudaidh sibh bhi a' falbh: teasairgear mo leanabh o 'n bhàs so; agus aidichear fathast leis an Tighearn e."

Mu aois nan cùig bliadhna, bha e air a thabhairt gu mòr do ùrnuigh uaigneich: agus cha 'n e sin a mhàin, ach dh' innseadh dhuinn air ùghdarras nach gabh diùltadh dhuinn, — eadhon mu 'n àm sin ("A beul naoidhean agus chìochran, dh'òrduich thu neart"), gu 'n do bheannaich an Tighearn e mar inneal. Chuir a mhàthair, aon là e, a mach do 'n chruaich mhòine, a thoirt ultach mòine, a stigh leis. Thachair gu robh còs 's a' chruaich, a thug fasgadh agus folach do 'n leanabh; chrùb e a stigh do 'n chòs; agus thòisich e air athchuingibh a chridhe a dheanamh aithnichte do Fhear-éisdeachd na h-ùrnuigh. Thachair gu 'u d' thàinig bean blochd an rathad, d' am b' àbhaist bhi ag iarruidh déirce; agus aig nach robh deadh ainm roimh 'n àm so, a measg a luchd-eòlais. Chual i fuaim bruidhne 's a' chruaich mhòine; tharruing i am fagus, chum 's gu 'n cluinneadh i: chuir i a cluas ris a' chruaich: chual i ua h-uile focal a labhair an leanabh; lònadh le h-iongantas a h-inntinn; ach cha b' ann le h-iougantas a mhàin; bhuaileadh a coguis; agus riamh an déigh an là sin, tha e air 'aithris, le h-iomadh, gu 'm facas atharrachadh soilleir, co dhiubhl, n a giùlan 's 'n a comhluadar, air au robh coslas, gur h-ann o chumhachd a bha e.

Cha ghiùlain aq t-iomradh aithghearr so dhuinn mòran a thoirt air aghaidh mu chaithe-beatha Mhr. Iain Ceanadaidh ann an làithibh 'dige, mar bha a' tighinn air aghaidh; ach a mhàin a ràdh, a réir gach cunntais agus iomraidh a fhuair siun uime, uatha-san d'am b' eòl e o a cheud dol a mach, ann an sgoil, 's an Oil-thigh, gu 'n do nochd e gu soilleir, taitneach, sòn-ruichte, 'inntinn agus a chridhe bhi fo riaghladh gràis, le a ghiùlan bhi do réir sin.

Fhuair e comas searmonachaiddh o Chléir Loch-car-uinn an déigh dha a dhol tre riaghaitibh foghlum na h-Eaglais, agus Mr. Lachunn air cheann na Cléire. Dh' innis neach àraig dhuinn, o chionn ghoirid, ni a thuirt Mr. Lachunn, agus aobhar aige bhi a' labhairt mu dhuin' òg eile a fhuair comas searmonachaiddh o 'n Chléir cheudna, an déigh do Mhr. Iain Ceanadaidh 'fhaotainn. Ars Mr. Lachunn,—“ Rinn an Spiorad Naomh Mr. Iain Ceanadaidh 'n a mhinisteir: ach tha eagal orm, gur h-e Mr. Iain agus mi féin a rinn ministeir do Mhr. ——.”

An déigh do Mhr. Iain Ceanadaidh bhi a nis 'n a shearmonaiche 's an Eaglais, fhuair e gairm air tùs, gu bhi 'n a flear-cuideachaidh do mhinisteir Sgìreachd Loch-bhraoin. Cha 'n 'eil e a nis 'n ar comas 'ainmeachadh ciod an ùine a dh' fhàgadh an sin e. Ach na 'n ceadaicheadh giorrad ar n-iomraidh e, dh' fheudadh sinn iomadh dearbhadh a thoirt, nach b' ann an dìomhanas a shaothraich e 's an Sgìreachd fharsuing sin. Chaidh a ghairm 's an ath àit, gu bhi 'n a flear-teagaisg, ann an *Eireabull*, an Duthaich Mhic-Aoidh, far an robh Mr. Robison ainmeil, agus Mr MacBride urramach 'n a dhéigh, roimh 'n àm so. Bha, gun teagamh an dithis sin 'n an daoinibh air leth 's an Eaglais; agus aig an robh an snothair ga mòr air a h-aideachadh leis an Tighearn.

Bu shòlas do na coimhthionalaibh 's 'a chèarna ud, 'n uair thàinig Mr. Iain Ceanadaidh 'n am measg, gur h-ann a fhuaireadh e a' daingneachadh na h-oibre a chaidh a thòiseachadh fo 'n dithis a bha roimhe. Agus tha iad fathast r' am faotainn 's a' chèarna cheudna, fasaichte nis mar tha i, an coimeas ris mar bha i an uair sin, neach agus neach, a dh' aidicheas, fhad 's is mair-eann doibh 's an fhàsach, agus tha sinn a' creidsinn 's an t-siorruidheachd féin, gu 'm b' e Mr. Iain Ceanadaidh an Teachdaire fo an do dhùisgeadh 's an do shoills-icheadh iad a chum eòlais air slighe na beatha maireannaich. Bha aige, fhad 's a bha e an Eireabull, bhi a' sear-monachadh do choimhthionalaibh ann an tri sgìreachd-aibh fa leth, Sgìreachd Dhiùirinis, Eadar-a-chaolais, agus Thunga. Anns na Sgìreachdaibh sin, tha fathast, ainm agus cuimhne Mhr. Ceanadaidh, cùbhraidh agus blasda do phobull an Tighearn.

Fhuair Mr. Ceanadaidh, a rìs, gairm gu bhi 'n a shear-cuideachaidh do Mhinisteir Sgìreachd *Asaint*. Bha e seachd bliadhna 's an dreuchd sin; agus cha b' ann dìomhain, gu cinnteach; ach a shaothar gu mòr agus gu farsuing air a h-aideachadh. Bha e soilleir gu 'n robh an Tighearna maille ris. Bha an Sgìreachd farsuing, agus bha i an uair sin fo thuath lòn-mhor, 's cha b' ann fasaichte, mar tha a' chuid mhòr dhi an diugh. Agus tha sinn a' creidsinn a réir na h-ùine a bha e 's an Sgìreachd sin, gu 'n robh a shiaothair air a beannachadh air dhòigh co soilleir 's a chunncas riamh i. Bha a dheuchainnean féin aige 's an Sgìreachd, ach 's ann o dhaoinibh a bha iad. Bha gràdh an t-sluaigh air a tharruing a mach d' a ionnsuidh gu h-anabarrach. Chronaicheadh so dhoibh, ach b' ann le cumhachdaibh an t-saoghal so, 'n uair dh' iarr, s' a dh' oidhirpich iad e

bhi aca mar mhinisteir, an déigh bàis an duine do 'n robh e 'n a fhear-cuideachaidh. Cha 'n fheud siun, agus cha toigh leinn idir, connsachadh 's am bith an aghaidh luchd-riaghlaidh aimisireil a mholadh: 's ann a dliùteadh sinn e. Ach cha mhiò a dli'fheudas siun cruidh-smachd agus ain-tighearnas na buidhne sin a mholadh, ach an dìteadh gu trom, leis an d' rinneadh 's a' chùis so, tàir, air athchuingibh an t-sluaigh, 'n uair dh'iarr iad uile mar leis an aon ghuth, Mr. Ceanadaidh bhi aca mar mhinisteir. Agus tha sinn a' creidsinn, gun tàmailt 's am bith do luchd-teagaisg eile, gur lìonnhor iad ann an *Asaint* mu thuath, gus an an là an diugha, nach d' fluair fathast o 'n dh'fhìag Mr. Ceanadaidh iad, beathachadh no cuideachadh d' an anamaibh, mar fluair 's mar mhothaich iad r' a linn-san 'n am measg. Cha b'iad sluagh na Sgìreachd sin a mhàin, ach nan sgìreachdan dlúth dhi, air an do luidh mulad nach b' eutrom, 'n uair mhothaich iad Mr. Ceanadaidh bhi air a dhiùltadh do *Asaint*.

Ach bha rùn an Tighearn a' stiùireadh an duine chaoimh, gu earrann eile do 'n fhìon-lios, far an robh obair a' feitheamh air. Fluair e gairm agus cuireadh gu Sgìreachd a' Chaisteil Ruaidh, ann an Cléir na Cananaich, an Siorramachd Rois. Rinn an Tighearn aithnichte, ceum air cheum, obair, do rìreadh, bhi aige r' a dhèanamh leis, 's an Sgìreachd ud, agus ann an cròch-aibh farsuing na coimhearsnachd timchioll, am fagus agus am fad. Bha sgìreachdan àraid gun bhi fad o 'n Chaisteal Ruadh, far nach robh an soisgeul 's au àm ud. Bha Eaglais a' Chaisteil Ruaidh, a nis, air tighinn gu bhi 'u a fasgadh, 's na furtachd do anamaibh uireasbhuidh-each, bochd, nan Sgìreachdan ud; agus chìeadh, gach sàbaid na cendan dhiubh sud, nach faigheadh a

stigh, a' dòmhachadh nan dorsan 's nan uinneagan timchioll na h-Eaglais.

Cha 'n fhurasd dhuinn labhairt gu saor, mu 'n tomhas soirbheachaidh a fhuair obair an Tighearn fo làimh Mhr. Ceanadaidh an Sgìreachd a' Chaisteil Ruaidh. Tha iomadh dhiubh fathast a làthair a measg an do shaothraich e. Cha buin dhuinne breth a thoirt orra. Ach a' toirt breth orra féin, cha chreid sinn nach lòn mhór an sin iad, a dh' aidicreas, ma bha buaidh do rìreadh dhoibh-san 's an focal, gur h-ann leis-san, mar inneal, a mhothaich an anama i. Agus is iomadh iad, do fhìor phobull an Tighearn, ann an iomadh Sgìreachd agus coimhthional eile, o Rutha-Stòir, an Asaint mu thuath, gu ruig crìochaibh Bhàidean-aichagus Loch-abair mu dheas agus an iar, a dh' aidicreas gu 'n do shoillsich solus an t-soisgeil shìorruidh 's a' Chaisteal Ruadh, gu saoibhir, dealrach, pait, ri linn Mhr. Ceanadaidh; agus a mholas an Tighearn, gu 'n do dhealraich e a mach as sin, gus an d' ràiuig e orra-san, 'n uair bha iad 'n an suidhe an dorchadas, agus fo sgàile a' bhàis. Agus is iomadh uair a thachair, r' a linn, aig àmaibh sòluimte Comunnachaidh, nach robh aon choimhthional an taobh stigh do na crìochaibh farsuing ud, (agus a iomadh cèarna eile a thuilleadh orra), nach faighteadh neach agus neach dhiubh 'n an suidhe ann an coimhthional a' Chaisteil Ruaidh. Bha ainmean an Luchd-comunnachaidh, aon bhliadhna, gu sònruichte, air an togail, agus fhuaireadh cuid dhiubh a thàinig o dhà fhìchead Sgìreachd 's a deich.

Ach a mhàin aon duin' eile, agus 's c sin ùghdair a' Mharbhainn a leauas, cha robh ministeur air feadh na Gàidhealtachd r' a linn, a shaothraich co farsuing 's a rinn Mr. Iain Ceanadaidh. Is gann a bha Sgìreachd an taobh stigh do na crìochaibh a dlí' ainnmich sinn cheana,

agus far am faigheadh e dorus fosgailte, far nach robh e a' dol o àm gu h-àm, agus gu h-àraid aig tràthaibh comunnachaидh. Is e a mhàin là a' bhreitheanais a dh' fhoillsicheas a' bhuaидh a thàinig an lorg a shaothrach air feadh nan coimhthionalan ud. Ach bha e soilleir, gidheadh, rè aimsir a shaothrach, nach robh coimhthional dhiubh sud uile, far nach faighteadh comharraidhiean taitneach, gu 'n robh an Tighearn maille ris. Bha a' bhuaидh shònruichte so air searmonachadh Mhr. Ceanadaidh, os ceann gach duine 'n a dhreuchd air an do chuir sinne èdas, ged bu choigreach do choimhthional e 's an àm, gu 'n robh smachd agus ùghdarras a theagaisg a' cur ràthadh air aire luchd-éisdeachd, 's 'g a fhàgail soilleir dhoibh, nach b' ann uaithe féin a bha e a' labhairt riutha, ach do rìreadh o Dhia, ag innseadh dhoibh an cliùtha 's an cor. Bha a' bhuaидh so 'n a theagasc-san, a ruigheachd a stigh air dìomhaireachdaibh spioradan dhaoine, 'g an rùsgadh, 's 'g an dearbhadh, 's 'g am fàgail gun lethsgeul.

Ach is ann do phobull an Tighearn gu h-àraid a b'-àbhaist do Mr. Ceanadaidh, 'n uair thigeadh e 'n am measg, bhi 'n a aobhar gean agus subhachais. Ma bha anam sàruichte 's am bith,—anam brùite, leònta, no fo thrioblaid, anam ann an dorchadas, no ann an geimhlibh, —anfhann, tinn, lag-chridheach, falamh, no fo dhòlobhail misнич, bha focal aige o 'n Tighearn r' a thoirt dhoibh, 's r' a roinn a mach órra, leth air leth. Ann an roinn an fhocail so orra, dheanadh se e le cuimse spioradail, agus ann am bannaibh a' ghràidh, a' chaoinhneis, agus na dìlseachd sin, a bha do rìreadh a' foillseachadh gu 'n d' fhòghluim e féin iad o Chriosd. Is iad na h-euslain, na daoine ciurramach, na bochdan, na bacailch, na doill, a dhòmhlaich mu thimchioll Chriosd 'n uair bha e féin air

thalamh a bhos. Agus far an do fbritbealadh a Spioradsan gu saoibhir d' a sheirbhisichibh féin, chithear an ni ceudna, 's an t-seadh spioradail, a' tachairt. Agus cha b' aithne dhuinn idir, c'ait, 'n a latha féin, a b' fharsuinge a nochdadb so, na ann am pearsa, agus fo shearmonachadh Mhr. Ceanadaidh. B' iad sud an dream a mhothaicheadh, fo a mhinistreileachd, na feartan, air an robh an anama am feum, a' tighinn d' an ionnsuidh mar o 'n Tighearn;—an Tighearna gu tric, le a sheirbhiseach, a' pilleadhl am bruid, mar shruth 's an àirde deas. Cha b' iad na gluasadan eutrom, fuaimneach, farumach, faladh, a gheibhteadh a' leantuinn na saothrach beannaichte air an d' fheith an leithide so; ach an oladh 's am fion air, an dòrtadh a stigh air creuchdaibh domhain agus dìomhair an anama, troimh làimh an t-seirbhisich theò-chridheich, aig an robh co-fhulangas maille riutha 'n an deuchainnibh; agus e féin air a leigheas 's air 'eiridneadh fo làimb an Ard-léighe, d' an aithne dìombaireachd a' chridhe stigh.

Cha b' ainmic le anamaibh fo thrioblaid a thighinn do 'n Chaisteal Ruadh astar nan ceud mìle, a' sìreadh na furtachd agus an fhuasglaidh air an robh iad am feum. Agus tha fios againn gu 'n robh iomadh neach àraig, a ghairmeadh air tùs fo mhinistreileachd Mhr. Ceanadaidh, a bha a' tighinn aig amaibh suidhichte gach bliadhna, á sgìreachdaibh lìonmhòr, g' a éisdeachd, aig amaibh coinnimb agus searmoin, air chùl amaibh sòluimte comunnachaidh;—anama a fhuair, mar dh' aidicheas cuid dhiubh féin fathast, gu tric, an soithichean faladh bhi air an lìonadh;—an t-uisge bed a' tighinn a stigh, a' taiseachadh 's ag ùrachadh an fhuinn, agus eadhon a' chainnt bheannaichte 's an do ghiùlaineadh an teagasc, a' sileadh mar an drùchd air buadhaibh an anama. Bu ni comh-

arraichte mu an leithidibh so gu tric, gu' 'n tigeadh 's gu 'm falbhadh iad, gun aon fhocal a labhairt ris an duine bheannaichte féin, an anama air faotainn riarrachaidh o a theagast, agus an inntinn fo thomhas do fhiamh, le doinbhneachd a bhreithneachaidh mu an cùisibh 'n a ioghnadh dhoibh. Is ann a shaoileadh neach gu 'n robh e gach lì ag éisdeachd an osnайдhean uaigneach, agus 'n a fhanuis air spàирн nan anama ud a' gearan ris an Tighearn.

Ged bha saothairean Mhr. Ceanadaidh, mar so, farsing, lìonmhòr, o 'n bhaile,—gidheadh b' e 'n t-aodhair e aig an àm cheudna nach do dhearmaid an treud a dh' earbadh gu sònruichte ris féin. Is fianuisean iomadh dhiubh féin fathast air so. Agus cha b' ann an lughad, ach an lìonmhoiread bha na saothairean so 'n am measg a' dol, o bhliadhna gu bliadhna, mar shaothairibh sàbaid agus seachduin. An t-seachduin mu dheireadh d' a chuairt air thalamh, shearmonaich e dhoibh na h-uile là do 'n t-seachduin sin. Agus mar bha e a' pilleadh dhachaidh an uair mu dheireadh a labhair e riutha, agus e a' faicinn a' choimhthionail a' sgaoileadh ri solus na gealaich,—sheas e, agus e a' sealltainn air ais orra. "Mo phobull caomh! Mo phobull bochd!" ars esan, an éisd-eachd aoin d' a nigheanaibh, a bha 'n a seasamh r' a thaobh,—'s a mhothaich, ged bu bheag a smuaiuch i 's a' cheart àm e' air son a bha e, gu 'n robh a bhriathran air an labhairt gu h-anabarrach sòluimte agus cudthromach, agus e an uair sin 'n a làn shlàinte àbhaiseich. Is ann a sheas e,—a shùil a' foiseachadh air an t-sluagh, gus an robh iad a' dol as an t-sealladh;—cheumnaich e, an sin, air a shocair, a stigh, gun fhocal tuilleadh a labhairt 's an àm. Agus a nis, á teis-meadhon a shaothairean, mar theireadh sinne, fhuair e gairm an Ard-

Mhaighstir a dh'ionnsuidh a shuaimhneis shìorruidh. Duine a bha a riamh, o thùs a shaothrach, cudmhòr, dian, dileas, agus cumhachdach, ann an tagradh ri ana-maibh as leth Chriosd, cha b' fhurasd fhaicinn roimh-làimh, cia mar b' urrainn ath-bheothachadh a thighinn air, 'n a eud agus 'n a ghràdh. Gidheadh, chunncas, agus dh' aithních a choimhthional féin air, goirid roimh dha bhi air a ghairm air falbh uatha, gu robh lasadh an-abarrach air tighinn air, 'n a eud, agus 'n a thagradh riutha. 'S ann bha e mar nach b'urrainn e dealachadh riutha, gus am faiceadh e ni-eigin do dhearbhadh mu gach aon fa leth dhiubh, Criod bhi air a ghn annta. Bha e soilleir gu 'n robh e a' faicinn na b-ùinc nis bhi goirid. Agus cha b' iongantach idir roimh-fhios bhi aig Mr. Iain Ceanadaidh, o 'n Tighearn, an t-àm bhi air tighinn 's an gairmteadh a suas e. B'iomadh dearbhadh a thug e, rè aimsir a chluairt, an Tíghearn bhi a' toirt dha aithne roimh-làimh mu nithibh a bha fathast neo-aith-nichte do dhaoinibh eile. Cha b' e uaill, 's an t-sochair neo-àbhaiseach so a chìteadh, 'n a bhriathraibh, no 'n a ghiùlan;—cha b' urrainn, gu cinnteach gu 'm b' e, ann an duine a fhuair co fagus 's a fhuair esan, air uchd agus comhairle a Thighearu. Is e a gheibhteadh ann-san, irioslachd-inntinn, sèimheachd, macantas, eagal diadhaidh, fiadh na naomhachd air a spiorad, 'n uair bu shoitheach e a bha làn do nithibh doimhne Dhé. Mar b' àirde a chìtheadh pobull an Tighearn e ag éirigh suas mar air sgiathaibh, 's a' gabhail seallaidh air glòir na Diadhachd agus na rioghachd a ta shuas,—is ann a b' ìse a mhothaicheadh iad e a' tighinn, ann am bedh-thrua-cantas gràidh, a' nochdadhl a cho-fhulangais ri cor nan anama a bha an sàs, agus a' sedladh shlighe an fhuasglaidh dhoibh-san a bha ceangailte. Bha an tomhas 's

an robh rùn an Tighearn air a thoirt dha, a' foillseachadh cuiid do nithibh a bha fathast gu teachd,—air a dheanamh aithnichte air mhodh shònruichte ann, goirid roimh àm a chaochlaidh. Rè na bliadhna sin féin, ann an caochladh àit, dh'inuis e gu sòluimte do choimhthionalaibh fa leth, gu 'm b'i sin an uair mu dheireadh a labhradh e riutha. Agus mu thimchioll nan gluasadan agus an atharrachaidh a bha 's an àm a' tighinn dlùth air Eaglais na h-Alba, b'iomadhl rabhadh, earail, agus sanas, a thug e d' a choimhthional féin. “ Tha an là dlùth oirbh,” ars esan, aon uair, “ ged nach faic mis' e, anns am faic sibhse, am feur a' fàs ann an dorsaibh an tighe so; anns am faic sibh sagart Pàpanach, feudaidh e bli, no neach is co-ionanu dhuibhse ri sagart, 'n a sheasamh far am bheil mise an diugh.”

Cha chomharradh air mhaith mu chor na h-Eaglais, gu 'n cuireadh, an Tighearn bhi a' buileachadh a leithid so do thiодhlaic gràis,—iongantas air neach 's am bith. Ach is truagh do rìreadh an comharradh e, ma 's e spiorad farmaid, no àicheadh nan nithe so, a gheibhear a' gluasad ann an uchd cuiid do luchd-aideachaidh, ri cluinntinn an iomraidi so. Agus is dearbh leinn gur h-e an teisteas a bheir pobull an Tighearn a fhuair sochair an fhior èòlais air an duin' urramach so; eadhon nach b' urrainn dhoibh féin bhi sad no goirid 'n a chomhluadar, no 'n a cluideachd, gun làn-dearbhadh a thighinn a dh' ionnsuidh an tuigse, gu 'n robh mu 'n coinneamh, “ Duine ro-ionmhuiinn,”—duine eadhon mar bha Daniel o shean, mu 'n dubhairteadh. “ Tha thu air do ghràdhachadh gu ro mhòr.”

Cha 'n eutrom an gnothuch do dhuine 's am bith a ghabhail os làimh, buadhan agus feartan cliù Mhr. Iain Ceanadaidh a chur an céill. Cha ghabh sinne os làimh

e. Gidheadh is dleasdanas e a dhlighear do 'n Eaglais, ni-eigin bhi air a chur sìos mu an timchioll.

O gach iomradh a fhuair sinne mu Mhr. Ceanadaidh o iomadh a chuir eòlas gu moch air, agus aig an robh tiodhlac breithneachaидh, is e an teisteas-san gu 'n d' thàinig e a mach o thùs a chuairt mar Shoisgeulaiche, ann an lànachd neirt agus ulluchaidh, agus an lànachd sin o shuas; agus gu 'm facas dearbhaidhean mar an ceudna o thùs a shaothrach 's an fhìon-lios, an Tighearn bhi maille ris, 's e bhi a'-toirt dha toraidhean a shaothrach : agus tha cuid do na toraidhibh so fathast r' am faicinn eadhon ann an sgìreaclidaibh agus ann an coimhthionalaibh, far nach d' fhuair e feín riamh dol a stigh. Chum luchd-fuath na fìrinn a mach e; ach bhuidhaich saor-ghràs, a dh' aindeoin orra. Agus mar so, cha 'n aithne dhuinn, a réir ar n-eòlais 's ar fiosrachaidh, gu 'n robh air feadh na Gàidhealtachd, duin' eile r' a linn, is mò air an do chuir an Tighearn do 'n urram so,—buaidh shlàinteil do anamaibh bhi a' leantuinn a shaothrach. Tha so mar an ceudna r' a thoirt fainear mu chliù a shaothrachsan, 's a toradh; gu 'n robh a leithid do shuidheachadh, do bhrigh, do rannsuchadh, agus do ghliocas spioradail 'n a theagasc, agus gu 'm feud neach comharraighean air leth a theagaisg aithneachadh, ann an suidheachadh inntinn, 's ann an comhluadar na dreama a fhuair an ceud dùsgadh, agus eadhon cuid d' an oilleanachadh, fodha. Agus tha fios againn air so, gur h-iomadh uair a dh' aithnich aon neach dhiubh so, air neach eile dhiubh, gun eòlas 's am bith bhi ac' air a chéile roimh 'n àm 's an do choinnich iad,—“Gun teagamh, is ann fo theagasc Iain Ceanadaidh a fhuair thusa buillean an ùird sin leis an do bhriseadh thu, agus eòlas na bunaite sin, air am b' àill leat a nis bhi air do thogail suas.”

Bhuilich an Tighearn air, air mhodh chorporra féin, foghainteachd, neart, agus dealbhachas pearsa, a bha sòruichte, agus neo-àbhaiseach. Bha neo-sgàthachd, duinealas, agus aou-fhillteachd iuntinn,—carrthanachd, camhalachd, agus dìlseachd, 'n an tìodhlacaibh nàdurra dha; agus 'n uair chaidh iad so uile, a mhaiseachadh le gràs,—agus am beothachadh, an ceann a chéile, mar fheartaibh pearsa agus inntinn araon, mar chaidh a dhìeanamh, leis an Tighearn, ann-san, gun teagamh, gu moch,—bha inneal air 'ulluchadh, mu 'm feudadh neach a ràdh roimh làimh, gu cinnteach gu robh seirbhis shònruichte aig an Tighearna r' a dheanamh leatha. Bha aig Mr. Iain Ceanadaidh, mar thìodhlaic, gu nàdurra, farsuingeachd, soilleireachd, neart, agus géiread tuigse agus bhreithueachaidh a bha ainneamh r' am faotainn. 'N uair bha iad so air an ath-nuadhachadh tre ghràs, agus mar tha an fhùrinn ag innseadh dhuinn,—“An dream a tha a réir an Spioraid, tha an aire air na nithibh sin a bhuineas do 'n Spiorad,”—bha comas oibreachaidh agus cleachdaimh aig an tuigse agus aig a' bhreithneachadh ud, a bha air leth iongantach, prìseil; a' dol a stigh, gu bhi a' ruigsinn air dìomhaireachdaibh na fìrinn, —'g an aithneachadh, 'g an rauusuchadh, agus 'g an laimhseachadh—agus 'aignidhean agus a chridhe féin 'g am faotainn prìseil, glòrmhor; agus gheibh teadh 'inntinn ann an labhairt o 'n fhocal, agus 'g a mhìneachadh, mar shoitheach a' cur thairis, agus e a' toirt a mach agus a' roinn gu cubhaidh, á ionmhasaibh neo-clìrìochuach na fìrinn, nithe, a dh 'aithnicheadh anama fa leth, bhi a' luidhe r' an cor féin. Bha na nithe so, gu tric os ceann seallaidh agus breithneachaidh, do anamaibh bochda, mar mheas air àrd mheanglanaiibh nan craobh, nach faicear os ìosal,—gus an d' fhuair, mar gu 'n abradh tu,

gáirdean an fhir-theagaisg, tre ghràs, neart agus comas sìnidh, leis an d'ràinig e air meas tarbhach chraoibh na beatha, a' lùbadh nau geug, agus a' builcachadh an toraidh, agus 'g a roinn; gus an d' fhuaireadh e, a réir a' gheallaidh, a' leigheas anama dhaoine. Agus mar bha geurachd agus soilleireachd breithncachaidh air an tabhairt do Mhr. Ceanadaidh ann an nithibh Dhé agus Chriosd; mar sin, bha an tiodhlac agus an gràs ceudna 'g a fhàgail comasach bhi a' deanamh sgaraidh eadar a' mhaith agus an uilc, ann an suidheachadh, agus ann an coraibh anama fa leth. B' anam cruadhaichte do rìreadh 's a' pheacadh, a b' urrainn seasamh gun chriothnachadh agus gun fhéin-dhìteadh ri aghaidh faobhair an teagaisg ud, 'n uair ghabhadh am fear-labhairt claidheamh an fhocail 'n a làimh. Is ann an làimh an Spioraid shìorruidh, gun teagamh, is claidheamh dà-fhaobhair e: ach tha an Spiorad sin féin ag altachadh a' chlaidheimh, le an inntinnibh-san, mar innealaibh, tre 'n deachaidh an claidheamh ceudna, cheana, a chur. Agus gu cinnteach ann an làimh Mhr. Iain Ceanadaidh, bu lìonmhòr na h-anama d' an d' rinneadh "focal Dhé bed agus cùmhachdach, agus ni bu ghéire na claidheamh dà fhaobhair 's am bith; a' ruigheachd eadhòu chum eadar-sgaraidh an anama agus an spioraid, agus nan alt agus nan smear, agus a' toirt breth air smuaintibh agus air rùnaibh a' chridhe." Agus, fo 'n teagasg chumhachdach, spioradail, bhò so, bha luchd-éisdeachd air an toirt gu bhi a' mothachadh gu 'n robh na h-uile nithe, eadhon annta féin,—'n an anamaibh, agus 'n an oibríbh, "Lomnochd agus fosgailte do shùilibh an Ti sin, d' am feum sinn cunntas a thabhairt." Thcireadh an fheòil teagasg cruaidh r' a thcagasg;—a' rùsgadh gach cuil-beirt, a' leagail sìos ga làr nan dìdeanan-bréige,—a' tar-

ruing na féin-fhìreantachd gu solus an fhocail, 's 'g a cur gu nàire fo thuairisgeul a gràinealachd féin. Gheibh-teadh an teagasg ud a' bearradh 's a' lomadh an anama, 'g a fhàgail gun chùl-taic, gun fhasgadh, ri aghaidh ceart bhreitheanais Dhé, agus fo bhinn-dìtidh a lagha. Ach cha b' e iarrtus no tlachd an fhir-theagaig chaoimh ud, anama dhaome 'fhàgail 's an luidhe sin. 'S ann a ghabh 'anam féin tlachd, 's a fhuair e suaimh-neas, ann an òirdheirceas iomlanachd an Aoin ungtá; agus is ann ann an Criod a shearmonachadh do pheac-achaibh cailte a ghabh e do rìreadh tlachd; 'g a mhol-ladh do 'n spiorad blàrùite. 'S ann an sin a chìeadh gu sònruichte a thagrath 's a dhian-dhùrachd, agus e ann an spàирн anama, a' co-fhreagairt an tuairisgeil bhean-naichte sin,—“Uime sin, is teachdairean sinne air son Chriosd, mar gu 'n cuireadh Dia impidh leinne: tha sinn a' guidheadh oirbh as uchd Chriosd, bithibh réidh ri Dia.” 'S ann 's an tagradh ud ri anamaibh a chìeadh an gràdh sin,—an gràdh saor, sìorruidh,—a b'e a mhiann 's a thlachd a ghnàth bhi a' moladh,—a' dealradh a mach, eadhon 'n a ghnùis féin, agus e mar gu 'm biodh e a' leaghadh fo chumliachd a' ghràidh sin, a bha an Spiorad Naomh, gun teagamh, a' giùlan a stigh air 'anam. Cha b' aiumic a chunnaic cuid, an fhìrinn phrìseil sin air a leigeil ris, eadhon gu faicsinneach'n a shnuadh,—ann an teas a thagraidh,—“Air bhi dhuinne, le aghaidh gun fholach ag amharc mar ann an sgàthan air glòir an Tighearna, tha sinn air ar-n-atharrachadh chum na h-iomhaigh ceudna, o ghìorùir gu glòir, mar le Spiorad an Tighearna.” 'Scinnteach sinn nach 'eil sinn a'dolthar an tothas cheadaichte, ged theireadh sinn nach b' urrainn do anam creidmhreach, agus o ann am beò-chleachdamh 's am bith, suidhe, fo éisdeachd Mhr. Ceanadaidh, gun 'fhaicinn gu

'n robh aige-san comh-pàirt gu firinneach, 's an t-soch-air mhòir ud, a shealbhaich seirbhisich Chriosd-anns na linnibh o shean.

Cha mhò a b' ann 'n a dhleasdanasaibh follaiseach a mhàin, a chìteadh maraon smachd agus maise na diadhachd a' dealradh ann. 'N a chomhluadar, 'n a ghiùlan, 'n a għluasadaibh, bha comharraidhean an duine nuaidh eo so-aithnichte ann, agus ged nach b' urrainn do neach 's am bith eòlas a chur air gun spéis agus urram bhi aige dha, mur dhuine; gidheadh b' e cliù agus giùlan an duine nuaidh a chìteadh a' toirt barrachd, 's a għeibh teadh a' tarruing gràidh phobuill an Tighearn d' a ionnsuidh. Dh' fheudadh cuid, eadhon dhiubh-san, ni-eigin do fħiamh bhi orra 'n a chuideachd, no 'n a chomhluadar, roimh dhoibh mòran eòlais a chur air. Cia mar b' urrainn iad ach ni-eigin sgàtha bhi orra roimh dhuine a ràinig air a leithid do sheasamh ann am beatha na diadhachd, agus a mhothaich iad bhi co àrd os an ceann féin; agus dearbhachd aca gu 'm bu leanabaibh a mhàin iad féin fo a làimh, 's gu 'm bu dligh-each dhoibh urram a nochdadh dha. Ach mar bu dlùithe a thigeadh iad dha, is ann bu mhò a chitheadh, 's a choinnicheadh iad ann-san, an tairisneachd iriosal, an caoimhneas gràidh, agus a' chaomhalachd bheannaichte sin, a mhisnicheadh 's a thàlaidheadh iad; 's a dh' fhàg-adh dearbhadhpriseil 'n an uchd,—eadhon mar is gràdh Dia,—mar sin, an dream a 's dlùithe a għeibh teachd am fagus dha-san, gur h-iad sin a 's mò 's an dealraich fior għraddi a mach, maille ris an fħior irios-lachd sin, a mheasas gur feàrr gach aon neach eile na e féin. Cha b' ann gu neo-bhrcithneachail a bha so. Cha b' aithne dhuinn duine, bu chumhachdaiche o'n tigeadh eronachadh, eadhon le a thosdachd, do 'n aidcachadh

anns am faiceadh a gheur-fhradharc gu 'n robh giamh na mi-fhallaineachd.

Na 'n rachadh sinn a dheanamh iomraiddh air buadh-aibh a shearmonachaидh, cha bhiodh dhuiun 's a' cheud àit, ach a ràdh, gu 'n tuígeadh tu féin air, o a dhol a mach, gur h-i a b' inntinn dha—"So chuir mi romham, gun eòlas a ghabhail air ni 's am bith 'n ur measg, ach air Iosa Criod, agus esan air a cheusadh." Chitheadh tu e eadhon 's an dol a mach, agus a spiorad luchdaichte, mar fo chudthrom na teachdaireachd glòrmhor a ghiùlain e, agus a prìsealachd do anamaibh dhaoine. Marrachadh e air aghaidh, chitheadh tu, gu 'm b' e gràdh, an gràdh sìorruidh, an gràdh saor, an ni sònruichte, leis an d'rinneadh greim air 'anam féin; agus gu 'm b' e an gràdh sin, bu mhiannach leis, gu 'n tuigeadh, 's gu 'm breithnichicadh, gach dùil. B' i glòir pearsa an Eadar-mheadhonair, *Emanuel*, an Dia-duine, aon do theagasc-aibh prìseil an t-soisgeil slùrruidh, anns am faigheadh a bhriathran, farsuing, sòlasach, geur-sheallach, cumhachdach, drùidhteach. Agus ann am mìneachadh an rathaid 's am bheil am peacach, fo theagasc an Spioraid Naoimh, air a tharruing uaithe féin, no a mach as féin, gu bhi a' gabhail aithne air a' phearsa ghlòrmhor so, agus gu bhi a' deanamh greim air tre clreidimh, gus am faighear ann e, còmhdaichte le 'fhìreantachd-sau;—bu shioilleir, agus bu tharbhach a theagasc. Obair an Spioraid 's an anam,—obair na h-ath-ghineamhuinn 's na h-ath-bhreith, agus obair ghilanaidh na fola, is ann mu 'n déighinn sin, 'g am mìneachadh, 'g an lorgachadh, 's an anam shàruichte, 'g an dearbhadh, agus anns gach ceum a' cur dealachaидh le glan fhaobhar an fhocail eadar an glan agus an neo-ghan, eadar an fhìor obair agus a coslas a mhàin,— 's ann an so, gu ro shònruichte,

a gheibhteadh Mr. Iain Ceanadaidh, a' dol a stigh gu dìomhaireachdaibh a' chridhe, agus a' toirt a leithid do shealladh do thugse agus do choguis a' chreutair air 'uile cheumannaibh féin, agus gu 'n smuainicheadh tu nach bu chomasach do 'n chealgair dol as 's am bith bhi aige; agus far an robh ni 's am bith do 'n fhìor obair ud, gu 'm feumadh gu 'm buaileadh 's gu 'n dealradh an solus ud a stigh oirre, eadhon ged bhiodh i foluichitte gu sin o 'n anam féin,—agus gu 'm feudadh e misneachd a ghlagadh. Na 'm feudadh sinn a ràdh gu 'n robh neach seach neach do fhìor sheirbhisichibh Chriosd bu mhò na chéile a thug urram do 'n Spiorad agus d' a obair 's an anam, ann an claoidh na truaillidhreachd, theireadh sinn gu 'm b' e Iain Ceanadaidh an duine. Ach cha 'n 'cìl. Gidheadh tha eadar-dhealachadh thìodhlacan ann, agus b' e so aon air leth do na tìodhlacaibh sònruichte—a fhuair esan tre ghràs. Bha géiread a bhreithneachaидh spioradail a' faotainn dol a stigh 's an obair dhìomhair, ghlòrmhor so, air a leithid do dhòigh, agus nach b' urrainn, theireadh tu, a measg a luchd-eisdeachd 's an do thòisich an obair, aon ni bhi air 'fholach o aon dhiubh, a bhiodh cunnartach, cronail, no 'n a bhacadh do 'n obair. Bha, mar so, an creutair nuadh,—a' bheatha spioradail, ann am pobull Dhé, 'n an cùram air spiorad an fir-theagaisg ud. Gu cinn-teach, b' i a' bhan-altrumachd fhallain a fhuair gach anam a bhais, fo a theagasc-san, an Tighearn bhi gràsmhor. Chìeadh air a ghnùis, ann an laimhseachadh dheuchainnean agus uallaichean an anama, an cùram fo 'n robh e, gur h-ann ri oighreachd Chriosd, agus ri toradh saothrach 'anama-san, a bha a ghnothuch. O, is ann an so a mhothaicheadh pobull an Tighearna, caoimhneas, carthannachd, dìlseachd Chriosd, a bhi air an ulluchadh

dhoibh féin, agus air an nochdad, troimh inntinu agus troimh chridhe an aodhaire. Bu tric a thug, na fhuair iad mar so, air iomadh, bhi ri ioghnadh agus ri moladh, air son mar dh'ulluich an Tighearn dhoibh, fear-iùil 's an fhàsach: agus tharruing so air mhodh àraig, agus cha b' iongantach e, gràdh na h-oighreachd d' a ionnsuidh. Anns na ceumannaibh sin, tre 'm bheil aig an obair dhìomhair a dhol 's an duine 's an leth stigh, ann am fìor phobull Dhé; tha sinn a' creidsinn gur gann, co fhad 's a chunla siune, no a leugh sinn,—a fhuair fear-teagaisg 's am bith, barrachd soilleireachaidh, 's, a fhuair Mr. Ceanadaidh:—an dealachadh a chuireadh e gu tric, agus gu dìleas, soilleir, cumhachdach, eadar na nithe a bha do 'n fheadil agus do 'n Spiorad, agus eadar na nithibh a bha 'n am buaireadh o 'n eascaraid, agus a bha 'n an deachdaimhibh, a' tighinn o 'n inntinnibh féin, ris an labhradh e. Bu shoilleir 'n a theagasc, gu 'm feudadh e do rìreadh a ràdh, 'n a thomhas féin, mar deir an t-abstol ris na Corintianaichibh—“Oir cha 'n 'eil sinn aiveolach air innleachdaibh Shatain.” Agus cha b' e so a mhàin, ach cha b' ainneamh uair, a fhuair iomadh neach do 'n phobull e, a' toirt rabhaidhean roimh làimh dhoibh, mu bhuiridhibh sònruichte a bha gu a thighinn orra ann an ùin' aithghearr an déigh an àma 's an do labhair e riutha. Agus is aithne dhuinn neach agus neach, do 'n deachaidh na rabhaidhean ud a bheannachadh gu pait agus gu gràsmhor. Cha n' fheud sinn bhi 'n teagamh, nach b' iomadh cor 's an robh anama fa leth, 'chaidh 'fhoillseachadh dha gu sònruichte,—cha 'n abair sinn gu mòrbhuileach; ach gidheadh, ann an cumhaclid Dhé, 's an uaignidheas, 'n a fheitheamh air an Tighearn; agus esan mar so, o 'n uaignidheas a' dol a mach, air 'ungadh tre ghràs, gu bhi a' gairm sìthe

agus fuasglaidh, agus comhfhurtachd, do 'n dream a bha 'n sàs, no an cunnart fàilneachaidh agus tuiteim. Dh' aithnicheadh iomadh air a ghnùis fhlathail, 's an dol a mach, gu 'n robh teachdaireachd phrìseil air a shiubhal, d' an ionnsuidh féin. Agus tha sinn a' creidsinn gur h-iomadh aon do phobull an Tighearn, a thuig 'n am faireachduinn féin, 'n an suidhe fo a theagast, ciod e a tha air a chiallachadh, le gnùis Mhaois bhi a' dealradh 'n uair thàinig e a nuas o 'n bheinn; agus mar tha 'm focal a' cur an cèill gu 'm bi frithealadh an Spioraid ni's ro-ghlòrmhoire,—le bhi eadhon a' dearcadh air gnùis an Teachdair' urramaich so, agus e a' tighinn a mach air a luchdachadh le lànachd bheannachd shoisgeil na sìthe. Cha b' ann o mhullach na beinne a loisg le teine, a ghiùlain e sud leis,—ach o 'n uaignidheas, agus e ann an sìneadh agus ann an spàirn anama, 'n a cho-chomunn tre chreidimh ris an Tighearn,—a' tagradh as a leth féin, agus as leth na h-oighreachdagus an aobhair. B' ann dorìreadh ann "an gleann na h-irioslachd" a fhuair esan bhi mar so air 'àrdachadh, agus air a lònadh, mar shoitheach taghta, le lànachd gràis. Is ann 's an uaignidheas a bha a thlachd. Agus is fianuis chudthromach so, a tha sinn cinnteach a dh' fhàgadh le Mr. Iain Ceanadaidh, 's a tha mar fhiachaibh oirnn a thabhairt do Luchd-teagaisg agus do Luchd-éisd-eachd,—meud na h-ùine a bhulich e 's an uaignidheas. Ma bha a thìodhlacan agus a ghràs a 'toirt barrachd air mhodh co sònruichte os ceann na chunncas 's a' chuid mhòir; a réir sin, bha fios aca-san d' am b' eòl a ghiùlan o là gu là,—a réir sud, gu 'n robh an tomhas 's an deachaidh an ùine a bhualeachadh leis gu-h-uaigneach, ann an co-chomunn ris an Tighearn.

Bha dol a mach, agus cuairt, agus saothairean an duine urramaich so, uile, comharraichte, soilleir, neo-àbhais-

each. Bha 'aithne agus 'eòlas air dìomhaireachdaibh an fhocail,—air dìomhaireachdaibh an rùin shìorruidh, ann an tomhas ; air dìomhaireachdaibh peacaidh, agus buairidh, air dìomhaireachdaibh a' chridhe 's an anama, agus oibre an Spioraid Naoimh,—bhia iad uile, anns-an, 'n an nithibh comharrraighte, a dh' ulluich an Tighearn, aun san, a chum leas a phobuill agus 'ao bhair féin. Cha b'aun, mar so, tartarach, farumach, agus cruaidh-sgalanta, a gheibh teadh a theagasc fallain, spioradail, beannaichite; cha b'ann gu h-ioghnadh chreutairean a tharruing chuige féin, mar gu 'm biodh e ag iarruidh molaidh agus cliùtha o chreutairibh bàsmhor, peacock, agus a' deanamh spùinnidh air Dia, ann an seirbhisibh a thighe 's a rioghachd féin. Agus mar dh' ainmich sinn cheaua, cha b' i a' bluaidh a chìteadh a' leantuinn a theagaisg, straideadh a measg nau cnàmhan tiorma, agus iad a' tuiteam sìos a rìs, co tioram 's co cruaidh 's a bha iad riamh : cha b' ann a' ruith, a bha a theagasc air uachdar, mar chithear am fath-losgadh 's an earrach, a ghabhas thairis air uachdar nan cnoc, 's nan uchdach, 's nam monaidhean, agus d'am faicear lasraichean mòra, mar gu 'm biodh iad beò, agus deatach a chuireas eagal air neach ; ach gidheadh, nach d'rinn aon deargadh air an fhonn. Pill a rìs an ath bhliadhna ; agus chi thu am fonn ud, ach beag mar bha e ; cha do thionndaidheadh, cha do threabhadh e, cha do chuireadh le sìol e ; agus cha mhò chithear an toradh a' fàs. Ach 's ann bha an teagasc so, cha 'n ann a' ruith air uachdar, 's a losgadh ; ach mar is tric a thubhairt e féin, "*A' tarruing nan claisean domhain,*" agus a' cur an t-sìl phrìseil, a mhiàin o 'n cinn 's o 'n abuich, "*na sguaban troma,*" mu 'm bheil am focal a' deanamh iomraidh dhuinn. Agus 's an la sin anns am "*pill saor dhaoine an Tighearn,*" agus 's an tig iad gu

Sion le caithream, agus aoihhneas sìorruidh air an cinn: 'n uair gheibh iad gàirdeachas agus aoihhneas, agus 'n uair theicheas bròn agus osnaich air falbh ;" is dearbh ta leinn, 's an là sin,—hochd mar mheasar suidheachadh agus cor an aohhair agus na h-Eaglais 'n ar làithibh, gur h-iomadh iad, o fharsuingéachd na Gàidhealtachd mu thuath, a dh'fhoillsichear, mar choron aoibhneis 's an Tighearna, do Mhr. Iain Ceanadaidh.

Ghairmeadh Mr. Ceanadaidh dhachaidh, air an deich-eamh là do mhìos mu dheireadh a' gheamhraidh, 's a' hhliadhna 1841, agus ann an aois nan Trì fichead 's a naoidh; agus e ann an tomhas mòr, mar bha Maois o shean, gun fhàilneachadh 's am bith, ach heag, a thiginn air a neart no a threòir.

Chòmhdaicheadh le dubhachas aghaidh na dùthcha timchioll. Mhothaich, eadhon, a' chuid a b' cutruime giùlan, 's a sheas a mach an aghaidh an t-soisgeil, gu 'n "do thuit uachdaran agus duine mòr an diugh ann an Israel." Agus bu ro-aithnichte e, air feadh na dùthcha timchioll, gu 'm b' iomadh anam bochd, hrùite, eadhon a ghlaodh, 'n uair chual iad an naidheachd mhuladach,—"M' athair, m' athair ! carhad Israeil, agus a mharc-sluagh !" Air son a choimhthionail chaoimh féin, a bha prìseil aige, agus leis am bu phriseil esan ; is ann a nis a mhothaich iad do rìreadh co prìseil's a bha e. Agus huinidh dhoibh gu cinnteach, an teisteas a thoirt dhoibh, gu 'n do nochd iad an urram agus an gràdh do 'n aodhair bheannaichte agus urramach a thugadh a nis uatha, air dhòigh, a hha do rìreadh ion-mholta, mar ghiùlan cuhhaidh, caomh, agus dàimheil. Ach b' iomadh an Sgìreachd 's an c oimhthional a thuilleadh orra-san, a nochd d' an fhaireachduinn cheudna. Bha an aimsir, mu àm a hhàis, donionnach, stoirmeil, sneachdaidh : agus gidheadh, hha

tuilleadh agus Cùig ceud deug neach, a thàinig, cuid dhiubh astar làithean, a dh' fhaotainn aon sealladh d' a dhuslach, mu 'n rachadh a chur fo 'n ùir. Bha a theagh-lach féin, 's beag a ruigeas sinn a leas sin a chur an céill, ann an doimhneachdaibh a' bhròin; agus cuid diubh ann an trom euslaint 's an àm; agus ged bha an uiread ud do shluagh a' dol agus a' tighinn a là 's a dh' oidhche, cha chluinnteadh guth no gluasad 'n am measg; cha mhothaichteadh an cos air urlair,—tuirseach, trom, mar bha iad. Ise gràdh a bha 'g an tarruing;—agus bha fiamh r' a aithneachadh air an gnùis, agus iad a' beachdachadh a' bheàир a rinneadh orra féin, agus 'n am measg.

Bu mhuladach am buille do Eaglais na h-Alba, agus do aohhar an t-soisgeil 'n ar Tìr, Mr. Iain Ccanadaidh bhi air a thoirt air falbh; agus gu h-àraig mu àm 's an robh deuchainnean troma dlùth air an Eaglais. Cha bhuin dhuinne breth a thoirt, cia mar thuig mòran an guth so, agus an gnìomh a rinneadh leis an Ard-Uachdaran. Mu thimchioll na bha gu a tighinn air an Eaglais, dh' innis sinn cheana, ciod i a' bheachd 's an robh e féin mu a thimchioll. Dh' fhàg e an fhiannis sin 'n a dhéigh. Is ann do 'n Tighearn a bhuineas na h-innealan a dh' ulluich e féin; agus is ann 'n a làmhaibh-san a tha an aimsirean gu léir. Ach, 's i a' cheist dhoibh-san a 's maireann fathast, am bheil iad féin do rìreadh 'n an luchd-leanmuinn orra-san a tha a nis tre chrcidimh agus floighidinn a' sealbhachadh nan geallana. Far am bheil an Tighearn a' beannachadh, gheibhear cuimhhne mu 'oibríbh-san a' tighinn a stigh, agus a' toirt cleachdaimh do 'n inntinn. Agus is i comhairle an Spioraid dhuinn, "Bithibh cuimhneachail air bhur cinn-iùil, a labhair ribh focal Dhé; leanaibh an creidimh-san, a' beachdachadh air crìch an caithe-beatha, Iosa Criosd,

an dé, an diugh, agus gu sìorruidh an Ti ceudna.” Tha ar n-iomradh-ne anfhang. Ach cha ’n ann mar sin a gheibhearr cuimhne Mhr. Iain Ceanadaidh, ann an cridhibl phobuill an Tighearn. Is i ar dùrachd, agus dùrachd Ughdair a’ Mharbhrainn a leanas, gun teagamh, gu ’m biodh iad so le chéile, ’n an cuideachadh, an t-iomradh agus am Marbhrann, araon, dhoibh-san a dh’ iarradh bhi a’ cuimhneachadh a’ mhaiteis a dh’ ulluich an Tighearn, ’s a nochd e dhoibh féin, agus do ’n oighreachd timchioll orra, ann am pearsa, ’s ann an tìodhlacaibh an Teachdair urramaich so. Is iomchuidh gu ’m biodh fianuis air oibrídh Dhé d’ ar n-Eaglais, air a toirt leinn. Agus a nis ’s i ar n-ùrnuiigh ’s ar n-iarrtus, gu ’m bu toigh leis an Tighearn am beannachadh.

M. M.

MARBHRANN

AIR

MAIGHSTIR IAIN CEANADAIDH,
MINISTEIR SGIRE A' CHAISTEIL RUAIDH.

LE

DR. IAIN DOMHNULLACH,
MINISTEIR NA H-EAGLAIS SAOIRE, 'S AN TÒSIDHEACHD.

MARBHRANN,

AIR

MR. IAIN CEANADAIDH,

ETC.

AN LUINNEAG.

Ochan is ochan mar tha mi !
Thug do bhàs dhomh 'n lot a tha geur ;
Is lot gu h-aithghearr nach slànuich ;
O 's cràiteach mi 'n diugh as do dhéigh !

I.

Is iomadh beum thug am bàs dhuinn,
'S thug beuman ro-chràiteach 's an uair ;
A' gearradh as uainn nam Bràithrean,
Bha feumail, tre ghràs, fad an cuairt.

II.

Seadh, toirt nan Reul uainn bu shoilleir',
A dhealraich 'n ar speuraibh 's an oidhch' ;
A bha toirt iùil dhuinn air thalamh,
Le solus bha glan, is gun fhoill.

III.

Tharruing sud neul air ar n-iarmait,
Is cha 'n ioghnadh idir an leòin ;
Oir chuir sinn gruaim air an Tighearn,
'S cha d' ioc sinn dha 'n cliù mar bu chòir.

IV.

O, chuir sinn cràdh air Fear-saoraidh!
 Is dh'earb sinn á daoinibh 'n a àit;
 Cha robh sinn 'g amharc na gréin' ud,
 O 'n d' fhuair Reultan solus do ghnàth.

V.

Seadh, cha d' thuig sinn mar a dh' fheumadh,
 Thaobh gach Reul' dhiubh sud thugadh uainn,
 Gur h-ann o dhealradh na Gréine
 Bha 'n solus gu léir, teachd a nuas.

VI.

Gu 'n togadh 'n Tighearn a suas dhuinn,
 An doimhneachd a thruais is a ghràis,
 Fianuisean treun' agus buadhach,
 'N àit na thugadh uainn leis a' bhàs.

VII.

Oir tha ar Ceannard nis àrdaicht';
 'S tha lànachd anns-an, tha do-luaidh,
 Gun aig' ach an Spiorad a dhòrtadh,
 'S bidh fianuisean beò ann gu luath.

VIII.

'S a thaobh gur h-ainm dha gu h-àraidh,
 Fear-leasachaiddh 's càraig nam bìarn,
 Rachadh ar n-athchuinge suas ris,
 'S thig furtachd is fuasgladh gun dàil.

IX.

O, gu 'n tigeadh nuas oirnn na frasan,
 A thaisicheadh cridheachan cruaidh',
 A bheireadh aiteadh air reòiteachd,
 Is bed iad, tha 'n diugh mar 's an uaigh.

X.

'S Dia gu robh saoibhir 'n a ghras-san,
 Ris 'n iarmad a dh' fhàgadh air chùl,
 'S 'g an deanamh spioradail, sgiamhach,?
 Is gnìomhach 'n an dreuchd, mar luchd-iùil.

XI.

Tha fear air leth do na Bràithribh,
 Air 'n do leag am bàs a làmh fhuar,
 Bha soilleir, aithnicht', 'n a là-san,
 Is a chliù-san b' àill leam bhi luaidh.

XII.

'S e tha 'n am shealladh gu h-àraidh,
 Teachdair àillidh a' Chaisteil-Ruaidh,
 'S rè iomadh latha d' a shaoghal,
 A shaothraich 's an Sgìr' ud le buaidh.

XIII.

Is cinnt' gur dealrach an reul e,
 Ann an speuraibh na h-Eaglais shuas
 'S an eaglais bhos bha co feumail,
 'N a dhreuchd-san fad làithean a chuairt.

xiv.

Oir tha sinn leughadh d' an taobh-san,
 A thionndaidheas peacaich gu Criod,
 Gu 'm bi iad dealradh mar reultaibh,
 An speuraibh na Glòire gu sìor.

xv.

'S gun cheist, bu lìonmhòr an t-àireamh,
 O ghràs tre 'n d' rinneadh leis feum;
 Uime sin, 's reannag ro-àluinn,
 Gu bràth e, an iarmailt nan nèamh.

xvi.

A mhaighstir Iain ro ionmhuinn!
 Is b' ionmhuinneach leams' thu o thùs;
 B' i mo dhùrachd a bhi 'g iomradh,
 Do bhuadhan, is t-iomchar, 's do chliù.

xvii.

Is fior, chaithdàil air do mharbhhrann,
 Gidheadh, " Labhraidh balbhachd ri céill;
 'S theagamh nach 'eil e ro-anmoch,
 Bhi 'g iomradh do chliù-s' ann mo sgeul.

xviii.

Tha cuid 'leig tur as an cuimhne,
 Na chual iad r' ad linn-san uait féin;
 'S b' fheumail chum iadsan a dhùsgadh,
 Bhi 'g ùrachadh fathast na sgéil'.

XIX.

Ach, tha cuid, muladach, cianail,
 O leagadh leo riamh thu 's an ùir,
 D' am miann gun teagamh, 's d' an dùrachd,
 Bhi 'g ùrachadh iomraidh do chliù.

XX.

Gheibh iadsan teagasg air uairibh,
 Ag amharc na h-uaigh' 'm bhéil do chéis,
 A bheir gu cuimhne gu luath dhoibh,
 Iomadh ni a chual iad uait féin.

XXI.

'S toigh leo bhi cumail air chuimhne,
 Na linn' ud a fhuair iad 's a dh' fhalbh;
 'S bhi foghlum, 'g amharc na h-uaghach,
 Ge tosdach an uaigh ud, nach balbh.

XXII.

Fhuaireadh leam iomradh ro-fhior air,
 Gu 'm b' tu sìol fhìor-chlann nan gràs,
 A shruth o aithrichibh diadhaidh,
 A riamh a bha soilleir 'n an là.

XXIII.

Fhuair uath-san thu eisimplir dhiadhaidh,
 'S is beannachd o Dhia sin, innt' féin,—
 Ach a' chuid gheibhear leath' riaraicht'
 Bidh 'n diadhachd ac' uile 'n am beul.

XXIV.

Ach cha d' fheud thus' a bhi riaraicht',
 Le creidimh an iasad o chàch,
 Dhòirteadh an Spiorad o Chriosd ort,
 Chuir 'iomhaigh air t-anam gun dàil.

XXV.

'N sin fhuair thu aithn' ann am firinn,
 Air 'n ath-bhreth do rìreadh, o shuas,
 Is phòs an Spiorad ri Criosd thu,
 'S an aonadh tha sìorruidh, 's do-luaidh.

XXVI.

'S fhuair thu an Spiorad mar thiodhlaic,
 Tre t-aonadh ri Criosd anns an uair;
 Chum a bhi annad 'n a chòmhnuidh,
 'S 'n a threòdir anns gach ceum do do chuairt.

XXVII.

Is truagh, gun teagamh, gach teachdair,
 A chaidh steach gu ladarn' 's an dreuchd,
 Gun aithne riamh air Fear-saoraidh,
 No naomh-obair Spioraid ar Dé.

XXVIII.

Labhairt na firinn nach eòl doibh,
 Oir a glòir tha foluicht' uath' féin :
 O, ciod a 's feàrr iad na 'm Pioraid,
 Gun tuigs' air na their e le 'bheul.

XXIX.

No fòs mar bhuaachaill gun sùilibh,
 A ghabhadh air stiùireadh nan treud,
 An deanadh esan fear-iùil dhoibh?
 'S ann chuireadh iad cùl ris, fhuair léirs'.

XXX.

'S truagh iad, le gionaich an t-saoghal,
 'S air barrantas dhaoin', chaidh 's an dreuchd:
 Bithidh an roghainn ud daor dhoibh,
 Ged nach saoil iad 'n diugh e, 's nach éisd.

XXXI.

Ach dheasaicheadh thus' leis an Tighearn,
 Tre obair ro-dhiomhair a ghràis;
 'S chuir e a steach thu d' a fhìon-lios,
 Is lìon thu do dhreuchd ann gach là.

XXXII.

Thug e dhuit cumadh bha àluinn,
 Anns gach buaidh, is tàlann, is rùn;
 'N a t-anam riamh a chuir tàbhachd,
 'S a chuir snuagh nan gràs air do ghnùis.

XXXIII.

'S ann thàinig mach thu mar ghaisgeach
 'S an t-soisgeul, bha deasaicht' is treun;
 Is cha b' ann idir mar leisgean,
 A chuireadh tu 'n teisteads an céill.

XXXIV.

Air t-anam riamh bhitheadh faobhar;
 'S bu shaoithreach thu labhairt do sgéil;
 Oir bha thu 'n neart an Fhir-shaoraidh,
 A' labhairt ri daoin' as leth Dhé.

XXXV.

Air 'n t-soisgeul 'chuireadh an céill leat,
 Fhuair thu aithn' is léirsinn 'n a ghlòdir;
 'S bu shoilleir dhoibh-san bhiodh 'g éisdeachd,
 Ga 'n d' fhairich thu éifeachd do sgeòil.

XXXVI.

Thugadh dhuit aithne gu sònruicht',
 Air innleachd ro-ghlòrmhor na saors';
 Bha ann an cridhe na Diadhachd,
 'S d' am b' tobar o shìorruidheachd—Gaol!

XXXVII.

Eadhon, gaol-taghaidh, is saoraidh,
 Is naomhachaidh, fòs mar an ceudn',
 'N gaol a thug Dia do chloinn daoine;
 Bu chaomh leats' a riamh chur an céill.

XXXVIII.

Thugadh dhuit aithne bha fìor-ghlan,
 Air co-cheangal gnìomh' agus gràis;
 'S is glan a shloinneadh tu mach iad,
 Is gach aon fa seach dhiubh 'n a àit.

XXXIX.

'S a thaobh a' chùmhaint 's a' ghàradh,
 A rinneadh ri Adhamh o thùs;
 Gu 'n do bhris e féin is a chlann e
 Chionn ann-san gu 'n d' rinneadh e riù-s'.

XL.

Uime sin, sheirm thu do pheacaich,
 An staid-san, gun teagamh, bhi truagh;
 Ach 's tu a ghuidheadh gu dian orr',
 Gu 'n teicheadh gu Criod iad ga luath.

XLI.

Dhearbhadh tu 'n cunnart o 'n reachd dhoibh,
 Am briathraibh bha tearc,—ach bu gheur,—
 Fàgail gach aoin dhiubh gun lethsgeul,
 Nach gabhadh ri teisteas do Dhé.

XLII.

Is tric a ghabhadh leam beachd, air
 A' chaoir a bha lasadh 'n ad ghnùis,
 'N àm dhuit cur scìsd ris a' pheacach,
 Gu a sheasamh thoirt uaith 's a lùth's.

XLIII.

Oir mheasadh leatsa, mar Theachdair,
 An labhairt ri peacaich gach àm,
 Gu 'n robh e crocht' riut near Inneal,
 'N e pilleadh no bàthadh bhiodh ann.

XLIV.

Cha 'n e gu 'm b'urrainn thu éifeachd,
 A chur anns an sgeul bha thu luaidh;
 'S ann a dh'earb thu ri Fear-saoraidh,
 Bhi crùnadadh do shaothrach le buaidh.

XLV.

Gidheadh, cha d' mheas thu mar lethsgeul,
 Bhi creidsinn o Chriosd gu 'n robh bhuaidh;
 Bha thu co dian ann do shaothair,
 'S ged dh' earbt' riut saoradh an t-sluaigh.

XLVI.

Ach ann an searm'nachadh 'n t-soisgeil,
 A réir teisteis Spioraid ar Dé,
 Bha thu a riamh aig do dhachaidh,
 'S bu tlachd leat bhi labhairt na sgéil.

XLVII.

Seadh, gràdh Iehobha do dhaoinibh,
 A nochd e gu saor dhoibh an Criod,
 Pears' agus glòir an Fhir-shaoraidh,
 A choisinn dhuinn saorsainn tha sìor.

XLVIII.

A dh'ungadh le h-ola 'n aoibhneis,
 Chum oighreachan ifrinn 's a' blhròin,
 A thugadh dha-san 's a' chùmhnant,
 'A stiùireadh gu cala na glòir'.

X LIX.

'S e Spiorad sìorruidh Iehobha,
 'N ol' ungaidh a dhòirteadh air Criod,
 Chum dhreuchdan urrais, 's Fir-saoraidh,
 A lionadh do chaomh phobull Dhé .

L.

Seadh, chum gu 'n bitheadh 's gach àl e,
 'N a fhàidh, 'n a shagart, 's 'n a Righ,
 'N cosnadh 's an co-chur na slàinte,
 Ri taghadh nan gràs anns gach linn.

LI.

Mar sud, shearmonaicheadh Criod leat,
 Mar thiodhlac do-labhairt ar Dé,
 'N a phears', 'n a chumhachd, 's 'n a lànachd,
 Mar Shlànuigh-fhear iomlan thar sgéil.

LII.

Sheirm thu teagasg na h-ath-ghineamhuinn,
 'N a nàdur ro-ion-mholt', 's 'n a buaidh ;
 Oir fhuair thu aithn' oírr', mar dh'iomraidh,
 S' cha b' leanaban thu idir 'g a luaidh.

LIII.

Is chuireadh 'n céill leat gu saor e,
 Do chlannaibh na daors' is a' chruais,
 Nach rachadh anam, gun naomh-bhreith,
 A chaoiadh steach do 'n naomh-ionad shuas.

LIV.

'S maille ri ath'rrachadh nàduir,
 Is naomhachadh gràsmhor 'n a lorg,
 Gu 'm feum iad trusgan Fir-saoraidh,
 Gu 'n saoradh gu shorruidh o 'n fheirg.

LV.

An trusgan bhitheadh 'n a dhìon dhoibh,
 O dhian-chorruich shìorruidh ar Dé,
 Chionn brisidh 'n lagha mar chùmhant,
 Rinn rùisgt' iad d' a fheirg-san gach ré.

LVI.

Is luaidh thu gu soilleir 's gu slàn dhoibh,
 Nach b' e ath'rrachadh nàduir, ann féin,
 Air an t-saors' bheireadh còir dhoibh,
 Ach Fireantachd ghlòrmhor mhic Dhé.

LVII.

N fhìreantachd ionlan is shìorruidh,
 A chriochnaich e a' air a' chrann-cheus,'
 Anns an robh ceartas làn-riaraicht,'
 Is àrdachadh sìor aig Lagh Dhié.

LVIII.

Gur e sud an trusgan gu sònruicht',
 A chòmhdaicheadh an'manna truagh',
 Air beath' na slàint' bheireadh còir dhoibh,
 S air an oighreachd ghlòrmhor is bhuan.

LIX.

Is a thaobh obair na naomhachd,
 A dh' fheumadh gach aon mar an ceudn'
 Gu 'n robh i co-sheasamh gu h-àraidh,
 Ann an ìomhaigh àluinn Mhic Dhé.

LX.

Is dhuitse b' aithne fior naomhachd,
 O shaothrachadh Spioraid do Dhé,
 'S a cruaidh-chath làitheil ri peacadh,
 Bha gleachdadhbh ri gràs ann ad chré.

LXI.

B' aithne dhuit innleachdan Shatain,
 N a shàthaidhean guineach is garbh ;
 Bhi tilgeadh shaighdean is gnàth leis,
 Air a' cheannard 's àirde 's an arm.

LXII.

Ach, 's ann rinn sud thu ni b' fheumail',
 Do 'n treud, anns na bhiodh tu a' luaidh,
 Oir thug sud faireachduinn gheur dhuit,
 Air coraibh an treud, measg an t-sluaigh.

LXIII.

Thug sud dhuit comas gu sònruicht,'
 Bhi labhairt ri leòintich gu tlàth,
 'S riu-san 'n an spiorad bha brùite,
 'S gu h-ùir a bhà cromadh gach là.

LXIV.

O, 's tu a labhradh gu fòil riu,
 A' toirt do gach seòrs' an cuid féin,
 A' seirm dhoibh sìth' agus sòlais,
 O shoisgeul ro-ghlòrmhor Mhic Dhé.

LXV.

Bha iad a measg do luchd-leanmuinn,
 N an spiorad bha anmhuinn is brùit',
 Leo-san bu toigh bhi 'g ad éisdeachd,
 Oir 's minic a réitich thu 'n cùis.

LXVI.

Chu d' leig thu riamh as do shealladh,
 Gu 'm b' e Spiorad geallaidh nan gràs,
 'Dheanadh do theagasg dhoibh buadhach;
 Ach 's truagh iad nach tabhair dha àit.

LXVII.

Oir ghabh e tàmh ort gu saoibhir,
 S rinn sud dhuinn ro-aoibhneach do sgeul;
 Seadh, bha do theagasg leis cùbhraidh,
 S a' sileadh mar dhrùchd air an treud.

LXVIII.

'S a chionn gu 'n tugadh leat àit dha,
 Mar fhear-càraig na saors' ris 'n treud,
 Mhòr-bheannaich Esan do shaothair,
 Fad bhliadhnaidh do shaoghail 's an drcuchd.

LXIX.

Bu dian, 's bu tric thu a' lùbadh,
 Air d' ghlùinibh aig righ-chaithir gràis,
 A' gleac ri Aingeal a' chùmhaint,
 Gun diùltadh a ghabhail gu bràth.

LXX.

Is 's ann gu tric air do ghlùinibh,
 Fhuair thu inntinn 's rùn Fhir do ghràidh;
 'S tu féin fhuair fagusachd dhlùth dha,
 Seach iomadh dhiubh-san fhuair gràs.

LXXI.

Seadh, shaoil mi riamh, 's b' e mo bheachd e,
 'S co bhacadh dhomh idir a ràdh?
 Gu 'n d' fhuair thu tomhas bha dùbailt,
 Do Spiorad na h-ùrnuigh 's nan gràs.

LXXII.

Och! 's iomadh osnadh is ùrnuigh,
 Is dùrachd gu dian chuir tha suas,
 Seadh, ann an spiorad na brùiteachd,
 O na glùinibh an diugh tha 's an uaigh.

LXXIII.

'Togaidh gach ùrnuigh dhiubh fianuis,
 N an aghaidh riamh nach tug cluais,
 Aon chuid do thagradh no sgeula,
 A chual iad o d' bheul-s' iomadh uair.

LXXIV.

'S mur faigh iad fiosrachadh tràthail,
 Air peacaibh an nàduir 's an gnìomh,
 'S air peacadh diùltaidh na slàinte;
 O b' fhèarr dhoibh nach beirteadh iad riamh!

LXXV.

Thugadh air falbh thu gun fhios dhuinn,
 Cha b' fhiosrach air iomadh do 'n t-sluagh:
 Thugadh air chabhaig thu dhachaidh.
 Mu 'n ruigeadh ar n-athchuingean suas.

LXXVI.

Bhliadhn' nan Ochd-ceud-deug 's dà fhichead,
 Seadh bhliadhn' an Dà fhichead 's a h-aon,
 Ghairmeadh thu suas le Fear-saoraidh.
 Mu aois nan Trì fishead 's a naoidh. .

LXXVII.

'S aig àm do dhuslaich ro àluinn,
 A chàradh gu h-ìosal 's an uaigh;
 Is iomadh sùil a bha deurach,
 Is cridhe bha reubt' agus truagh.

LXXVIII.

A chionn nach cluinneadh iad tuilleadh,
 O na bilibh nis tha fo 'n fhòid,
 Sin a chuir fonn orr' gu minic,
 'S cha 'n ioghnadh leinn idir am bròn.

LXXIX.

Bithidh ort ionndrain feadh dhùthchan,
 Gu h-àraidh feadh dhùthchan 'n taoibh Tuathl,
 Oir shéideadh trompaid na slàint' leat,
 Air bhràigh' 's air mhachair do 'n t-sluagh.

LXXX.

Ach 's ann aig Sgìre Chill-Iùrnain,
 Tha aobhar bhi dubhach gu leòr;
 Oir thugadh lot, le do bhàs dhi,
 Nach slànuich, do chuid, gu nuig Glòir.

LXXXI.

Gu 'n deònaich Criod ann a thròcair,
 Do 'n òganach thàinig 'n ad dhéigh,
 Tomhas do spiorad a phàraint,
 Bheir dha-san bhi gluas'd ann ad cheum.

LXXXII.

Gu 'm bheil fear eile do d' chlann-san,
 Nach 'eil fann ann an iomradh na sgéil;
 An Tighearn gu 'm beannaich na h-òig-fhir,
 'S gu soirbhich gu mòr leo 'n an dreuchd.

LXXXIII.

Bu tu an companach àillidh,
 'S an t-athair a ghràdhaich do chlann;
 Is mar fhear-tigh' ann ad fhàrdoich,
 Bu shon' thu gu bràth air an ceann.

LXXXIV.

Bithidh do bhantrach 's do chlann-san,
 A' tuireadh 's an àm na chaidh uath',
 Oir am briseadh rinn do bhàs orr',
 Cha shlànuicheadh dhoibhs' e gu luath.

LXXXV.

Is iadsan iarmad na h-ùrnuigh,
 Bu dlùth air an son bha thu 'n sàs ;
 Chaoideh air do spiorad 'g an giùlan,
 'S air do ghlùinibh aig righ-chaithir gràis.

LXXXVI.

'S tha aobhar againn bhi saoilsinn,
 Thaobh an teaghlaich chaoimh ud gu léir,
 Gn 'n d' thàinig toradh na h-ùrnuigh,
 A nuas orr' mar dhruchd air an fheur.

LXXXVII.

Thigeadh do aithrichibh diadhaidh
 A bhi dian aig righ-chaithir gràis,
 Air son an cloinne 's an iarmaid,
 Gun fhios ciod ni 'n Tighearn 'n an là-s'.

LXXXVIII.

'S e a chuir mais' air do sgeul dhuinn,
 Do ghiùlan gu léir bhi fo 'buaidh,
 Chionn gu 'n robh cumhachd na diadhachd,
 A' dealradh riamh ann do ghluas'd.

LXXXIX.

An aoradh Dhé ann ad fhàrdoich,
 Bu bheothail, bu bhlàth thu, 's bu chùbhr' ;
 Oir thigeadh tu mach as do sheòmar,
 Fo dhòrtadh na h-ol' ort as-ùr.

XC.

Is iomadh cruinneachadh Orduigh,
 Aig 'n robh sinn ga sònruicht' le chéil' ;
 'S dh' fhàg sud do chomunn 's do chòmhradh,
 Ni 's brònaich' mi nis as do dhéigh.

XCI.

A riamh o chuir mi ort eòlas,
 O thilgeadh 's an Tòis'eachd mo chrann,
 'S e fhuair mi annad-s' am bràthair,
 Bha sàbhailt gu dòchas chur ann.

XCII.

Fhuair mi do chomunn 's do chòmhradh,
 Gu sònruichte spioradail, 's blàth ;
 Oir bha do chainnt air a sailleadh
 Gu soilleir le salann nan gràs.

XCIII.

'S cha d' fhuair Satan a mhiann oirnn,
 Teachd eadarainn riamh le gaoith fhuair ;
 S ann bha ar dlùthachadh a' fàs dhuinn,
 Mar a-b' fhaisg' air bàs thu, 's air uaigh.

XCIV.

'S cha 'n ioghnadh dhomhs' bhi 'g ad ionndrain,
 Oir mar̄ thuirt an sean-fhocal 's fior,
 " Is lom a' ghualainn gun bhràthair,"
 Is dh' fhàg sud mi mall ann mo thriall.

XCV.

Ach bheirinn moladh do 'n Tighearn,
 Gu 'm bheil iarmad 'g éirigh dhuinn suas,
 Tha togail fathast na fianuis;—
 Gu lìonar leo àit na chaidh uainn.

XCVI.

Is iomadh athair is bràthair,
 O thàinig do 'n tir-s' mi air thùs,
 A thugadh dhachaidh le bàs uainn,
 'Is dh' fhàgadh leo mis' air an cùl.

XCVII.

Is tha mi uime sin, ciànnail,
 Mar eun air an t-sliabh tha leis féin ;
 S tha togradh 'n uairibh is iarrtus,
 Aig m' anam, bhi triall as an déigh.

XCVIII.

Ach fàgam a' chùis aig an Tighearn,
 A riaghlas gach ni dhomh air chòir;
 Gus 'm faigh mi dhachaidh gu sàbhailt,
 'N sin dha-san gu bràth bithidh glòir.

XCIX.

Is, Iain! tha nis thu 's an Aros.
 Far 'm faic thu na bràithrean chaidh uainn,
 Seadh, agus Criosd, fear do ghràidh-san,
 Sam bi t' anam sàsuicht' gu buan.

C.

Far nach bi àmhghar no mulad,
 No peacadh, no mallachd, no bàs,
 Ach far an òl thu gu sìorruidh,
 As a' chuan tha gun iochdar, gun tràigh.

CI.

Oir chaidh do gheamhradh nis thairis,
 S do shamhradh cha teirig gu bràth,
 'S a chaoidh do ghrian cha teid sìos ort,
 'S i sìorruidheachd tomhas do là.

CII.

Is co a dh' iarradh gu 'm pilleadh,
 Gu talamh thu rithis chum tàmh?
 Seadh co e idir a dh' iarradh,
 Do spionadh á uchd Fhir do ghràidh?

CIII.

Ach a nis thigeam gu dùnad,
 Le dùrachd gu 'm beannaireadh Dia
 An dàn so, neo-iomlan mar tha e;
 'S a' ghlòir gn robh dha-san gu sior.

1

the first time I have seen a bird
that has been shot down by a gun
and it was a very small bird.

2

The first time I have seen a bird
that has been shot down by a gun
and it was a very small bird.

3

The first time I have seen a bird
that has been shot down by a gun
and it was a very small bird.

4

The first time I have seen a bird
that has been shot down by a gun
and it was a very small bird.

5

The first time I have seen a bird
that has been shot down by a gun
and it was a very small bird.

6



